



М. ИГНАТОВ



ШОРЪЯС  
ВИЗУВТÖНЫ  
ЮÖ







М. ИГНАТОВ

ШОРЪЯС  
ВИЗУВТÖНЫ  
ЮÖ


Кр. и н. с. к. б.  
Сельская библиотека

КОМИ КНИЖНОЙ  
ИЗДАТЕЛЬСТВО 1963

Михаил Иванович Игнатов — том писатель. «Шоръяс визувтöны юö» — сылөн мöд книга. Тайö книгаас автор гижö сы йылысь, кыдзи геофизикъяс корсьöны му пытшкöсса озырлунъяс, налөн интереснöй да öпаснöй удж йылысь. Такöд тшöтш тайö книгаыс мян том йöз йылысь, кодьяс сöмын на пырöны олöмас.

Том йöзлысь олöмсö том писатель сравнивайтö ыджыд юкöд, кодi визувтö мореö. И ассыныс местасö том йöз аддзöны оз лөн курьяын либö вабергачын, а самöй визувинас. Кыдзи и мореö визувтигөн аслас туй вылын юыс паныдасьлö уна мытшöдкöд, сiдз жö и повестьса геройяслы олöмас колö венны уна сьöкыдлунъяс. И сöмын сийö шедöдö ас водзас сувтöдöм могсö, кодi аслас уджөн вайö йöзыслы пöльза, кодi оз пов тышысь да сьöкыдлунъясысь.

Тайö книгаас печатайтöма тшöтш «Тундраын» висьт.



## ШОРЪЯС ВИЗУВТӐНЫ ЮӐ

*Повесть*

1

Нэмъяс чӧж шывгӧ-визувтӧ Вой саридзӧ ю. Заводитчӧ сийӧ кӧнкӧ ылын, Урал гӧраяс дорын, кызди татчӧс йӧзыс шуӧны, Издорыч, да визувтӧ помтӧм вӧръяс пыр, гырысь нюръяс пӧлӧн. И кымын ӗна юыс матысмӧ морелань, сымын сийӧ ыдждӧ, паськалӧ, ньылалӧ ас пышкас сӧстӧм ключьяслысь да сӧм нюръяслысь, гырысь и посни юяслысь да шоръяслысь васӧ. Ыджыд удж вӧчӧ тайӧ ӧтувтчӧм ваыс: буждӧдлӧ берегъяс, путкылялӧ пывсян

кодъ изъяс, мыськалѡ-пожъялѡ лыасѡ, аслас туй вылысь нуалѡ вель гырысь дяс да пукталѡ мѡдлаѡ.

Уна сиктъяс сулалѡны сы берегъяс до-рын — Усть-Илыч и Савинобор, Дутово и Усть-Воя, Усть-Кожва и Щельяюр... На лы-дын кѡнкѡ тшѡтш эм и ичѡтик сикт — Лыабѡж.

Сэні олысь пѣрысь йѡз шуѡны, мый Лыабѡжлы пѡ ар сѣ сайѡ нин. Но веськыда кѡ шуны, сійѡ омѡля нималис-кывсис: матигѡгѡр-саяс кындзи, этша йѡз тѡдлісны тайѡ сикт йывсьыс. И гашкѡ, сійѡ дыр на оліс-выліс эськѡ нимавтѡг, но кызкѡ ѡтчюд Ухта карса геологъяс, нефть корсьысьяс паськѡдісны Коми АССР-лысь карта да чуткисны сэтчѡ карандашѡн... И Лыабѡж лоис не прѡстѡ ку-тшѡмкѡ тѡдтѡм Лыабѡжѡн, а геофизическѡй партияса отрядлѡн базаѡн.

А Лыабѡж кѡ лоис базаѡн, медводдза морт-ѡн сэтчѡ колѡ локны завхозлы. Этша ѡмѡй завхозыдлѡн уджыс?! Колѡ и приборъяс вай-ны, и сѣян заптыны, медым и спецодежда уджалысьяслы вѡлі тырмымѡн да шогмана; ставсѡ кѡ лоѡ дасьтѡма ас кадѡ, и главнѡй уджыс эштас ас кадѡ.

Муртса на удитісны кылавны ю вывті мед-бѡръя йи пластъяс да заводитіс ямны ваыс, Лыабѡж берегѡ сатшкис нырсѡ еджговлѡз неыджыд катер да сѣтысь петіс ыджыд тушаа кыз морт. Сыкѡд тшѡтш берегас чеччыштіс ичѡтик ошпи. Морт шылькнитіс ѡтарѡ-мѡдарѡ лѡсьыд сѡд уссѡ, разис брезент плащыслысь кизьяссѡ (та вѡсна, кажитчѡ, лои ещѡ кыз-джык) да то ли аслыс, то ли ошпилы шуис:

— Воим!

Сэссия найö пошкигтыр кайисны джуджыд кыр йылö да матыстчисны керкаяслань. Тадзи Лыабöжын заводитисны содны олысьяс.

Ичöt сиктын öдйö тöдмалöны быд выль мортос. Эз на удит лэччыны шондi, а челядь и гырысьяс нин тöдисны: ошпились кöзяинсö шуöны Пётр Ивановичөн.

Пётр Иванович бöрын лун-мөд мысти воис отрядса начальник Леонид Семёнович Попов. А июнь тöлысса первой луньясö отрядса оператор Иван Бойко аскöдыс тшötш вайöдис нöшта куим мортос. На пиысь öти вöли енэж кодь лöz синьяса да коскөдзыс еджгов кыз кöсаяса ныв.

Тайö куимыс вöлины студентьяс — Борис Нестеров, Кузьма Перминов да Лена Онькова. Найö воисны татчö дипломводзвивса практика вылö: сiдз вöли гижöма Лена Онькова зептын куйлысь штампа-печата дзоляник бумагаö. Вель уна мөвпьяс да сёрнияс вöлины тайö местаяс йывсьыс практика вылö мөдöдчигөн, поездөн да катерөн локтигөн. И со найö син водзын сувтис керка комына сикт. Выльдөм вевтьяса важ керкаяс сулалисны орччөн выляскөд, а улича бокьясын синмö шыбитчысь кер да тьос чукөрьяс висьталисны, мый танi олöны да овны на кутасны йöз, уджалысь йöз.

Ещё вит-ö-квайтысь Лыабöж весьтö пуксьывлис вой, позьö кö шуны сийöс войөн. Тулыснас войвылын шондыс дзевсьыштлö горизонт саяс сöмын здук кежлö. Прибор прёверитигмоз оператор Бойкокөд студентьяс ветлисны маршрутö — нейджыд опорной профиль кузя ю пöлöныс. Прибор уджалис лючки-бура,



кажитчө, ставыс вөлі дась, но вөрө, ыджыд участок вылө мунны отрядса начальник Попов шуис сөмын выльлунө. Сідзкө, водзын вөлі нөшта на дзонь лун. Вөскресеннө.

Удж бөрад асылыс воис виччысьтөг да өдйө. Лышкыд шонділөн югөрыс швачкөбтіс өшинь пырыс пачө да нөжйөник кутіс вешйыны стеч кузяыс и лэччыны джоджланыыс, матысмис пельөслань. Нюлыштіс Кузьмалысь беринөсь чужөмсө, но Кузьмалы татшөм дурөмыд эз, буракө, кажитчы: бергөдчис стенлань. Шонді эз дөзмы, ещө на паськыджыка нюмдіс да пондіс корсьны комнатаысь, кодөс позис окыштны, и адзис Борисөс.

Вөчны вөлі нинөм, быть лои чеччыны, петны спальнөй мешөкысь. Вөрзөдчис и Кузьма.

— Ох-хо-хо-о!— чөскыда очыштіс сійө да, юрсө кыпөдігмоз, содтіс:— Выхь местаад крөпыда узьсьө! Мукөдлысь кывлан: йөзад пө оз узьсы-а. Но, мый вөчны кутам талун?

— Вай чеччы первой, сэсся и тыдовтчас,— кружкаысь мыссигмоз вочавидзис Борис.— Лена төрыт көзяйкаыслы пес пилитны корө-вөлі. Вунөдін? Отсыштны колө пөрысь мортлы. А войланьыс кө ыркыд лоө, и тайө пачсө ковмас ломтыштлыны.

— Эк!— гыжйыштіс юрсө Кузьма.— Думөн радла вөлі, мися, лунтыр позяс куйлыны лыддысигмоз. И мыйла бара пескыс колө. Индияын, көнкө, пес пилитөмтө оз и төдны.

— Сійө өд Индияын,— торкис Борис.

— А төдан,— эз өвсы Кузьма,— бөрря сө онас пө вося шөркодь температураыс квайг градус вылө кайөма. Гашкө, коркө и тані пес оз кут ковны пилитны. А?— синъясыс Кузь-

малён читкыртчөмаёсь, сьодоватёсь, гажаёсь. Сійё мыджсис кияснас раскладной крөвать дорьясас, кыпөдыштис тушасё да петис мешөкысь, шпыннялө. Пуктөм пиньясыс югьялөны.

— Этшаджык сөр,—вомалис лабутной Борис.—Учёнсийяс висьталёны, бөр нин пөкөдздөдны заводитөма. Мыссы өдийджык да мунам.

— Мунам,—эз пыксы Кузьма.

Другьяс пасьтасисны да мунисны. Но дыр-ө тырмас куим том мортлы пилитны вит-квайт краж? Куритчысь морт эськө шуис: куритчөм кост.

Кузьма лэччис кытчөкө кыр горулас да воши, а Борис кольччис поткөдчыны. Шковгөны-потласёны пес чуркаяс. Лена тэчис песё көбрег бөкө, а Борис, тэрмасьтөг уджаліг-моз, мөвпаліс. «Вот найө и местаынёсь. Аски мунасны участокө. Кытчөкө ылө-ылө вөрө, көні, гашкө, наөдз некод на эз и вөвлы. Мый найөс виччысьө сэні? Бөрья луньясас сійө морёсын кыліс кутшөмкө аслыспөлөс чувство. Полөм? И сійө вермас лоны. А друг слабөсь найө лоасны? Од тайө абу нин сөмын практика, а производство, кытчө найө көсийөны воськовтны техникум помалөм бөрын. Сідзкө, не сөмын отчөт да диплом йылысь колө мөвпавны, но и удж йылысь, кызди тайө уджыс прөйдитас. Колө нефть и газ! Быдлаын та йылысь гижөны. И сійө, и Кузьма, и Лена со тшөтш босьтчөны, көсийөны отсасьны нефтьсө корсьны. А дасьөсь-ө найө татшөм удж вылас? Сійө өд өнөдз прамөя эз на думыштлы, кутшөм сьөкыллуньясыс вермасны сюрны уджын, думайтліс, мый уджыс

лоо кокни, вөръясті ветлөм йылысь мөвпалі-  
гөн быттьо пуяс йывтыс лэбавліс. А, гашкө,  
неправильно бөрйис аслыс специальностьсö!  
А мукöдыс? Мукöдъяс мунісны разной места-  
ясö: Уфаö, Воркутаö. Найö дасьöсь? Онї, кор  
абу на дзик сёр, и ковмас решитны, а то  
коляс практика кад, гижасны да защититас-  
ны диплом и, пöжалуйста, удж вылö вөссяс  
өдзöсыс. Көть кытчö мун. Көть Сибирö, көть  
Карелияö, көть Комиын уджав. А кажитчö  
оз сьөлöмыслы тайö улжыс? Лоас диплом,  
лэдзасны выль специалистöс, а оз-ö пет шö-  
йö вошөм морт?

Кирзөвöй салöга, латшкөсіник тушаа Борис  
поткөдчис кокъяссö паськөдөмөн. Чорыда  
выныштчөмөн поткөдіс медбөръя увъя чурка  
и быттьо чурка пытшсьыс кыліс серам. Ныв-  
лысь гажаа сералөм. Видзөдліс Леналань.  
Лена, тыдалö, пессö тэчигмоз мыйкө мөвпаліс  
жö. Видзөдліс улича вылö. Кык керка кост  
сайын сулалісны отрядса начальник Леонид  
Семёнович да кутшөмкө ныв. Попов мыйкө  
висьталіс, а нылыс бара серөктіс. Сэсся  
өвтыштіс кинас Поповлы да, керка дорас ке-  
жигөн нин, горөдіс:

— Энö вунөдöй клублысь приёмниксö пö-  
чинитөм йылысь! Көсийысинныд!

Борис быттьо кынмис места вылас. Кытысь  
сійö аддзывліс тайö пелькиник тушаа нывсö?  
Кытысь да кор кывліс татшөм жö гөлөссö?  
Гажа серам... Быттьо төдса. И төдтөм.

— Кодөс нö аддзин?— шыасис Лена.

Борис тэрыба бергөдчис сылань. Лена, бу-  
ракö, казялөма төдтөм ныв бөрся сылысь  
кыйкъялөмсö, видзөдö синкым увтыс моз,

нюмъялө. Борис кыліс, кызди чужомыс пондіс шонавны, шыбитіс колунсө көбрег боко да петіс кыр йылө, Лена синъясысь ылөджык. Ыркөдчыны.

Асъядор сертиыс төлыс збоймыштөма, шондіс тшөкыджыка сайласис кымөръяс сайө. Вильшасис небыдик лун төв, быттьөкө ошйысис: вои пө, ме вои, ас бөрся гожөм кыска. Керкагөгөрсә боръясысь летіс муртса на мыччысыштөм тавося турунсө, быттьө дыр кежлө янсавлөм мам лелькуйтчис челядыскөд! Радлігтырйи жө шлопөдчис орчча керкадорса град йөрын кольөм вося полокалө соскөн. А кыр горулас зыксис ю. Гырысь, еджыд юра гыясөн швачөдчис-шыбласис берегас, сьоласис быгйөн, ки тырнас кватлаліс берегдорса изьяссө да лыасө, гудраліс ас пиас да, ырөшмөм бөрас, выльысь усыласис берегө. Быд зырөдлігөн шыблаліс берегас чагторъяс, кырсьяс, турун да катыдсянь вайөм быдсяма ёгсө. Берегдорса лыаас сатшкысьөмаөсь пыжъяс, өтияс векныдикөсь, кузьөсь, ёсь ныр-бөжаөсь, а мөдъяс дженьыдөсь да кызөсь, быттьө дундөмаөсь.

Пыжъяс дорө жө сатшкысьөма и катерныс.

Ю кузя сьөкыда кывтісны-катісны баржаа катеръяс. Мөдар берегас төлыс жмитөма турун пуръяөс. Пур вылас лилипутъяс кодьөсь кыкөн, тойласисны-тойласисны, водзө эз воны да домасисны берегас. Ю весьтын лэбалісны каляяс, бергалісны некутшөм төлктөг: то качласны вывлань, то тювгысьласны ва веркөсланьыс, көтөдыштасны кокъяснысө да бөрдөны-лимзөны, норасьөны код төдас код вылө.

Бытьё кодкё сыысь мыжа, мый налён весь-  
шөрö котасис кокныс.

Борис сулаліс кыр йылын, а пельясас век  
на кыліс нывлөн гажаа сералёмыс, и мыйлакё  
мырдён кытысянькё ылісянь матысмис и ма-  
тысмис да син водзас сувтіс Галя. Сійö, съод  
кудриа лөсьыдіник нылыс, кодкөд Борислы  
тшөктывлісны занимайтчыны математика кузя  
первой курсын велөдчигөн на. Ныв, синъяссö  
чөвтлытөг, кывзыліс сылысь велөдөмсö, но  
гөгөрволіс омөля. И Борислы ковмывліс не-  
кымын пөв висьтавлыны өтиторсö. А өтчид  
коркё Галя сетіс сылы тетрадь, кытчö вөлі  
гижалёма кывбурьяс: видзөдлы пö да вись-  
тав, артмисны эз. Борис босьтіс да медводдза  
кывбурсö лыддигөн на и гөгөрвоис, мыйся кыв-  
бурьяс тайö. Аслыспөлөсөсь, сэтшөмьяс,  
кодьяс, төдөмысь, чужисны рытьяснас пөдру-  
гаясысь гусьөн. Гижөдьясыс, гашкө, и абу  
тырвийö шогманаөсь форма боксянь, но на-  
лөн век жö мыйкö эм: найöс гижёма сьөлөм-  
сянь, радейтысь сьөлөмсянь. Тадзи Борис дорö  
шыөдчис медводдза радейтөм. Сэтшөма сэк  
сійö гижөдьясыс вөрзьөдісны сылысь сьөлөм-  
сö, сэтшөм виччысьтөмөсь и виччысянаөсь вө-  
ліны найö—зон эз төд, мый вөчны водзö. А мөд  
луннас, тетрадьсö сетігөн, артмис кызкө сі-  
дзи, мый пыр видзөдіс кок улас да шуаліс эз  
сійö кывъяссö, кодьяс бергалісны юрас, а  
нурбыльтіс вомгорулас: «Ме думысь, бурөсь,  
көть кытсюрö вежлавны на колö». Мый сэсся  
шуан бөбмөм бөрад, таысь кындзи? Бөрыннас  
нин, кор локтіс общежитиеö, тотшкөдіс жö  
эськө кулакнас аслас плешкө, да кывьясыд  
лэбзьөмаөсь, он, небось, бөр кут найöс! А Га-



ля видзёдліс сэк «критик» вылө, гөрдөдыштіс, лапйөдлыштіс кузь син лысьяснас, надзөник босьтіс пызан вылысь тетрадьсө да суйіс портфеляс. Дзик нинөм эз шу. А регыд мысти и велөдчөмысь дугдіс. Нывьяс висьталісны: мамыс пө кулөма да Галя мунөма ичөт чойыс дорө. Сідзи сэки Галя воши, саялі... Збыль өмөй Поповыскөд сёрнитысьыс вөлі Галя? Збыль өмөй сылысь гөлөссө кывліс? Галя жө вөлі Усть-Вымскөй районысь. Кызди татчө вермис веськавны? Абу. Эз вөв сійө Галя. Мөд. Оз, некыз оз вермы лоны. Этша өмөй му вылас өткодь гөлөсаыс? Прөстө кажитчис.

Неылын кыліс кутшөмкө шум. Керка дорын, көні квартируйтис завхоз Пётр Иванович, тыдалісны челядь. Найө ёна сералісны мый вылө кө, кодсюрө, тыдалө, весиг чеччалісны раднысла. На дінө матысмөм бөрын Борис аддзис: Пётр Иванович лажыньтчөма ошпи весьтө. Ошпиыс дурка тапьяліс кытш шөрын, ляскысьлас бок вылас, чеччас да мурзө Пётр Ивановичлөн дорысь неуна кызджык гөлөсөн. Дугдывтөг воө завхоз вылө. Пётр Иванович сетыштавлө сакар торьяс. Ошпи кажөдө да нюлө вом дорьяссө.

Детинкаяс пиысь өти перйис жө зепсьыс съодасьөм сакар тор, буракө, асывнас кольөдөма чай юигас. Сійө мыччөдліс ошпиы, сэсса кавшасис керка пельөсө. Ошпи пондыліс кайны детинка бөрся, но уси. Детинка мыччөдліс ешө өтчыд сакар торсө, пуктіс сійөс потөм кер пом вылө да бөр лэччис. Ошпи бара заводитліс кайны, кавшасьліс пельөс шөрвйөдзыс кымын, но мыйлакө неуна бөрыньтчис, сэсса шнөпкысис-уси. Челядьлы —

кынöманыс кутчысьмөн серам-теш. Медбöрын, тыдалö, ошпи скöрмис, мурöстис да ньöв моз кайис (кытчö сöмын дурклуныс воши!), кутлис босьтны сакарсö, но уськөдис да ачыс тшöтш чеччыштис сакар бöрсяыс. Доймöмысла никöстлис, но юмовтортö кажөдигөн дэйыс вүни.

Пётр Иванович сералис челядькөд тшöтш, весиг юрсö пыркөдис. Пистиөн висьлöмысь серössьöм мугов чужöмыс сералигас дзикөдз вежсис, кажитчис весиг мичаөн. Ус помъяссö гартигтыр сийö сулалис да, ошпиöс ышмөдөм могуь, горөдльвлис:

— Первой сорт «Б»!.. Муде-ерр!

Борис веськодя видзөдис тайö ставыс вылө, а ачыс думайтис Галя йылысь.

Рытланьыс кывсис, мый клубын пö лоас кино. Но тайö юöрыс эз збыльмы: киномеханикыс районысь абу локтöма, сёрмöма пароход вылө. Та вылө видзөдтөг клуб дорö йöз чукөрмöмаöсь унаөн. Сэни жö тыдалисны Пётр Иванович, Попов да Лена. Но Кузьма эз вöв матигөгöрын: öбед бöрын сийö мунлис челядькөд вуграсьны. Том йöз заводитлисны йöктыны, но гудöкасьысьыс эз сюр: öти олöма морт босьтчылис гудöкасьны, дживөдчыштис, но чуньясыс вөлöмаöсь кызджыкөсь — нинöм эз артмы, а прамöй гудöкасьысьыс пö абу на воöма удж вылысь.

Борис петис клубысь да пондис видзөдны волейболөн ворсысьяс вылө. Ворсисны сюся, и сийö неуна ылалыштис, эз казьявлы, кызди кодкө сувтис ськөд орччөн. Казьявны эськө казьявлис да пыдди эз пукты, чайтис Ленаöс. Весиг Леналы пыдди, ворсысьяс вылө видзөдигтыр, шыасис:

— Бура ворсö эсийö клетчатöй дөрöмаыс.

— Сийö мян разрядник.

«Миян пö», — шензьöмөн Борис бергöдчис орччөн сулалысьлань, и... чуймöмысла сибдис лов шыыс. Сöмын здук-мöд мысти зон янды-сигтыр паськыда нюмдис, а шуны сідзи нинöм эз и шу.

Кутшöм нин сэни волейбол! Ыджыдджыктор на вермас вунны, кор вот тадзи, виччысь-төг аддзан сийöс, код йылысь мөвпалöма вöлі уна лун и вой, кодöс лыддин нин век кежлö вошöмаөн да коді тöлысь вылысь моз усьö тэ дорö, турунвиж плаща, көсынkaa, лöсьыдник, муса и колана, да коді видзöдö тэ вылö сэтшöм синъясөн, мый нимкодъыдла окота сывйыштны му шарсö да ывла выв тырнас горöдны: «Шуда!.. Ме шуда-а!»

— Борис! — муртса кывмөн шуис ныв, и налөн вочаасисны киясныс. А кокъясныс воськовтісны асьныс да надзöникөн пондिसны нуны найöс йöзаинысь. Первойсö туй кузя, а сэсся луд вывті ю берег пöлöныс.

Клуб дорсянь на бөрся видзöдісны кык син. Видзöдісны дыр, кытчöдз эз саявны мунысьяс. Кодкө кө эськө матысяньджык видзöдліс тайö синьясас, завидьтöм кындзи, нинöм сэсся сэтысь эз аддзы.

Лыабöж коли бөрö. Джуджыд крут берег-ыслөн колясыс кусыньтіс вөрлань, а водзын заводитчисны видзьяс. Борис да Галя век на ньöжйöникөн мунісны водзö. Берегпöлөнса льöм пуяслөн да бадь пуяслөн гар пытшкысь муртса мыччысьыштöм коръясыс тшötш зі-лисны ошканаа видзöдлыны на вылö. Мукöд-латыс, ва босьтлöминьясті, вöлі на нильöг,

вилыд, и Борис гоз-модысь кутыштліс Галя-  
ос усьомысь. Галя нюмнас аттьоалис сійос.  
Сёрниыс кызкө эз пансыы: кыкнанныслы ка-  
житчис, быттьо сёрнитөг найо тодмалісны  
ота-мод йывсыныс ставсө, мый вөлі олөма-  
ныс бөръя куим вонас. Сөмын Лыабөжлань  
бөр бергөдчөм бөрын нин Борис слөймис  
юавны:

— Кыдзи ті татчө веськалінныд?

Зон эз төд, кызди шыасыны, та вөсна, бура-  
кө, и артмис «ті» вылас сёрнитөмыс. Нывлөн  
чужөмыс вежсыштис, лои серьезнөйджык.

— Техникумысь мунөм бөрын регыд чойос  
босьтисны детдомө. А ме ветлі Сыктывкарө,  
велөдчи. Во саяс нин уджала тані. Муна ог  
клубса зав вылө?— бөр гажмыштіс Галя.

— Мыйла нө он? Мунан!— шуис Борис да  
недыр чөв олыштөм бөрын содтіс:— Миян  
нывъяс частө казтьвлөны тэнө.

Дерт, сійө эз вермы шуны, мый Галяос  
өнджыкасө казтьвлөны оз коркөя пөдруга-  
ясыс, а сійө ачыс. Нывлөн өзйыштлісны синъ-  
ясыс:

— Нывъяс? Валя, Лиза... Көнөсь нин на-  
йө? Практика вылө жө мунісны?

— Кыкнанныс мунісны Уфаө.

— Ме мечтайтлі жө, да, тыдалө, абу сиө-  
ма,— ышловзис Галя, сэсса недыр мысти сод-  
тіс:— Кадыс эськө эм на да.

— Дерт,— шуис Борис, но нем виччысьтөг  
вуджис мөдторйө:— Пыжа кывтө...

Берег дортыс Лыабөжланьсянь збыльысь  
кывтіс пыжа. Луннас ышмывлөм төлыс му-  
дзөма, сөмын корсюрө слабиника-слабиника  
пушнитлывлө, лөсьөдчө, буракө, шойччыны.

Тельскөдчөны, кылө, ваас пелысьяс. Ылісянь на паныдаліс мунысьясөс Кузьмалөн гөлөсыс:  
— Кокъясныд кө мудзисны, пуксьөда, колөкө.

Сійө матыстіс пыжсө берег дорас, да шензьомысла вомыс лои шердын пасьта:

— Галя? Тэ нө кысь татчө усин?!

— Вай первой пуксьөд пыжад, а сэссия и юась.

— Вот дивөйд!— юрсө бергөдліс Кузьма.— Збыльысь важ йөз шулөмаөсь: гөра пө гөракөд оз паныдась, мортыд морткөд паныдасыны вермас. Ме адзылі тіянөс. Борисөс төді, а тэнө эг. Дай кызди нө ме кужи думыштны. Чайта, мися, со кутшөм сюсьөсь Лыабөжса нывьясыд, пыр и крукыштісны ертөс. Лоө, шуа, мездыны, кытчөдз дзыкөдз эз гусявны, а со, вөлөмкө, коді!..

Галя пуксис пыж шөрө. Кузьма кутчысис пелысө, а Борис йөткыштіс пыжсө берегысь да чечыштіс пыж нырас.

Юыс воляліс шыльыд, лөнь, көть чеччы пыжсьыс да котөрт. Сөмын көнсюрө, визувджык местаясын, ю пыдөссияныс гежөдика булькөдчис ваыс да кытшьясөн паськавлі веркөстіыс, тшыкөдліс шыльыдсө. Лэччысь шондіыс прөщайтчанаа нюмьяліс мөдар берегса вөрыслы. Васянь өвтіс ыркыдөн да кылыштіс чери сьөм дук. Юөн мыськөмысь кадысь-кадө берегыс ичөтикаөн буждаліс: му комөкыс ызгысяс ваас — быттө чери чеччышгас.

— О, «Матвей комьясыс» гыбалөны!— шыасис Кузьма.



— Мый, мый?— сылань бергөдчис Галя.

— Миян сиктын эм Матвей,— висьталіс Кузьма.— Қоркө өтчид, вуграсигөн, татшөм му ёкмыльясылысь бузгысьөмсө ком чеччыштөмөн чайтлөма.

Сэксянь быдөнлы, гырысьлы и поснили, төдса «Матвей комыд». Сиктад өд мыйкө аслысногджык кө лоө шуөма, сибдас бердад. Матвейыс пөрысьмис, а «Матвей комтө» пыр на казътывлөны.

Пыж тювис ва веркөсті, сёльөдчис пыж нырөн поткөдөм ваыс, небыдика тельснитавліс пелыс, эзысь молясөн киссисны рөмпөштан-ва веркөсө пелыс вылысь войтъяс. Қөнкө ю мөдарас көкис көк.

— О-о, воөмыд жө,— гоньгөдчис Кузьма да челядь моз шыасис лэбач дінө:— Көкөй-чойөй! Ичиньөй-ачиньөй! Узь-вөтась да висьтав, кымын во нин коли менам гөтрастьөдз.

Көк өти здук кежлө тшөкмунліс, сэсся заводитіс да, гашкө, ветымынысь помся көкыштіс.

Кузьмалөн ёртъясыс гажаа сералісны.

— Эк, Кузьма, муса другөй! Дыр на тайковмас виччысьны,— шуис Борис.

— Выжыв көк шөрө веськавсьөма,— рошнө жугыля ышловзигмоз качнитіс юрнас Кузьма.— А вот босьта да та бөрын регыд и гөтрася, сөмын вот техникум помала.

— Эн шогсы, Кузьма,— мигнитіс Галя, өти здук кежлө чөв ланьтліс, сэсся горөдіс сьывны:

Вечерком на реке  
Всякое бывает.

Борис да Кузьма ньөжйөнник отсасисны сылы. Ссыланкывйыс разалі ва кузяыс кывтыд и катыд, пырис мөдар берега вөр пуяс костас, кайис енэжлань том гөлөсьясөн. Кажитчис, быттьө тайө сыланкывйыс эз вөв важся, эз вөв кодөнкө лөсьөдөма, а чужис матигөгөрсә ывла выв вылас видзөдігөн. Чужис ачыс сьылігмозыс.

...Отчего, почему,  
что это такое?  
Сердцу нет моему  
на реке покоя...

Вермис лоны, и тайө кывъясыс вөліны асланыс местаын. А мый? Том йөз. Тулыс. Важся кывбурьяс... И збыльысь вермис лоны.

О, тулыс! Быд во тэ локтан аслад пөраө. Быд во тэ өткодь мыйөнкө и мыйөнкө абу өткодь. Ловзьөдән тэ унмовсьлөм ывла вывсө, гажмөдан, мичмөдан кыз-мый верман, став ловъясө тшөктан гажөдчыны, сывны, радейтны. Быдөнлы тэнад мыйкө дасьтөма. Вай жө висьтав, мый вайин тайө пыжөн гуляйтосьясыслы, сьылөмысь өтдор?

## 2

Лункост мысти Лыабөжө вайльвлісны почта. Кытөнкө ылі местаясын гижөм письмөяс да печатайтөм газетьяс лэблісны сынөдсө поткөдысь самолөтөн, гримөдлісны кашкигтырйи котөртись поездьясөн, и матысса карын найө веськавлісны пароход вылө. А Лыабөжөдз медбөрья туйсө мунлісны пыжөн,— пароходыс сувтльвліс ю мөдар берегас. Тайө пөрийө письмөяскөд да газетьяскөд тшөттш выльлунлы паныда войө почтальон вайис ми-

ча пальмаяса конверт, кытчө вөлі гижөма: «...районса Лыабөж сиктө. Отрядса начальник Леонид Семёнович Поповлы». А черта улас сулаліс: Ухта да ещө кутшөмкө чукульмукуль. Мукодьяскод тшөтш тайө письмөыс куйліс почта пызан вылын асылөдзыс. Кор йөзыс садьмалісны, письмө корсис сійөс, кодөс колө вөлі аддзыны гижөд сертиыс.

Но мортыс эз дзык пыр восьты конвертсө, бергөдлыштис письмөсө киас, шутөвтыштис нюммунигмоз да бөр чөвтис пызан вылас. Унджык йөзыс, кор пөлучитөны письмө либө кутшөмкө юөр, пыр жө зильөны төдмавны, мый гижсө письмөясас, а мыйла тайө мортыс косявтөг бөр пуктис письмөсө? Гашкө, повзис лөк юөрысь? А гашкө, волнуйтчис да лыддыны көсийс успокоитчыштөм бөрын?

Леонид Семёнович воськовтис өшиньлань да кыкис зепсыс куритчансө. Рацияысь кыліс негора музыка, и Леонид Семёновичлөн вөлі сьөлөм вылас лөсьыд, сійө весиг тапкөдіс кок лапанас джоджас музыка тактыясас. Тшын көлачыяс өти бөрся мөд пондісны гөгыльтчыны өшинь стеклөлань, зурасялісны сэтчө и пасьмуналісны. Сідзкө, Бирюковлөн гижөдыс. Начальство помнитө, велөдө, көнкө, кыдзи бурджыка нуөдны удж, мый сійө сэссия гижас. Водзвыв позьө төдны, мый йылысь сэні, велөдө, дерт, сідз да тадз сәті да эсті вөч, быттьө первой сезон Леонид Семёновичлы таво уджавны, медым сытөг некутшөм инициатива эз вөв. Татшөм письмөястө, дерт, сэссия абу ёна окота лыддыны. Ухтасянь, төдөмысь, веськөдлыны позьө. Леонид Семёновичлы уси дум вылас Пётр Ивановичлөн

висьтыс сы йылысь, кызди ӧти заводса директор вӧлӧм уджнас Сочисянь веськӧдлӧ, да нюмдыштліс. Ухта кӧть и абу Сочи, и Бирюковӧс некыз оз позь ӧтлаӧдны сійӧ директорыскӧд, но письмӧ... Индавны — бур делӧ. Со и Бойко тшӧтш грамотнойджык лои, зільӧ мортыс, и индӧдъяс нин корсюрӧ тӧлкӧвӧя кужӧ сетны: вот опорной сеть нуӧдӧм кузя сійӧ думыштлӧма да висьталіс, кызди ӧдйӧджык уджсӧ эштӧдны да медся выгӧднӧя, весиг Леонид Семёновичлы завидь вӧлі. Быдмӧ мортыс, быдмӧ, тожӧ начальстволань матӧджык. Веськыда кӧ шуны, номсӧ эськӧ этшаджык на вердіс да, кык сезоннад уна-ӧ удитан? А Бирюковлы Бойко сьӧлӧм сертиыс. А Леонид Семёновичлы?

Леонид Семёнович эз помавлы ни институт, ни техникум. Кӧкъямыс класс бӧрӧн уджыштліс лесопунктын да стрӧитчан материалъяс вӧчан заводын. А во вит сайын веськаліс геофизической трестӧ да велӧдчис гравиметристъясӧс дасьтан курсъяс вылын. Уджалис операторӧн во и бара велӧдчис курсъяс вылын да лои отрядса начальникӧн. Сійӧ зілис уджавны, уджавны сідзи, медым кыздымй позьӧ ӧдйӧджык да вынаджыкӧс лӧсьӧдны авторитет, кызди шульвліс аслыс. Кодкӧ пӧ вежӧра морт шульвлӧма: лӧсьӧдан кӧ пӧ аслад удж вылын первойя воясас авторитет, бӧрӧя кадсӧ авторитетыд тэ пыдди пондас уджавны. Да, эз сюр сылы велӧдчыны, Бойко жӧ со техникум помалӧма, кӧть чужӧм сертиыс тӧдчӧ, мый абу жӧ ӧна шыльӧдӧма олӧмыс сійӧс. Но кӧть Бойко и диплома, том специалист, сійӧс пыр на ковмывлӧ велӧдыштны

кытсюрö Леонид Семёновичлы. А велöдан — сідзкö унджык тöдан. Но и Леонид Семёнович нин корсюрö думыштлывлö, мый регыд велöднысö нинöмö лоö, а Бойко кутас сійöс велöдны, со тай опорной сеть кузяыд индіс нин бурджыктор.

Сійö восьтыштліс öшиньсö да печиктіс папироссö ывлаас. Бергöдчис, матыстчис пызанлань да восьтіс письмösö. Коркö öд колö жö лыддыны.

«Леонид Семёнович!— гижис Бирюков.— Усть-Усаö мунігөн ме ог вермы сувтлыны ті дорö, да и ті сэк и асьныд лоанныд вöрын, ог су, та вöсна тайö письмöнас висьтала со мый. Бөръя лунъясö ми геологъяскöд выльысь видлалім материалъяс тіян удж нуöдан участок кузя да шуим уджсö нуöдны сöмын юлөн шуйгаладор берегын. Геологъяс ошкисны тайö плансö: сетас кө пö уджыс кутшöмкö резуль-тат, вермам арнас нин сувтöдны сэтчö бурöвöй. Воськыдладор берегса участок йывсьыс сложнойджык на мөвпавнысö тölöдзыс, а öд асьныд тöданныд, колö нефть, и быд лун, быд час дона. Воськыдладор берегса участоксö шуим кольны тöv кежлас: сэнi гырысь нюръяс, да тіян вермасны лоны виччысьтöм и ковтöм сьökыдлунъяс. Кор нюръясыс кынмасны, ме думысь...»

«Тэ думысь!»— нурбыльтіс Леонид Семёнович и, вомгорулас тайö «тэ думысь» кывъяс-сö разной ладөн сылігтыр, паськөдіс пызан вылö участоклысь картасö. Ставыс сюрс да кыксё квадратной километр. Абу участок, а дзoнь государство. И юяс, и тыяс, и мый мед-ся лёкыс да страшнойыс,— нюръяс. Помтöм



нюръяс, торъя нин веськыдладор берегса участокын. Ок и мудруйтанныд жö тi, Василий Петрович, геологъясыдкöд сэнi, ок и мудруйтанныд. Нинöм он шу, кужанныд. А тани сэссия тiян письмö вылын пукав да артав, кыдзи да мый, кор ставсö нин сэтшöм лöсьыда вöли планируйтöма: вежлав выгöднöя маршрутъяс да кушты юртö. Мыйöн бара проектсö гижигас мөвпалінныд-а? Тöлысь помас, дерт, ачыл жö пондан первой корны план тыртöм? А-а, но вот. А кодi лэдзас торкны проектсö? Сийöс жö утвердитöма! Проект аснырөн торкöмысь судитöны. Но, шуам, проект вермасны дырөн вежны, арланьыс ли кор ли. А оз кö утвердитны? Этша öмöй кодлыкö юрас волö быдторйыс?

Леснид Семёнович бөр пунктiс письмösö пызан вылас да пöкаживайтыштіс комнататыс, сэссия бара сувтіс пызан дорас. Письмö. Почта. А эз кö во письмöыс, сэки кыдзи? Важ ногыс коли, проект серти. Этшаысь öмöй письмöясыд вошлöны. Вермис, шуам, почта вайигас мыйкö лоны. Сиктас тай сёрнитöны, неважөн на пö вуджигас почта тыра пыж путкыльтчöма... А Бирюков повзöма нюръясысь, пыр сылы мыйкö кажитчö, пöрысь пöчлы моз! Мый кöть и нюръяс, абу жö öд помся ставыс нюр. Сьöкыд, дерт, сёрни абу, но весиг бурджык тайö, кокныд участок дорысь: студентъяс тöдмаласны, кутшöм сьöкыдлунъяс овлöны уджалігөн, зато бöрыннас сьöкыдсыс озджык кутны повны. Прöстö оз öд шулывлыны: шылыд туйöд мунигад мортö он во. Ставыс тайö сідз, но... Эк, коліс жö воны тайö письмöыслы талун, отряд мунтöдзі!..

Студентъяс. Нывка на пиын эм, оз ло кокни сылы вöрад. Позьö, дерт, кольöдны сийöс татчö, но мый сийö кутас вöчны? Ладнö, мед ветлас, оз кö кут вермыны, Бойко мед рация пыр висьталас да вертолёт позяс Усть-Усаысь корлыны. А на пиысь эсийö Нестеровыс сюсь, буракö. Тöрыт синма-ныра костысь Галяöс нуис кытчöкö. Öдийö нывьясыскöд кужö тöдмасьнысö. И Галя аслысьяма жö: тöрытöдз рыгьяссö öтлаын колльöдисны, пыр сёрни да басни, ставыс бур вöлі, и друг тöдтöм зонкöд мунис. Мый сэтшöмсö аддзис тайö Нестеровыслысь? Но нинöм, Галечка, ми ладмывлам на, Нестеров öд вөрö муно, а начальниклы абу быть пыр жö чепöсийны на бöрся.

Та йылысь думыштигөн Леонид Семёновичлы быдсөн лöсьыдджык лои сьölöм вылас. А мый нö? Некымын лун кежлö позяс кольчывны. Бойко кужö нуöдны уджсö. А Леонид Семёнович вермас бöрынджык и вертолётөн на коланинö мунны. Тайö весиг бур, инициативаыс том йöзлөн асланыс кийн лöö, Бойко велöдчас, кызди бурджыка уджсö нуöдны: кор öд ас вылад усьö, юрид уджалö яснöйджыка. Сийö весиг дөвöльнöя ниртыштис воча ки.

Кöть Леонид Семёновичлөн Ухта карын вöлі рöдня — Полина Яковлевна нима нывбаба да посныдикъяс: Вова да Альбина, кодъяслөн чужöм йылысь свидетельствоаныс сулаліс «Леонидович» да «Леонидовна», найö эз мешайтлыны сылы гажöдчыштни бокрын. Коді нö абу грека? Кодкö тай шулöма: том дырйид пö и гажöдчы. А комын кык арöснад öд

мортыд абу на пöрысь. Ухтасянь Лыабöжылын, бокын, оз кывсьы нинöм. Полевöй сезон кузь, öткөннад гажтöм. А Галя со шогмана нывка, мичаник. Сійö ачыс тожö, буракö, кажитчö Галялы. Мый нö сэсья колö? Арöдыс позяс. А арнас? Арнас тон тыдовтчас, мый öнi гадайтнысö. Но, а Нестеровыс? А мый сылы Нестеровыс? Öтторъя кутис юрас воны. Мед олö-вылö да уджалö, велöдчö.

Пырис Бойко. Сійö вöли плаща, резиновöй сапöгыслысь кузь гöленьсö пуджöма. Тыдалö, пасьтасьöма нин туйö петигкежлö.

— А-а, Иван Григорьевич,— нюммунис Леонид Семёнович да кинас индиc пызанлань.— Вай пуксьыв пызан дорас. Сёрнитыштам мунтöдзыд. Колö жö вöли мыйсюрö висьтавыны-а. Ме öнi тiянкöд мунны ог вермы. Бирюков...— сійö муртса эз шу письмö воём йылысь. Кинас вевттис пызан вылас куйлысь письмösö, сэсья корсис стрöка, кор Бойко эз видзöд, да суйыштити тетрадь костö да содити,— кösйöкодь вöли кежавлыны да. Но, ставыс дась тiян?

— Да.— Бойко матыстчис пызанлань да паськöдиc участоклысь кусыньтöмөн куйлысь картасö.— Ме вот сöмын öтитор кösья юавны нöшта, Леонид Семёнович. Со мян участокным. Тайö ю веськыдладор берегас нюръяс. Шуйгаладор берегыс косджык. Вöчны кö уджсö первой шуйгаладор берегса участок вывсьыс? Пока гожöм? Веськыдладор берегса участоксö позис эськö вöчны тöвнас, кор нюръясыс кынмасны. Öнiя серти кык пöв кокныдджыка да öдйöджык позяс сэки, экономия лоас вель ыджыд.

Бойколөн сөстөм видзөдласыс быттьо сотыш-  
тіс Леонид Семёновичос. Кыз нө мый? Бирю-  
ков сідз жө гижө. Эз-ө лыдды Бойкоыс пись-  
мөсө? Эз, мортыс абу сэтшөм, да и некор вөлі  
лыддынысө. Откодь думъяс! А гашкө, трест-  
ысь мунтөдз на сёрниыс вөлі, но сыөдз прөстө  
эз кывсы? Код төдас? Леонид Семёновичлөн  
чужөм вылас бара артмис небыдик лышкыд  
нюм, и сійө ичөтөс моз заводитіс кияснас тап-  
көдны Бойколы пельпомас.

— Но, другө, тэ, вөлөмкө, мечтайтесь  
морт, кыз шуласны, рационализатор. Бур-  
тор висьталан, төда. Ме тожө нин та йылысь  
асывсянныс думайті пыр на. Но эм проекг,  
көні гижөма — шуөма, кыззи уджавны, кор  
да кутшөм местаын. И ни тэныд, ни меным сі-  
йөс не вежны. А өні кө татшөмторнад мунан  
Ухтаө, управляющөй вөтлас да ещө и шуас:  
водзын пө кытчө видзөдінныд? Гожөмыс ко-  
льө. А сэссия юаласны план. Көні нө пө, ёртъ-  
ясөй, уджныд? Мый сэки шуны? Төв кежлө  
пө колим?

— Но уджсө өд вөчам, весь овны ог кутөй.  
Некутшөм проект вежны оз ков, сөмын мар-  
шрутъяслысь сеткасө вежлалыштны ковмас,—  
новлөдліс нин чуньсө карта кузя Бойко.— Сө-  
мын косджык участоксө өні эштөдам, а нюръ-  
яссө бөрынджык, и став уджсө лоө вөчөма.  
Таысь жө нинөм оз вежсы.

— Сійө и эм, мый вежсө. Маршрутъяслысь  
пөрадксө утвердитөма, сы серти быд төлысь  
кежлө план сетөны. Толькө ми сідз думай-  
там, мый оз. А первой төлысь бөрын жө и ты-  
довтчас. Сэссия мөдтор...— төдөмөн ылөдөмыс-  
ла тшөкмуніс Попов—... гырысь йөз, колөкө,

млян бõрысь пыр нин буритны шуисны?! Ме  
ог лысьт босьтны ас вылõ сэтшõм ответствен-  
ность, зонмõ,— Леонид Семёнович лõннышт-  
лис здук кежлõ, сэсся нарошнõ гусьõнджык,  
быттõ кодкõ вõли ещõ наысь кындзи,  
юалис:— Гашкõ, польштан?

— Мый тi,— Бойколõн кузь гõрдов син-  
кымъясыс кайисны вывлань да чуймõмõн сув-  
тисны.

— Да тайõ ме сiдз,— Леонид Семёнович,  
медым кызкõ вуштыны водзын шуõмторсõ,  
тэрмасьõмõн содтiс:— Прамõй йõз õмõй тõ-  
дõны полõм?! Сiдз õд?

Бойко тубыртiс картасõ, нинõм эз вочавидз,  
мыйкõ мõвпалис. Сылы, тыдалõ, эз кажитчы-  
ны Поповлõн кывъясыс.

Õдзõсõд тõрõдчис Пётр Иванович да, кы-  
мõссõ носõвõйõн чышкалигтыр, висьталiс:

— Катер, кыз шуласны, дась тiянõс ву-  
джõдны Печора вомõн.

— Но ладнõ,— Попов нюжõдiс кисõ Бой-  
колы.— Бур туй. Бура уджавны. Радиосвязь  
кутам нуõдны рыт и асыв, õкмыс часын.

— Нõшта õтитор. Со мый: вертолёт мед  
шыбитас сёянсõ 256-õд пикет дорõ, асланыд  
кõ оз ло локтõмныд сёки, а оз 189-õд дорõ,  
кызди ми шулим водзын. 256-õдзыс тырмасны  
млян аскõдным босьтõм прõдуктаяс. Сэсся  
позяс эштõдны участоксõ. Ме эськõ Пётр  
Ивановичлы шуа нин вõли та йылысь да,—  
Бойко воськовтiс õдзõслань.

— Да, студентъяс мед тшõтш уджаласны  
приборõн, велõдчасны. Висьтав налы: Бирю-  
ков юасыны кутас да и ме кута отчётнысõ  
прõверяйтны. Видзõд на бõрся.

Леонид Семёнович коли отнас. Ошине пыр недыр тыдалісны Пётр Ивановичлөн да Бойколөн мышъясныс и саяліны кыр горув. Веглыны колльодны? Но од сэні Пётр Иванович. Мый ковмас, сійо ставсө сетас, төдө. Колльодас. Сійо нюждочис стен бокө сувтөдөм походной кровать вылө. Кажитчө, ставыс бур. Но недыр куйлыштөм мысти чеччис кроватьысь, петіс керкаысь да веськөдчис ю береглань жө. Кор сійо воис кыр йылө, катер вөлі вөрзөдчөма нин, и Леонид Семёнович өвтчыштіс мунысьяслы шляпанас.

### 3

Войвывса поводдяд зэв ылөдчысь. Видзөдан да асывнас мича, шонид, пөльтө небыдик лун төв. Сэсся друг мыйкө думыштас да, төлыс шуркнитас-бергөдчас. Кватитчан да, вөлөмкө, войвывсянь нин швучкө. Матын, вывті матын кылө вой саридз аслас йи пластьяснас. Вой төлыс вермө лун төвсө, мича сөстөм кельыдлөз енэжсө вевтгьоны лөзовруд везъясьсөм кунөръяс, и заводитө пызыны, көдзө то катшашыдөс, то гырысь ва лым чиръяс.

Мунан лунся асылө эськө ыркыдкодь нин вөлі, но сэк нинөм на эз позь шуны поводдя торксьөм йылысь. А лун шөрсянь кымын и заводитіс шөтны ва лым. Ывлаын июнь төлысь шөр, а көдзыдыс век на оз көсйы сетчыны. Выныс эськө прамөя жө нин бырөма да: лымйыс усигмозыс жө и сылө.

Ю вомөн катерөн вуджөм бөрын отряд муніс геодезистьясөң дасьтөм профиль кузя.

Тайо вöли векныдик прöсек, сöмын сылөн визыс эз вунды вöрсö пуяс йывсянныс да муодзыс, кыдзи овльвлö прамой прöсекьясын, а тöдчис горувтыс: топографьяс уджалöмаось тöвнас да кералöмаось сöмын улыс увьяссö, экономия ради. Эрдьяс вывсянь вöрö пыригөн Борислы кажитчывлис, мый найо пырöны кутшöмкö розьö, тоннельö, кöни пемыдджык да кöни быд пу сайын кыйöдчöны зверьяс. Розь помас ылын водзын тыдалö югөр. Югөр усянинас — эрд либö вöрыс гежөдджык.

Мунысьяс кок улын туплясисны кералöм лысьяс, понöльяс, паныдасьлисны йöзөн да тöлөн пöрлөдлөм пуяс. Корсюрö пель поткөдмөн лыйлывлис тальыштöм кос ув, сюсьмөдлис кокьяснысö матысса пуяс вылын ворсысь урьяслысь, кодьяс садь бырмöныс повзöмысла чирзигтырйи кайлисны пу туганьясöдз да увьяс косттыс кыйкьялисны йöз ылыстытöдз, зилисны тöдмавны, кутшöм ловья ловьяс торкисны налысь сөйöм-юөмсö да ворсöм-гажөдчөмсö. Мукөд дырйи кодлөнкө кызöктöмысь шпоркнитлисны дзор козьяс улын пуртикасьысь тар либö сөла, шызьöдлисны матигөгөрсö борд шынаныс. Вежласис и вөрлөн сёрниыс: вöляысь шувгисны козьяс да пожöмьяс, кекеначасисны потöм гарьяса увьяснас пипуяс да кыдзьяс, сьылисны-шутьялисны кос пуяслөн увьясыс, жугыля ойзисны-дзуртисны вожöсь да кернöга пуяс.

Кöть вöрыс быдмöма и тшöкыда, но слякөть писькөдчис и сы пыр. Увьяс косттыс муодзыс воалисны лым чирьяс да сылисны сэни. Понöльяс вылын югьялис лысва. Төдлытөг кө ин-

модчан нао, койыштас-пызйыштас чужомад и колуй вылад тшотш содз тырнас. Котодо. Чорзёны плащяс, пидзёсьясодз йиджю ва.

Отряд муніс шоркодъ одон, нель-вит верстон час. Быд мортлон мышку саяс вөлі килограмм кызь вита ноп, коні куйліс сёян, доздук да мукод полос колантор: табак, папирос, истог, книга. Таысь кындзи, вөлі оти палатка, ичотик батарейной радиостанция, код отсөгон найо вермисны сёрнитны базакод, да оти гравиметр, коді футлярнас веситіс дас килограмм гогор.

Гырысь пу лапъяс костті югыдыс пырис слабджыка, да мунысьяслы лои вель рөмыд. Борис муніс коймод мортон, зілис восьлавны ровнёя, Лена кок туйо. Медводзын туйсо пискөдіс Бойко, гордов юрсиа спокойной морт. Сийо пищала. Гөлөсыс сылон небыдик, вөсни. Синьястө кө кунян да модан кывзыны, омөля и торъялө ныв гөлөсысь. Борис мөвпыштіс весиг, мый Бойко, колө чайтны, кужо сывны. Туйсо каттис Кузьма. Ичот дырйиыс висълөм понда Кузьма неуна чотыштіс и сылы, тыдалө, сьокыд вөлі мунны котасьом вильыд му вывті: тыра нопыс шыблөдлө отарө-модарө. Мышкыс вазис пытшсянныс и ортсыянныс, шапка увсьяс войталө пөсьяс, лолавсьо сьокыда, но Кузьма оз кольчы мукодъясысь: оти воськов кө колян, сэсся колян нин. Сидзкө, весиг оти воськовсө оз позь кольчыны!

Быд километр бөрын найо сувтлісны геодезистьясон сувтөдом пикет-сюръя дорө. Бойко лөсьөдліс приборсө да гижавліс сылысь висълөмсө дась графаяса кыз тетрадьо. Личавлөны недыр кежлө сьокыд нопъяслон волысь-



ясыс, мезмывлёны пельпомъяс, он кёсйы, да пуксыссьё пёрём пуяс вылө, мыръяс вылө. Бойко бёрын мерайталёны өчередьөн ставныс. Прөйдитас минут дас вит, и отряд бара вөсылалө водзө.

Джуджыд вёра рас помасис да лои югыджык. Лапъя козъяс да пипу сора кыддза вөр вочасөн вежсис посныдик пожөмъясөн да козъясөн. Небыд перина кодъ кузь нитшкыс вазис ёнджыка, заводитіс больскакывны кок улын.

Борис муніс кутшөмкө интересөн и неуна полігтырйи. Дерт, тайө абу нин первойя практика. Вөвліны учебно-производственнойя практикаяс геодезия кузя, общөй геология кузя. Но найө прөйдитісны Ухтасянь неылын и прөйдитісны кокниа. А тані настөщөй вёрын, төдтөминын и абу нин практика, а удж — эм мыйысь төждысьны. Сійө ичөтысянныс радейтіс рөднөй вөр-васө, и коть өні вөлі ылын чужанінсянныс, Эжва йывсянь, окота вөлі видзөдлыны татчөс местаяссө, лолавны төдтөм вөрса сынөднас, төдмасьны войвывса вөрыскөд, ывсавны сійөс гөртладорсаыскөд, а медся главнөйыс — төдмасьны матісяньджык уджыскөд, уджалан условиеяскөд, гашкө, тшөтш, ковмас кө и сьөкыдлунъяскөд: өд регыд сылы Кузьмакөд, Ленакөд и мукөд ёртъясыскөд ковмас крепыда сувтны тайө пөтшва вылас.

Но кор сувтыштлөм бёрын котасьөм паськөм көдзыда инмө яй бердө, таысь кезйөдлө, босьтө йирмөг, а ноп өтарө личкө муланьыс да шыблөдлө бокыв, ноп волысьясыс вундөны пельпэмъяс и кольмөдөны юр, и быд вөськов шедө сьөкыда, то позьө эскыны, мый тайө

окотаыс вермас кытчөкө ылысмывлыны, а код-  
сюрөлөн и дзыкөдз бырны. Сійөс бытгы  
ылыстө мудзөмыс, а мудзөмыскөд тшөтш и  
морөсын кыптысь код төдас кутшөм чувство,  
дөзмөм ли мый ли. Велавтөгьд Борис прамөя  
нин мудзие: сійө өні муніс медбөрын. Ноп-  
сьыс өтдор нуис палатка. Кокъясыс, кажитчө,  
асьныс зільоны кусынытчыны, окота водны  
веськыда ва му вылас да куйлыны вөрзөд-  
чывтөг. Сійө эз нин любуйтчы вөрнас, эз нин  
чатрась боквыв,— өні пуясыс вөрас ставыс ка-  
житчисны өткодьөсь, урөсөсь, шуштөмөсь,—  
а видзөдіс муө, Кузьмалөн резинөвөй са-  
пөгъяс вылө да лыддис воськовъяссө. Му-  
нөны, мунөны кытчөкө и кор помасяс тайө  
мунөмыс? Кор помасяс тайө сьөкыд туйыс?  
Эз тадзи сійө чайтлы практика колльөдны.  
Өд ыстөны вөлі Уфаө мунны, а сійө мырдөн  
татчө вөзйысис: ас чужан му төдмавны. Бура  
тадзитө төдмалан! Сэні, көнкө, машинаяс вы-  
лын ветлөны, а тані важ пөльяс моз уджалө-  
ны и өнія кадө, кор нин быдлаын техника!  
Оз өмөй и тані позь тракторөн либө верто-  
лөтөн уджсө вөчны?! Некод эз, гашкө, и мөв-  
пыштлы та йылысь да? Эськө проектъяс  
гижысьяссө кө ноппөдлан, пыр жө вежсяс,  
көнкө, да... Бойко со водзө петөма и шавкйө  
да шавкйө. Эз өмөй на мудз сійө? А, дерт,  
көнкө эз —сылөн жө сөмын сөян тыра ноп  
да ичөтик рация. Весиг бөрө гежөда видзөдлө,  
а Кузьма да Лена тожө нин кокъяснысө өдва  
кыскөны. Көні бара думайтө узьмөдчыны?  
Ачыс крепыд и найөс ас кодынас жө чайтө!  
Абу өд көртысьсөсь! Көть нин мед нывсө жа-  
литыштіс!

Борис дась нин вöлі шуны, мый талун кеж-  
лö тырмас, гашкö, но сэк жö, пөрöм пу вомөн  
воськовтігас, крукасис и тювгысис. Чужöмыс  
парснитчис увйö. Видліс парснитчöминсö да  
кисыс аддзис вир. И сэк нин морöсас чукөр-  
мöm дöзмöмыс, Бойко вылö думнас броткöмыс  
чепöсйисны ортсö:

— А-а! Эм кöть абу тайö ставыс! Мунам да  
мунам — регыд нюжöдам кокъяснымöс, пом-  
ыс абу! Кыдз кужанныд, а ме сэсса водзö  
весиг воськов ог мун! Тырмас! Пöті! Кольöй,  
колökö!— Сійö эз весиг чеччы, а пуксис сö-  
мын да заводитіс мездысьны нопсыс.

Сылөн горзöмыс вöлі сэтшöм виччысьтöм и  
эз сразу во водзын мунысьяс вежөрöдз. Найö  
вöчисны на некымын воськов и сöмын сэки  
сувтисны да бергöдчисны бөрланьö. И здук  
мында сулалыштöм мысти косісны сылань.

Кузьма öдва сулаліс кок йылас, но гөлöсыс  
вöлöма важкодъыс на:

— Но? Тэ нö сідзкö аминь-кымынь-гатш-  
пук? А лöсьыда тайö тэнад артмöма, быттьö  
заказ серти, небыд нитш вылö. Татшöминсьыд  
дыш и чеччыны. Ме кö эськö уси, эг жö чеччы.  
Вай век жö чеччыв да выльысь петкöдлы,  
сэсса ме тэ бөрся сідзи жö пробуйтла. А то  
завидь лои...

— Да ланьт тэ!— макнитіс сы вылö кинас  
Борис и, бокö видзöдліг, шымыртіс небыд  
нитшсö, нетшыштыштіс да шыбитіс кок-  
ланьыс.

— Борис, а тэ, гашкö, висян?— Леналөн  
гөлöсас кыліс тöждысьöм. Сійö копыртчыш-  
тöмөн зілис видзöдлыны Борис чужöмö.— Да  
тэнад жö вир петö! Мый лои, Борис?!— и

тэрмасьомөн кутіс мездьсыны нопсьыс, быттьо абу и мудзлёма.— Час ме көртала, кытчөкө нопись бинт сюйлі. А сувтнытө верман? Қокыд эз вөрзьи?

— Эз. Ерунда, нинөм оз ков,— небыдджыка нин шуыштис Борис и синкым увтыс видзөдліс неылын сулалысь Бойко вылө.

— Правильнө,— шыасис Кузьма,— гөтрасьтөдзыс бурдас. Борис, тэ висьтав, мый ошкөд вермасинныд, сэки любөй ныв смел морт саяд мунас, и шрамтө, коляс кө чужөм вылад, озджык кутны йөзыс аддзыны.

— Да тэ дугдан он?!— горөдіс Борис и бара видзөдліс Бойко вылө. Сійө видзөдлас бөрся вөтчисны Кузьмалөн и Леналөн видзөдласьясныс.

Бойко лэдзис синьяссө муланьыс, сэсся недыр мысти бөр кыпөдіс да нюмъевтіс:

— А сідзи и эм. Тырмас талун кежлө. Думайта нин вөлі узянін корсьөм йылысь, косджыкинө воөдча. Но тані тожө позяс, со эстөні, буракө, местаыс шогмана и, кажитчө, ёль неуна водзынджык эм,— индіс сійө неыджыд кушинлань.

И ставныс кыдзкө лолыштисны кокныдджыка.

Первой лун мунөм бөрын бөрө коли дас көкьямыс километр. Дзөнь дас көкьямыс! И сөмын на дас көкьямыс. А водзын кымын? Думыштныыд полан. Но важ йөз шульвлөмаось: синмыд повзяс, а кидь вөчас. Гашкө, и тані сідз жө позьө шуны: мөвпнад он судз, а кокьясыд мунасны?

Но Борис эз көсийи мөвпавны та йылысь, косджык места корсьөм бөрын сійө зілис пес-

тыны бипур. Котасьом увъяс эз косьыны ломзыны, да неылын откөн сулалысь дзор козлысь рой тошсьыс нетшыштис кымынкө прать. Подулас абу на удитома котасьнысө. Би надзөник ломзис. Бипурсянь нель-вит воськов сайө Бойко, Кузьма да Лена зэвтисны палатка. Кузьма эз вермы чөв овны. Нопсө пөрччөм бөрын сийө балагуритис, тыдалө, тэрмасис ректыны кузь лун чөжөн чукөрмөм сёрнисө.

— Кок тыр ва, вөвлы юмөн чукөрмөма,— нето аслыс, нето ёртъясылы висьталис сийө, сэсся шыасис би пестысь динө:— Борис! Мыйкө тай нө биыд велавтөм каньпи моз өдва нёнясьсө.

— Велалас,— нурбыльтис Борис, а Кузьма, кажитчө, вунөдис нин сы йылысь, водзө сёрнитис:

— Но вот и узьмөдчанін. Дворец, а абу палатка. Оні эськө зелляторйыд кө шонтысьыштнытө! Эк, ыджыд өшыбка лои: вунөді босьтны Лыабөжын! Да коді нө чайтис, мый лоас таштөм поводдя? Шонтысьыштөм бөрад эськө вод да узь — шкоргы и вөтась, мый окотаыд, оз ков весиг бипур.— Сийө пөрччис фуфайкасө, босьтис кыкнан киас фуфайкалысь веськыд сос помсө да Пётр Ивановичлөн кодь гөлөсөн заводитис:— Чолөм жө тэныд, няйтөн резсьөм, слякөтьөн да зэрөн мыскалөм, чигаркаясысь розьөссьөм быдтор терпितысьлы, геологьяслөн да геофизикьяслөн медся бур друглы! Вай жө төдмасям. Ме — Кузьма. Давай другасьны талунсянь! Первой ме тэнө косьтышта, а сэсся тэ менө чөскыда узытөд.

— Дугдыштлін көть эськө кывтө песны,—

Борис перйис нопсыс да чургөдіс Кузьмалы консерв банка.— На восьт, а ме ёляс вала лэччыла.

Кор Борис бөр локтіс ва тыра пөртйөн, Кузьма, Лена да Бойко пукалісны бипур дорө пуктөм краж вылын да косьтысисны. Лым дугдіс усьны, и вылісяньыс эз нин көтөд. Фу-файкасө би водзын кутігмоз Кузьма бара нин сёрнитіс:

— Ме көсйи пырны сельскохозяйственнөйө. Школаын велөдчигөн менам вөлі друг. Сійө и шуө: мунам пө. А меным көть кытчө — весь-кодь. Мунам, шуа. Аскинас газетысь аддзи горнөй техникумлысь объявление да думышт-чи: мунны кө горнөйө? Быдсяма специаль-ностья йөзыс өд колөны. Вот ёртөй мунө сель-скохозяйственнөйө, а ме кө тшөтш муна — лоас кык агроном. Кык агроном, но ни өти горняк оз ло. Тадзи, мися, оз позь. Мед лоас и сэн, и тан. Сідзи и вөчи. А ёртөй дөзмис, весиг письмөяс оз гижлы. Мунігөн шуис, абу пө ме вөляя морт. Гашкө и сідз, но ме ог катчы горнөйө мунөмысь. Ещө со геофизикөн на көсья лоны. Каникулъяс дырйи аддзысь-ывлам вөлі да менө «ном самөн» да «вутш лыддысьөн» нимтыліс. Збыльысь өмөй заводитлыны вутшъяссө лыддыны. Мыйта чу-көрмас, сылы письмөын тижал... Борис! Вот ми уджалам төлысь-мөд, нажөвитам паськыд мешөк тыр деньга,— шмонитіс Кузьма,— кыт-чө мөдам воштыны?

Борислы неокота вөлі сёрнитны, но Кузьма-көд чөв овны сьөкыд.

— Мый нө тэныд друг тайө дум вылад уси?— Борис сутшкис би весьтө кык мөтыр,

өшөдіс пөрт да чайник.— Часі ньоба.

— А Лена, тэ, дерт, көнкө, платтё ньобан? Да?

— Но мый көть и платтё, — пышйис воча кывсьыс Лена.

— Вот ті төданныд нин, а ме век на эг куж думыштны. Ог кө костюм ньоб. Мед эськө аслыспөлөс вөлі,— би югөрыс югьяліс Кузьмалөн пуктөм пиньясас.— Стегляннөйөс кө нин-а? Озджык киссьы...

— Кутшөмөс?— эз гөгөрво Бойко.

— Тайө сідз, шутита. Стегляннөй костюм ньобалысьясөн пьянникъясөс шуоны.

Лишнөй дыр сёрнитысь Кузьмаөс торкис Лена. Сійө пукаліс биланьыс копыртчыштөмөн, кинас гартіс көса помьяссө. Видзөдіс билөн ворсөм вылө, быттьө лыддис, корсяліс сэтысь да висьталіс лыддьөмторсө.

— Кузьма көсьытөгыс веськаләма геофизикө велөдчыны, а ме ичөтысянь мечтайті лоны геологөн. Миян школаын вөлі учитель, Иван Васильевич, география велөдліс. Сійө урокьяс вылын век вөвлі интереснө. Помнита, өтчыл сійө мянөс төдмөдіс изьясөн, школаса коллекцияөн. Тайө пө минералъяс: топаз, аквамарин, киноварь... Нимъясыс мичаөсь и изьясыс мичаөсь. Гожөмбыд ми сэсся чукөрталім быдсяма изьяссө, весиг өтилаян раскопка көсьылім нуөдны, но вынним эз судзсьы,— сійө чужөм вывті котөртіс нюм.— А, вөлөмкө, колана озырлунъясыс оз сөмын му веркөсас туплясьны, найө кызвыныс пыдынөсь. Тайө ещө на интереснөйджык, а геофизикъяс адзөны найөс приборъяс өтсөгөн му пырыс. Сы понда ме и веськалі татчө тіянкөд. Вот пома-

ла техникум и муна Москвао нефтянӧй институтӧ.— Лена кыпӧдис кельыдлӧз синъяссӧ, но паныдасис Бойко видзӧдласкӧд да ӧдийӧ бӧр лӧдзис.

— Ме ногӧн, велӧдчытӧдз колӧ уджавны во-мӧд,— ув помысь ӧзтис папироссӧ Бойко.— Бурджыка тӧдмасыны уджнас. Колӧкӧ, оз кажитчы да вежны ковмас специальностьтӧ. А то ӧд первойсӧ век кажитчӧ шыльыд-веськыд. Мунан вӧрӧ, небесаыс тӧ весьтын шондиа, югыд, ветлӧдлан-ветлӧдлан да и аддзан месторождение, сӧмын разрабатывайт. А збыль вылассӧ мӧд пӧлӧсджык: ветлан-шӧйтан, корсюрӧ и мудз, и тшыг — быдсямаыс овлӧ. Корсысян, вӧчан ыджыд удж, и ачыд он тӧд, мыйкӧ шогманаыс сюрӧ либӧ оз. Нинӧм кӧ оз сюр, кутан тӧдны, мый тайӧ местаясас мукӧдьяслы нинӧмла нин кадсӧ воштыны. Кушта вӧсна нин радлан. А кор материалъястӧ обработайтӧм бӧрын мыйкӧ тыдовтчас, сӧки овлӧ и ӧна долыд, думайтан: эг прӧстӧ келав да паськӧм кисьт.

— Тӧ кӧть мый эн шуӧй, а нинӧм омӧльыс абу сыын, техникум помалӧм бӧрын кӧ сразу пырны институтӧ. Унджык тӧдӧмлунъясӧн удж вылас воан.— Лена веськӧдчис, пелькиника суйыштис чышъян улас плеш водзӧ лӧччӧм читкыльӧсь юрси пратьяссӧ. Чужӧмыс стрӧгмыштис.

Шыдсӧ гудралігмоз Борис тожӧ пырис сӧрниӧ.

— Тӧ, Лена, весьшӧрӧ споруйтан. Уджалыштӧм бӧрын велӧдчыны кокныдджык. А позьӧ и уджалігмоз велӧдчыны. Қык пӧвста пӧльза — аслыд и государстволы. Та йылысь



жӧ газетгясын гижӧны. Уджтӧ прамӧя тӧд-  
мавтӧг первой и джӧмдыны на верман.

— Мыйла джӧмдан? Воӧ кӧ сьӧлӧм вылад,  
он джӧмды. Сидз-тадз кӧ, дерт, быдторйыс  
вермас лоны.

— Вот ме ог гӧгӧрво, — бадь пуысь чипсан  
вӧчигмоз шыасис Кузьма, — мыйла и нывъ-  
ясыс велӧдчӧны? Сӧмын государстволы рӧс-  
код. Велӧдас, велӧдас, а найӧ велӧдчасны и  
фи-ить — верӧс сайӧ чепӧсийӧны.

Кузьма аддзис Леналысь скӧра видзӧдлӧм-  
сӧ да чуньсӧ вайӧдис вом дорас: ог пӧ, ог сӧс-  
ся нинӧм шу.

Биын трачкӧдчӧмӧн сотчис гӧрд лыс, дыша  
чискисны кӧтасьӧм увъяс.

— Меным кажитчӧ, мый Лена абу дзик  
прав, — чӧв олыштӧм бӧрын шыасис Бойко. —  
Дерт, позьӧ и сы ногӧн. Но бурджык велӧдчы-  
ны, кор тӧдан нин уджлысь и олӧмыслысь  
кӧрсӧ, кыз шуласны. Тӧ вот велӧдчаннуд  
корсьны мупытшса озырлунъяс. Ми ставӧн  
ветлӧдлам, уджалам, корсям найӧс кытыськӧ  
пыдысь. Синмӧн аддзытӧминысь. А ме во дас  
сайын эг и кужлы думыштлыны татшӧм удж  
йывсьыс. Медсясӧ... А висьтавыны кӧ, гашкӧ,  
первойсянныс нин колӧ заводитны.

— Висьтав, Иван Григорьевич, висьтав, —  
пыр жӧ шыасис Кузьма.

— Дышӧдас кывзынытӧ, — ӧртъяс вылас  
видзӧдліс Бойко.

— Кадыс тай, майбыр, би дорад тырмӧ, —  
тшӧтш кыв суйис Лена.

— Кывзанныд кӧ, висьтала, — шуис Иван  
Григорьевич да, гажмысь би вылӧ видзӧдиг-  
тыр, паніс курыд шогӧн тыр тайӧ кузь висьтсӧ.

— Код төдас, кор да көні ме аддзыси вольной светыскөд, сөмын помнита ачымөс детдомсянь. Войнаөдзса гажа челядь дырыд — быттьө син водзын тырыс мича дзоридз. Война заводитчан воас меным дас өти арөс на и вөлі. Помнита: арланьыс миянөс Харьковын пуксьөдісны вагоньясө, и, Ростовө мунігөн, веськалім бомбөжка улө. Гым да чард. О, мыйыс сөмын сэні эз вөв! Думыштан да өні на юрсиыд сувтө! Вагоньяс дорысь ылөджык котөртім. Ми Ванькакөд, ме кодь жө зонкакөд, уськөдчим да ляскысим му бердас да повзьөмнымла бөрдім. Весиг лөньөм бөртиыс дыр на эг лысьтөй чеччыны. А-кор лэптім юрнымөс, поездсө эг аддзөй. Мунөма. Сөмын кык бөрья вагоныс кольөма: өтиыс жугалөма, чеччыштөма рельсыас вивсьыс, а мөдыс дзонь, сөмын өшиньястөм. Гөгөр морт шойяс, чашнитөм кияс либө кокьяс. Страшно!..

Бөрө видзөдлывлігтырйи ми Ванькакөд вель дыр котөртім, кытчө кокьяс нуисны да синьяс видзөдісны. Миянлы кажитчис, мый бөрсяньным вөтчөны кутшөмкө чудовищяс. Көтөртім өти хуторөдз. Нимсө ог помнит: вунөма. Сэні өти тьөтка вердіс-юкталіс миянөс асьыс пиянсө моз.

Лена мукөдьяскөд тшөтш кывзіс да ышло-лаліс. Бойко тэрмасьтөг водзө висьталіс:

— Сідзи хуторсянь хуторөдз, карсянь карөдз мунім. Подөн, и поездьясөн гусьөник. Паськөмным сырйысис, и ми вөлім киноса беспризорникьяс кодьөсь кымын жө. Сөйлім кор кыз. Корсюрө бур йөз вердісны, а мукөд луныс и тшыгйөн кольлі. Өти татшөм лунө,

Уфаын ли кӧн ли, ог помнит, базар вывтӱ вет-  
лӧдлӱгӧн, казялі, кыдзи кутшӧмкӧ дядьӧ лӧк  
ногӧн суйис пальто зептас деньгасӧ. Ме при-  
метитӱ. «Гусявны кӧ?» — воис юрӧ, но сӧк жӧ  
ӧлӧдӱ ачымӧс: оз позь. Гусясьӧм — лӧк удж.  
Но кынӧм сьомалис терпитны позьтӧма, и ме  
кыски дядьӧлысь деньгасӧ. И Ванька сийӧ жӧ  
луннас первойысь жӧ гусясьӧма. Вайис ыджыд  
яя пирӧг. Кык лун вӧлім пӧтӧсь тайӧ пирӧг  
да деньга помсьыс. Гусясьны велалім ӧдйӧ,  
некодлӧн велӧдӧм эз ковмы. Но эз пыр бура  
помасьлы тайӧ «уджыс». Ӧтчыд базар вылын  
жӧ, кӧнкӧ мӧд карын нин, ме гусялі махорка.  
Махоркасӧ позьӧ вӧлі куритчысьяскӧд нянь  
вылӧ вежны. Но кутісны да нӧйтісны. Виси.  
Куйлі кутшӧмкӧ ю пос улын, пӧв помъясысь  
Ванька сайӧд кодь вӧчыштіс да. Сийӧ сӧк  
вердіс менӧ. Но регыд ми ськӧд торъялім.  
Век кежлӧ. Тюменьӧ воигӧн вагон вывсянь  
мӧд вагон вылӧ чеччыштӱгӧн Ванька вильскӧб-  
тіс да уси вагонъяс костас, веськаліс кӧлесаяс  
улӧ. Ёна и бӧрдӱ ме сӧки.

Би дорын пукалысьяс, лов шысӧ пӧдтӧмӧн,  
кывзісны. Бойко ӧзтіс виль папирос да тӧр-  
масьтӧг водзӧ висьталіс.

— Тюменьын веськалі милицияӧ, да бара  
иналісны детдомӧ. Но гусясьны вӧлі нин теле-  
пит. Мыйсюрӧ гусявлывлі карса олысьяслысь  
да вузавлі базар вылын гусьӧникӧн. А воӧн-  
джынийӧн мысти пышйи. Уралсӧ вомӧн и кузь-  
та ног гежмалі. А кор помасис война, ӧти  
бур морт иналіс ФЗО-ӧ. Велӧдчигӧн ёнасӧ эг  
нин гусясь, но дзикӧдз сразу дугдыны эг на  
вермы. А ФЗО помалӧм бӧрын босьтісны  
армияӧ.

Армияын кык во служити и, быттьо пуртөн вунді, некодлысь нинөм эг вөрзьөдлы. Аттьо командирьяслы, мортө сәні вои.

Бойко дугдыштліс, беддьөн гудрыштіс би-пурсө. Биыс качыштіс вывлань да ещө ёнджыка гөрдмөдыштіс сылысь сідз нин гөрдов чужөмсө и юрсисө. Қывзысьяс пиысь некодлы эз веритсьы, мый тайө спокойнөй солиднөй мортыс, налөн ыджыдджык ёртныс, овлөма татшөм сьөкыда. Найө горша кывзісны, мый лоас водзө. Сөмын өтнас Борис пукаліс пидзөсьяс вылас гырдызаяснас пыксьөмөн, кимөдзьяснас кутіс щөкасө да видзөдіс гажая ворсысь би вылө. Қывзіс али эз — оз позь вөлі гөгөрвоны.

— Олөмыд паськыд. — Бойко видзөдліс ставныс вылө. — Главнөйыс — веськавны вернөй туй вылө, и некытчө не кежны. Некор не кежны.

Демобилизуйтчөм бөрын ёртөй нуөдіс Харьковө. Медасим заводө уджавны. Сійө ачыс кутіс уджавны важ местаас — токарь-инструментальщикөн. А ме заводас снабжение отделө веськалі. Лои экспедиторөн не экспедиторөн, а мыйкө сэтшөм сямаөн. Ёна машинаөн лоө вөлі ветлыны, но меным тайө весиг кажитчис. Поставщикьяслысь ваялім заводө кутшөмсюрө материал. Отчыд менө ыстісны металла, а складысь, кытчө ме муні, машина вылө грузитісны керка вевттян көрт листьяс. Шум кыпөді, но складовщик мыччөдліс меным мөд накладнөй, көні збыльысь вөлі гижөма көрт листьяс. Думайтә: «Қызди нө тәдзи? Қорисны өтитор, тәні — мөдтор?!» Муні асланым заводө. Юала, а сәні тшөктөны нуны

водзё, нелямын верст сайё колхозё. Шуёны: договоритчёма пё та кузя. Босьт пё сёмын колхозса председательсыслысь куим сюрс шайт деньга.

«Э-э,— думайта,— тадзитё верман тэ, Бойко ёрт, кытчөкө мөдлаё веськавны...»

Откажитчи. Чувствуйта, гөгөр жмитны кутисны, быдласянь конйыштны көсийёны. Петі удж вылысь да пыри мөдлаё. Регидик уджышти — ОБХСС-ё повестка. Муні. Следователь юасыштіс. Вөлөмкө, заводса снабжение отделад жуликъяс пукалөмаёсь. Ассыныс мыжсё ме вылө вештёны. Но менам сөвесьт вөлі сөстөм.

Сы бөрын муні Сибирё да пыри техникумё велөдчыны. Сійөс помалі да кори ыстыны татчө, Ухтаё. Быдлаті өд окота төдмавнытө. Оні, кажитчө, и йөзыс тані, Пётр Иванович моз кө сортъяс серти шуны, абу первой «Б» ни «А», а высшөй сорт.

Оні мукөд дырйи кольөм вояссө казбтывла да өбиднө и яндзим лолө. Йөзлы бур вөчөмысь мынтысьлі лөкөн. А сёрниөй кутшөм вөвлі — мисьтөм кывъясөн тыр. Важ пондаыс көть век чужөмтө дзебөмөн ов, мед некод оз аддзы, оз видзөд. Став тайё мисьтөмторсө меным отсалисны шыбитны бара жө бур йөз, армия. Война дзугліс олөмсө. Война вөсна ме долі сэтшөмнас. Мед жө эськө некодлы эз ковмы нуны ас вывтис тайё страшнөйторсө. Ме сідзи прөстө, тиянкөд төдмасьөм могысь, висьталі ассым олан туйөс. Ставыс, мый вөлі мекөд, коли бергөдчывтөм вылө бөрө. А кор шуи, мый колө уджалыштны институтө пыртөдз, ме думайті тані коллялөм бөръя кык во

йывсьыс. Кольём ар ме пыри жё велёдчыны Московско́й нефтяно́й институтё, кытчө кёсйө пырны Лена. Мөд курсё вуджи. Веськыда шуа, кор уджалан и велёдчан, кызкө кылан асьтө ёнөн, бытьё мускулясыд быдлати зэвтчөмаось, и вежөрыд сюсьджыка уджалө. Көть и пыри велёдчыны, но өни на лыддя, мый колө вөли нөшта уджалыштны во-мөд, мукөд геофизическөй методьясөн тшөтш төдмасьны бурджыка...—Бойко друг вежис сёрнитан темасө:—Но, тырмас та йылысь. Вай ужнай-тыштамөй да шойччам. Аски заводитчасны нюрьяс, туйыс лоас ещө сьөкыдджык, ёна мездзам.

— Да-а, тыдалө, оз гажа местаяс виччысьны миянөс.—Борис босьтис мөтыр вылысь пөртсө да пуктис муас.—Талун нин ваыс заводитис больскакывны кок улын. Шуштөм. Бытьё и вөрыс йөжгыльтчөма.

Лена ышловзис, но нинөм эз шу.

— Нюр дорад век гажтөм,—панясигмозыс нин шуис Кузьма.—Йөзыс полөны нюрсьыс да сийөн. Вот и лөсьөдлөны быдсяма повзьөдлана историяссө. Öти вөвлөмтор висьтала. Миян сиктсаян орчча Лазар сиктө мунигөн быть лөө прөйдитны неыджыд нюр бокти. Слуда нюрөн шусьө. Мыйсө оз висьтавлыны тайө места йывсьыс! Қоркө өтчыд войнас менам баб локтө вөлөм Лазар сиктсаян гортө. А пөрысьясыдлы, ен веритысьясыдлы, торья нин тшөкыда гажтөмыд петкөдчывлө. «Муна өтнам,—висьтавлис бөрыннас.—Друг вои Гуркөс сөнө. Бөрвылын кутис кывны көлөкөла вөла. Зильгыштис... Видзөда да суөдөма менө. Вөвьясыс аттө ыджыдөсь да сьөдөсь. Сувтис-

ны... Додьяныыс зэв ыджыд съод морт шыасис: «Бабушка, мудзöмыд тай, буракö, пуксы — нуам». Баб менам тiралысь кинас пернапас бöрся пернапас чöвталö да шöпкöдö вомгорулас: «Свят, свят! Господьöй енмöй!» Вöлаясыд шуасны: «Кужин и овны, бабушка!» Да кызди тай вачкасны плетьöн вöвьяснысö — и местаныс куш. Гортö воом бöрын баб час-мöд на .тяпкöдчöма, абу вермöма сёрнитнысö. А вöлөмкö, вöлаыд нуöма районö лесничöйöс. Бабöс аддзасны туй вывсьыд да кöсьясны пöрысь мортлы отсыштны. Öтчыл тшöктасны — оз пуксы. Мöдысь шуасны: «Мунам жö, сöv но, бабушка!» А баблы и кажитчас: «Кужин и овны!» Тадзи öд, көнкö, став гажтöмыс, енмыс да чöртыс и артмöны.

— Дерт жö тадзи, — сöгласитчис Бойко.

Кузьмалөн висьт помалiгөн буретш ужнайгис. Бипур дорын лои лөнъ. Кузьма шпынь-мунiс, чуньяссö крукыльтiс, кияссö шевгöдiс, векуштчöмөн мурöстiс да кыз тай чеччыштiс Леналаны!.. Ныв муртса эз весьöпөр.

— Ой! — чепöсийс бокö да морöс тырнас сьöкыда лолалiс: — Мун сэсь. Он жö тадз дур. Модасы!

А зонъяслы теш, сералöны вом тырнаныс. Весиг Борис серöктыштiс. На вылö видзöдöмөн кызди тшöтш оз пет серамыд? Эз вермы кутчысьнысö да пыльснитiс и ачыс Лена.

Ужын бöрын, ещö мойдьясын на шулывлöмаöсь, колö водны узыны. Кузьма да Бойко пырисны палаткаö лыска вольпась вылö. Кузьма, кылö, шуалiс аслыс:

— Вод, вод. Эн пов. Абу, дерт, гөн перина кодь, но небыд öд. Обручевыдлысь тай «Общöй

геологиясө» кисьыд он чөвтлы вөлі. Сэні та-  
тшөмторйыд абу, но сылөн мукөд книгаясын  
зато эм. Эн яндысь, он өд первой морт тэ та-  
дзисө узьмөдчы. Смелджыка вөч геофизикаө  
ассьыд медводдза воськовтө!

На бөрын недыр мысти пырис и Борис. Ле-  
на пукаліс на бипур дорын. Бипурсянь өвтіс  
шоньдөн тшөтш палаткаөдз. Борис нюжөдчис  
лысьяс вылө да кунис синъяссө. Синъястө ку-  
ньөмнад тай зэв лөсьыд мөвпавны, быттьөкө  
аддзан ассьыд мөвпъястө. Көть Лыабөжөдз  
дас көкъямыс верст, Борис өти здукөн шуньк-  
нитіс сэтчө. Мый бара вөчө өні Галя? Гортас,  
көнкө... Гашкө, узьө нин? Пыжөн гуляйтөм  
бөрад төрыт Кузьма кольчис пыжсө домавны  
да пелысьяс нуны, сэсся эз и суөд найөс. А  
найө Галякөд ветлісны на ещө Лыабөж өтар-  
мөдар помөдзис. Галя первойсө вөлі гажа,  
сераліс, висьтавліс өтитор-мөдтор йылысь, но  
казяліс Борислысь чөв олөмсө да тожө нор-  
мис. Галя квартира дорын, завор дорас, су-  
лалыштісны. Торйөдчиганыс Галя юаліс:

— Аски мунанныд?

— Да,— шуис Борис.

— Дыр кежлө?

— Төлысьөн-джынийөн, а гашкө, и кыкөс  
ветлөдлам.

Пуксьыліс чөв-лөнь.

— Аддзысьлытөдз, сідзкө!— забор сайсянь  
нин Галя видзөдліс Борис вылө, нюмъөвтіс.  
Но вом доръясыс дрөгнитісны, син лысьясыс  
лапкерисны некымынысь, сійө өдйө бергөдчис  
да копыртчыштөмөн котөртіс керкаланьыс.

Борис рытивбыд көсийс мыйкө висьтавны  
Галялы да сідзи эз и удит. А колө вөлі. Ёна



колö висътавны. Мый эськö вочавидзис Галя? Шуис йöйөн? Либö пыр жö пышйис? И аслыс, Борислы, ковмис гөрдöдны? А эз кö пышйы? Гөрдöдис эськö, дерт, кыкнан ногыс: Галя пышйигөн и кольччигөн. Но сэки кöть тöдін... А öнi кадыс вежонъясөн лыддыссыны мöдас тöлысьясөн. Тöлысьын комын лун, а то ешö комын öти на. Тöлысьыд — ой, кузь, абу лун-мöд либö вежон. Борис вот мөвпалö Галя йылысь. А Галя? Думайтö али оз сы йылысь Галя? Сийö сэтшöм ылын и, пыр ылысмö. Но и матын, дзик матын, шуйга лопаткасыс улынджык... Мый йылысь сэк Галя да Попов сёрнитисны? А-а, кажитчö, приёмник пöчинитöм йылысь. Гашкö, мыйкö эм на костын? Но эм кö, мыйла эськö Галя ськөд рытбыд ветлöдлис? Гашкö, прöстö сидз, важсö казътывлöм ради и сöмын? Борис восьтис синъяссö, сьölöм дорас надзöникөн быттьö кутисны суйны ем. Зон чеччис да петис палаткаысь. Лена пыр на пукалис бипур дорын. Сийö узис пуксөн.

— Тэ нö мый? — инмöдчылис сылы пельпомас Борис. — Мый он пыр да вод, танi вугралан?

— Нинöм... Ог вуграв. — Лена зилис кызмый позьö паськыджыка восьтыны синъяссö. — Ме с-сидз... мөвпала. Танi шоныд.

— Ме жö аддза: вугралан. Биас муртса эн сунгысь. Мун пыр палаткаас да вод ли мый ли. Местаыс жö эм. Сэни шоныд жö. — Борис пестис бипурсö. — Думайтны позьö и. Ме танi пукалышта.

— Ме тшöтш.

— Шуöны мун узы! Узьтöгыд аски муннытö он кут вермыны, кызди ме талун.

— Позьö меным тани?

Борис, кажитчö, кутис гөгөрвоны.

Сійö сувтис:

— Лена. Мыйла тэ мянкөд локтин татчö? Тэныд жö позис Лыабöжö кольччыны либö жö Усть-Усаö главнöй базаас мунны?

— Ме кöсья настöящöй практика...

— «Практика», «практика»!.. Вот мый... Тэ омöльтор ми йылысь думайтан. А локтин кö татчö, эн лысьт лёка думайтны ми йылысь! Со мый! Ме тэныд веськыда висьтала.— Борис скöрысь гудрыштис беддён бипурсö. Би киньяс сьвкнитисны да качисны вывлань, биыс югдöдис Леналысь ыпьялысь чужöмсö. Сійö сувтис, сулалыштис на, сэссия, кыв шутөг, пырис палаткаö.

Слякөть усьны дугдис ужынöдз на, и Борис весьтын тыдалисны кокныдик кымөрьяс. Парма весьтти тэрмасьöмөн кывтис тувсов вой. Войвылын кымөрьяс тöдчисны ёнджыка: на пыр писькөдчис кыалөн югöрыс. Борис вель на дыр сёрнитис мөвпьяснас аскöдыс, Галякөд, кыакөд, войся шыяскөд.

Сійö неважөн на эз тöд, мый көнкө свет вылас эмöсь йöз, кодьяс ветлөдлöны вөрьясö приборьясөн, кодьяс лунысь-лун мед кöть и ичöтикаөн, но йötкöны уджсö водзö. Найö удж помысь тшем сук вöраиньясын, нюрьяс вылын, гöраясын быдмöны заводьяс, посёлкьяс, карьяс. А тайö йöзыс мунöны водзö, пыр водзö. Сэтчö, кöни сулалöны на тшем сук вөрьясыс, кöни муыс талун дзевö на мыйкö мортысь. А кор кывлис та йылысь, тайö йöзыс Борис вежöрын вöвлины сыв пасьта пельпомьясаöсь, гырысь тушааöсь да, мыйлакö, тошка-

о́сь. А збыль вылассо со, шуам, Бойко. Не-  
ыджыд тушаа, и пельпомьясыс абу паськыд-  
о́сь, и тош оз новлы, весиг гёрдов юрсиа и  
быдтор. Кутшомсянь мортө воома, уджалө,  
велөдчө. Некор эськө Борис эз куж думышт-  
ны. А ачыс? Со и ачыс сийө заводитө төдмась-  
ны тайө уджнас. Зон аслас төдлытөг малыш-  
тис щөкасо, быттьө видлис, эм абу сылөн тош-  
кыс. Заводитө корсьны мупытшса озырлунъ-  
яс! Сийө! Студент! Прөстой коми зон... А он-  
тай Бойко нинөм эз и шу ыръянитөмсьыс да  
горзөмсьыс. Эз видишт, и сёрнитө, быттьөкө  
нинөм абу и вөвлөма. Интересной морт. Му-  
код кө эськө, колөкө, онөдз на пыр броткис,  
а сийө асьсө ыджыд туйө оз лукты, ёрт моз  
кутө асьсө, оз кө тшыксьы. Лөкджыка жө эсь-  
кө сэк горзыссис да, мудзөм вывсьыд. Бойко  
и ачыс мыжа: мудзөмсө аддзыны должен  
йөзыслысь. Да, сідзкө тадзи нопсө и ковмас  
кыскавны лунысь-лун, а водзын туйыс ещө на  
пө сьөкыдджык. Бойко ачыс шуис — нюръяс  
пө воасны. Нюръяс на тай өні озырлунъяс  
пыдди, а, колөкө, и озырлунъясыс тані неку-  
тшөм абуо́сь. Лыабөжөдз дас көкъямыс  
верст, абу на ылын. Гашкө?.. Но а Кузьма  
да Лена кутасны сы пыдди нопсө кыскыны,  
сэсся практика бөрын техникумын висьталас-  
ны сідз пө да сідз. Нывъяс серамыв лэптас-  
ны, дерт. А Галя мый эськө шуас? Галя?..  
Эк, вөйыссис жө татчө! А коді нө төдіс, мый  
тані ас «пара» вөлөн ковмас ветлыны...

Слабиника трачкөдчис биын пес. Палатка  
бокъясас Борис пукталыштис понөльяс да  
лысьяс, пырис водны. Лои лөсьыд, шонид,  
сөмын чөсөдыштис бинт улас доймөминыс да

висьыштисны сьокыд ноп нуомысь пельпомъ-  
ясыс да мышкыс.

4

Отрядлөн вөрö мунöм бöрын вежон мысти  
Лыабöжын бара лои выльтор. Недыр кезлö  
шызылыс Лыабöж. Медся водз быд выльтор  
шыбитчö челядьлы синъясас. Найö первой и  
кылисны кытыськö жургöм: трактор не трак-  
тор, катер не катер, и самолёт некөн эз  
тыдав. А жургöм ыдждис и ыдждис, и войвыв-  
ладорсянь сынöдын тыдовтчис сьод ёкмыль.  
Сийö лэбис зэв улити. Челядь шызисны:

— Самолётыс бордтöм!..

— Усьö, буракö! Пышъямöй!

— Вертолёт!— гөгөрвоис кодкö. И ставныс  
ётпырйö кутисны горзыны:

— Вертолёт! Вертолёт!..

Вертолёт кытшовтис Лыабöж весьтти да лэч-  
чис сикт помö, клубдорса кушинö, и мыйкö  
дыра кезлö саявлі пропеллернас лэптöм бус  
пиö.

Челядь и гырысьяс котөрөн уськөдчисны  
клуб дорö: быдöнлы öд окота видзöдлыны  
тайö тешкодь самолёт вылас. Лыабöжын  
прөстöй самолётсö весиг лэбигас ылісянь ад-  
дзылан, а тані вертолёт! Да ещö и пуксис!  
Кызди нö он котөртлы да видзöдлы?!

Коркö важөн тадзи жö, көнкö, уськөдчыв-  
лісны и первойя тракторъяс дорö, первойя ка-  
теръяс да пароходъяс дорö. А öні тракторъ-  
ясыд мыйта! Ыбъяс вылын, вöрын — найö  
сöмын и муркөдчöны. И пароходъясыд — кы-

мын оз кывт да кат өти луннас Лыабөж  
весьтти!

Прөйдитас неуна кад, и вертолёт лоас сэт-  
шөма жө төдса, кыдзи трактор, автомобиль.

Йөзыс кытшалісны сійөс. Тэрмасигтырйи  
воисны татчө и Леонид Семёнович да Пётр  
Иванович ошпиыскөд. Найө, дерт, воисны эз  
вертолёт видзөдлыны, а мөдджык могөн.

Ошпи вөлөма медся збой. Сійө тапиктіс  
надзөникөн вертолёт дорө да исалыштіс шас-  
си-көлесасө, сэсся пөв-мөдысь прөйдитіс  
фюзеляж увтіс. Сы бөрын локтіс вертолёт-  
лөн вощьом өдзөс весьтө да сувтіс мыччы-  
сьысь лётчик водзын бөр лапаяс вылас, а  
воддаяссө инмөдліс воча, быттьөкө кекенача-  
сис.

— Но и но-о,— шензьөмысла юрсө катлөд-  
ліс лётчик, а йөзыс гажаа серөктісны. Ошпи-  
лы, кажитчө, лои яндзим, бөр сувтіс нельнан  
кок йылас да йөз серам шы улын довгис Пётр  
Иванович кокъяс сайө.

Леонид Семёнович тэрмасис вертолёт дорө:  
вермис өд Бирюков локны вертолётнас. А на-  
чальство радейтө, кор сійөс встречайтөны. Да  
и аслыс оз ло нинөм лөкыс сыысь. Кымын лыш-  
кыд лоан да пыдди пуктан начальствотө, сы-  
мын бур. Сійө бура төдіс тайө правилөсө.  
А кор казяліс, мый Бирюков абу, а вертолёт-  
ыс воөма сы могысь, медым нуны участокө  
отрядлы прөдуктаяс, Леонид Семёнович каит-  
чис нин локтөмсьыс. Вермис ставсө сятөг  
Пётр Иванович вөчны, сы кийн ставыс.

Сійө сөмын на төрыт локтіс Печора карысь,  
кытчө кайліс фотоматериалъясла да клубса  
приёмниклы детальясла. Қоланторсө, фото-

материалъясысь кындзи, эз аддзы, а öнi, вертолёт локтiгөн, буретш дасьтысьö вöли плёнка проявитны, но лои энотчыны. Проявитчис кö рытöдзыс, кымын карточка позис эськö вöчны. Локтöм бöрас первойя лунъясас на Леонид Семёнович снимайтлис Галяöс да кöсйысьлис карточка вöчны, но кызкö век на эз ло вöчöма. А Нестеровкöд аддзысьлöм бöрын Галя пöшти эз на петавлы некытчö. Клубсянь кино бöрын пыр нывъяскöд тшöтш мунö. Некедзи и матыстчыны. Йöз син водзын Леонид Семёновичлы кызкö эз вöв лöсьыд вöтлысьны Галя бöрся. Ухта кöть эськö и ылын-ылын, да мыйыс оз вермы лоны. Кывяс ещö да Поля петкöдлас сылы гаж. Гашкö, тайö фотокарточка отсöгнас удайтчас матысмыны Галя дорö? Но мыйла сийö сэтшöма вежсис? Первойсö зэв лöсьыда сёрнитö вöли и друг... Мый сылы Нестеровыс? Кодi?

Леонид Семёнович шыödчис лётчик дорö:

— Со мян завхоз,— индiс кинас Пётр Ивановичлань.— Сийö ваяс груз и...— и сэк жö йöз пöвстысь син улö уси Галя. Ныв казялис жö сылысь видзöдлöмсö, торйödчис йöз чукöрысь да öдйö заводитiс ылыстчыны улица кузяыс. Попов чöвтiс завхозлы:

— Öдйöджык босьтлы колхозысь вöв, вай прöдуктасö да грузитöй вертолётö.

А ачыс йöз кытш пыр писькöдчис нин ылысмысь Галялань. Сийöс суödис Пётр Ивановичлөн гөлöсыс:

— Кытчö нуны прöдуктасö? Кöни ректасны?

— Э-э,— то Галя бöрся, то Пётр Ивановичлань видзöдлывлiгтыр чукрасьыштiс Леонид Семёнович да öвтыштiс кинас.— Ачыл жö тö-

дан, Бойко тшөктіс ректыны 189-өд пикет дорө.

И гырысь воськовъясөн, но йөзлы синмас шыбитчөмысь видзчысьөмөн, мөдар туй боктіе шавксьөдіс Галя бөрся.

— Мыйкө бөръя каднас жугыля ветлан?— нылөс суөдігмоз зілис видзөдлыны сылы чужөмас. Галя өддзөдіс воськовъяссө.

— Мый?— Попов вылө видзөдлытөг шыасис сійө.— Быд рыт клубын гажөдчам. Прөстө кажитчө тіянлы.

— Кино и гажыс сөмын, да и то лун кост мысти.

— Вот и абу. А йөктөм, а самодеятельность?— вомаліс сійөс Галя.

— Но, но, сдайтча. Мый нө карточка йывсьыд он юасьөй? Вунөдінныд? Водзын интересуйтчанныд вөлі,— явө Нестеров йылысь төд вылө уськөдіс Попов.

— Век өд он доль. Пельныд съөдмас,— быттьө эз гөгөрво Поповөс Галя. Сэсся неуна небыдджыка юаліс:— Орданыд өмөй?

— Абу на. Рытнас лоас. Вөча.

— А-а, абу на, — кызкө тешкодя шуис Галя.— Рытнас, шуан? Уна рыт на, тыдалө, кольө.

— Позьө пыравны ті ордө?— Леонид Семёнович восьтіс Галя водзын йөр заворсө да лэдзис нылөс пырны водзвылас.

— Мый керны?— чуймөмөн видзөдліс сы вылө Галя. Сэсся читкыртис съөд синъяссө да ёсякодь бытшкис наөн:— Тіянлы жө карточка вөчны колө!

Леонид Семёнович эз виччысь татшөмторсө, здук жежлө шемөсмыліс, эз сюр воча

кывйыс. Галя восьлаліс нин кильчёлань.

— Вот йойыд!— асьсö дивитігмоз гусьöни-  
көн сөдзөдіс Леонид Семёнович.— Наян и  
ныв!— И горөдіс Галя бөрся.— Аддзысьлам  
рытнас!— да руныгис важиник керкалань, көні  
меститчис геологическөй отрядлөн контораыс  
да коді тшөтш вөлі сылы оланін пыдди.

А Галя пырис гортас да, öбедайтны пуксы-  
төдзыс, видзөдліс Попов вылө öшинь пырыс  
занавес сайсяныыс моз, мед оз аддзы. Сылы  
мыйöнкө и кажитчис тайö мортыс и мыйöнкө  
эз кажитчы. А мыйöн — эз на төд тырвийö.  
Поповкөд кызкө вөвлі гажа, век шутитсьö-се-  
равсьö, но сійö вөлі тшөтш кутшөмкө аслыс-  
пөлөс, позис весиг шуны: неуна нахальнөй.  
А Борис дзик мөд пөлөс. Борискөд, көть и он  
серав, гажа жө, кокни, но аслысног гажа, и  
кадыс сэки, вөскресеннө рытө, коли öдйö. Эз  
нин чайтлы, мый көнкө вылысь аддзыяс  
Борискөд, бырлі нин надеяыс, а вот и  
аддзысисны! Сэкса, техникумса, радейтөм-  
ыс тайö куим вонас ылысмыліс кытчө-  
кө, сы йылысь сөмын нин позис казътывлыны  
корсюрө. А аддзысисны Борискөд и, көть  
радейтөм йылысь некутшөм сёрни эз вөв...  
Да сёрни öмөй колө! Галя аддзö, абу öд  
синтөм. Борис тожө абу дзик кын, көть и  
оз висьтав веськыда. Яндысьыштö. А коді нö  
оз яндысь? Гашкө, коркө висьталас, гашкө,  
кыласны на сылөн пельясыс найöс, тайö дыр  
виччысяна кывъяссö. Ой! Ёкнитіс сьөлөмыс  
морөсас да пондіс тэрыба нөйтчыны та йы-  
лысь мөвпыштигөн. Борискөд аддзысьлөм бө-  
рын тайö Поповыс вежсис быттьö, пышйыны  
окота сыысь. А сійö: «аддзысьлам рытнас, фо-



тока-арточка». Зывок. Карточкаыс ёна колантор вöлі (он öд частö вермы карö кайлыны, а кутшöм нывлы нö абу окога снимайтчыны-тö?), да и то öні быттьökö веськодь лои. Кöни бара ветлöдлö öні Борис? Вöрын кöдзыд и ва, быдторйыс сюрлö, навернö. Кор бöрсö локтасны? Кöть эськö öдйöджык нин! Попов-лысь кызкö абу лöсьыд юавны. Завхозыслысь эськö позьö да, тöдö оз сійö. Тöдны должен. Со, вертолёт воис, сёян-юан нуö. Гашкö, письмö гижыштны? Нуасны öд эськö да. А мый гижны? Бара радейтöмын висьтасьны? А радейтö-ö нин важ мозыс Борисöс? Ачыс на оз тöд, гашкö и радейтö. Но öтчыд вöлі нин, öні сэсся оз позь сідзи, бурджык виччысьыштлыны. А друг Борислөн көнкö эм нин ныв, и Борис радейтö сійöс? А Галякöд прöстö кызди важся тöдсакöд сёрнитіс? Гашкö, сійөн и кыв ни джын радейтöм йылысь эз шу? Збыль кö эм ныв көнкö, кутшöм нин сёрни вермас лоны радейтöм йылысь? Галя жугыльмыштіс. Но, а прöстöй письмö кö гижны? Бокиад öд лöсьыд лыддынытö, письмöыд кыпöдö сёлöмтö...

Клуб дорын вертолётö Пётр Иванович грузитіс ящикьяс, мешökьяс, бергалöмысла да зильöмысла пöсялöма. Лётчикьяс тэрмöдлöны. Шыбитіс медбөрья мешökсö да носöвикнас кутіс чышкавны кымöссö.

— Ставыс кажитчö? Уп! Ставыс. Да, да. Ноко, энлы, энлы,—макнитіс кинас лётчиклань.— Друг вежөрö воис. Бойко вöлі гаралö тшöтш 256-öд пикет йылысь. Сöмын ог помнит, сёян-ö, мый-ö... А Попов шуис 189-öд до-

рö нуны. А збыльысь кö мыйкö вежсис, а Попов вунöдiс? Гашкö, котöртлыны?

— Öдйöджык, сёрмам,— тэрмöдлiсны лётчикъяс.

— Ладнö, — макнитiс кинас Пётр Иванович да чышкыштiс пöсьсö ус вывсьыс.— Ректöй и сэтчö, и татчö. Кыкнанлаас, шулiс, буракö. Кажитчö, сёян йылысь вöлi сэк сёрниыс. Тупкысис вертолётлөн öдзöсыс да надзöникөн мöдiс бергавны пропеллерыс. Челядьлөн чукөр ыдждiс, мотор шыас вöйи налөн горзöмныс. Ыджыд юрсигусть вөрзис да ньöжйöник качис сынöдö, сетчис вөрлань.

Кор Галя кашкигтырйи воис клуб дорö, вөр весьтын тыдалiс сöмын ичöтик чут, а сэсся и сйö воши. Галя видзöдлiс гижöм письмö вылас да суйис жакет зептас. А бöрынджыкнин клубса библиотекаын друг мыйыськö лои забеднö. Код тöдас мыйла. Петiс залö, пуксис скамья вылö да вель дыр пукалiс сэни. Öтнасөн тыртöм клубын.

## 5

Небыдика прöщайтчис асныра июнь да сетiс туйсö серамбана июльлы. Но нюмъялöмыс июльлөн вöлi аслыссяма жö: гажыскöд тшöтш сйö кытыськö вайис дугдывтöг зыньгысь мудзлыгтöм «музыкантъясöс». Корсюрö зильлiс и скөрмывлыны, но регыдик кежлö. Кымын верст лои мунöма тшöкыд вөръяс пыр, зыбуч нюръяс вомөн ас «параён». Лыддыны кö, öкмасны сёяс! А стöчджыка кö колö тöдны, пасйöма кыз журналын, кодлөн этша коли куш лист бокыс: кызвынсö тыртiсны лыдпасъяс. А журналын найöс гижöма уна.

Гижома быд ногыс. Гөгөрвоысь морткөд найо сёрнитоны. Окотитан кө кывзыны найос, висьталасны тэныд, мый аддзис прибор пыдысь, кыз му улысь, кызди куйлоны сәні му пластьясыс, ёна-о синласьомаось, весиг висьталасны, кутшом кадө чужломаось найо да пыдынось-о. И вермас оз лоны сийо местаясас, кыті мунисны журналө гижалысьясыс, нефть — талунъя эв колана мупытша озырлунъяс пиысь оти.

Кокнямисны нопьяс, йозыслон топалисны кынөмъясныс. Но йозыс тшыгъялөмысь мынисны, отряд воис 256-өд пикет дорө. Бойко шуис шойччыны тані лун джын да аскинас бара вөрзьодчыны профиль кузя. Недыр корсьыштөм бөрын неыджыд пожөм бокысь аддзисны брезентон да лысьясон вевттьөм сукар мешөк, консерв ящик да мыйсюрө посни коланторъяс: чай, сов, сакар, папирос.

— Лишнөйтө абу мөдөдөмаось,— зумышмис Бойко, кор ставсө тайос вайисны палатка дорө. И кызкө ставныслы эз ло лөсьыд, воши бур настроениеныс.

Но налы и тайо нин вөлі праздникон.

Көть кадыс матыетчис сөмын на лун шөрлань, Бойко лөсьөдіс рациясө да заводитис чуксавны Лыабөжөс. Вөрса шыяс динө йитчисны и вөвлытөм, төдтөм вөсньыдик шыяс. Бойко наушникъяса, то уджаліс ключөн, то кывзысис.

— Ти-та-ти, та-ти-ти,— шутьялөм костьясас слабиника кыліс рацияысь.

Ставыс кытшалісны Бойкоос да зілісны кыз-мый позьө шытөгджык лолавны, быттьөкө лолалөмнас позис мыйкө торкны.

— Лыабөж?— юаланаа видзөдісны быдөн Бойко вылө. Мөдыс сөмын пыркнитіс юрнас: абу пө.

Борис, Лена да Кузьма вешйисны рация дорысь, быдөн босьтчисны асланыс уджө. Сөмын Бойко пукалыштіс на, а сэсся скөрысь пөрччис наушникъяссө да выключитіс рациясө.

— Рытын ни асылын, ни лунын! Мыйла оз шыасьны? Мый Поповыскөд сәні лои? Чөртъясыс ләбөдісны али мый? Лыабөж ни Усть-Уса! Төді кө эськө Усть-Усалысь позывнөйяссө да волнасө! Попов төдө, но пропадитіс кытчөкө, быттө му пырыс муніс,— аскөдыс гораа сёрнитіс Бойко.

Делөыс вөлі сын, мый Лыабөжкөд удайтчис йитчывны сөмын первойя дас луннас, а сы бөрын Попов воши кытчөкө. И сёрни пыдди рация пыр корсюрө кывзывлісны Москваысь «бөръя юөръяс»: көть кылан страналысь гөлөссө да чувствуйтан, мый абу өтнад.

Праздник лун кузя лусис Кузьма: сылөн өчередыс дежуритны. Пөгибө воштисны номъяс, ном дөраяс да диметилфтолат дорйисны омөля. Номъяс зыньгисны уна сө гөлөсөн, гөгөр жуисны, дасьөсь пырны нырө, синмө, пельө. Весиг шыд пиө уськөдчывлісны гершнысла. Сәки Кузьма көвтыштлывліс паньнас да, бокө койыштигмозыс, шулывліс:

— Свежөйтө ми ог сөйөй, консерв вылын олам. Қыйсян сезоныс таво эз на воссы,— и копрасьліс номъяслы:— Аттө тиянлы, бур сьөлөмаяслы, төждысьөмсьыныд...

Кузьмаөс номъяс дөсадитісны мукөдөс серти ёнджыка. Гашкө, сьөдов мортыд ылі-

сянь тыдаліс ли мый ли да? Съод вылад од сатшкысьоны номъясид. Вермис лоны, пиньясыс югъялоны да сійон. Чужо́мыс Кузьма-ло́н пыктышто́ма, оз нин кажитчы косіникон, быттьо абу номъяс, а гебъяс сёйомао́сь. И сійо зільліс овны билпур дорын, весьтас сувтөмөн, тшын сюръя пиас. Тшын пиын сулалігон ку-рөдіс синъяссө, но терпитны колө вөлі быть, а гөлөсыс, та вылө видзөдтөг, вөвлі гажа.

— Тайо́-номъясон ведра тыр синва тшыно́-ді нин-а, ковмас кө кытчөкө коланіно́, ёна рөскодуйтчи да, некысь лоо босьтнысө.

Кузьма аслас сёрниясын частө казтывліс и ассыс сиктсө, коді вөлі Летско́й районын. Сійо видлывліс сиктсаяссө бригадирөс төлктөг бөрийо́мысь. Колө пө вөлөм бөрийынысө ку-тшөмкө Митипер О́льөксанөс, сійо пө киссьөм кузнеча бөр уджалан выйөдз вайөдо́ма и ку-жө пө вөчны быд удж. Бригадатө пө сійо эсь-кө кыпөдіс, домкрат моз. А бөрийо́мао́сь мөдөс. Весиг грөзитлывліс: арнас пө муна да агити-руйта ставнысө, асьныс кө оз догадайтчыны, Митипер О́льөксанөс бөрийыны. О́нияыс пө көкъямысөдз узьө. А татшөм узыысь мортсьыд уна төлк оз ло.

Төлысьысь дыр нин найо́ вөліны өтлаынөсь. Вөрын. Нельон. И тайо́ матыстіс найос өта-мөд дінас, көрталіс тыдавтөм гезйон. Гажа сёрниясын, пөльза вайысь споръяс дырйи, уджын — найо́ казялісны өта-мөднысө бур-джыка, и төдмасисны тайо́ ка́днас крепыд-джыка быдса во карын олігон серти.

Вөрө муна́н первойя рытсянь Борис эз зіль-лы ёна сёрнитны ни паныдасьлыны синъяснас Бойкоко́д. Но вежон мысти Бойко дзико́дз

вежсис Борис син водзын. А тайё лои со кы-  
дзи. Кор пур вылын вуджисны нейджыд ю  
вомён, Борис чечыштіс пур вывсяньыс бере-  
гас и музгыльтіс коксё. Қокас лыйыштіс,  
быттьё мыйкё ори, но та понда, неуна чотіг-  
тырйи, муніс на, а кор узымөдчисны да ужын  
бөрын Борис пондыліс чеччыны места выв-  
сьыс — эз вермы: пыктөма кокыс. Бойко сэк  
видліс да шуис, сөныс пө нюжалөма, и тшөк-  
тіс Ленаөс пузьөдны ва да ачыс вель дыр зы-  
раліс майтөга ваөн Борислысь коксё, а аски-  
нас муніс орччөн сойөдыс кутышталіг. А мед-  
воддзаясь аддзисигөн, Лыабөжын на, Борис  
чайтліс Бойкоөс зумыш, этша сёрниа мортөн.  
Но кутшөма вежсьывліс Бойко ас йывсьыс,  
Москва йылысь висьтавлігөн, кысянь неылын  
сійө служитлөма армияын. Қывзысьяс син  
водзын вөр пуяс местаас сувтлывлісны  
Кремльлөн башняяс и кажитчывліс: ылын  
кылө курантъяслөн шыыс. Төв пушкөмас кыв-  
лывліс выставкаывса фонтанъяслөн сьяль-  
гөмыс, машина көлесаяслөн асфальт вывті  
лөня шаргөмыс.

Но талун Бойколы буретш эз сёрнитсьы.  
Сійө чеччис, муныштіс профиль кузя нейджыд  
эрд бокөдз да пуксис пөрөм пу вылө. Гөгөрво-  
төм вөлі Лыабөжлөн чөв олөмыс. Öд кымын  
лун нин! Мед нин, шуам, Лыабөж чөв олө,  
но öд и Усть-Уса оз кыв сійө волна вылас. Ра-  
ция кө жугаліс, Попов должен налы пижны,  
сетны телеграмма. «Полан?» — сувтіс син  
водзас Поповлөн нюмъялысь чужөмыс. Прө-  
дуктаяс со вайөмаөсь. Но öд та йылысь мун-  
төдзыс на сёрнитчылісны. Сійө висьтавліс  
кыкнанныслы, Поповлы и Пётр Ивановичлы.

Вайомаоць эськө, но абу тырмымөн, этша мыйлакө. Удж эштөдтөдз оз тырмы, видзтыштавны ковмас. Гашкө, Бирюков воліс да вежсис мыйкө? Көть тайө и тадзи, но сёянсө эськө коліс тырмымөн вайны. И некутшөм гижөд абу сёяныскөд. Бирюков кө воліс, сэки эськө и рациялы коліс уджавны. И ачыс Поповыс көсйысис локны, но весиг дукыс на абу. Мыйкө, гашкө, збыль ськөд лон? Висьмис өмөй?

Но вай жө кольламөй Бойкоос өтнассө, мед сійө мөвпалө, а видзөдлам, мый вөчөны мукөдъясыс. Со кытчөкө мөдөдчөма Лена.

Сылөн киас чайник, чужөмсө пөшти ставнас гупкөма чышъяннас ном сөйөмысь. Бойкотөг бипур дорын сылы вөлі гажтөм, и сійө думьштіс ветлыны вотчыштны чайникөн. Вутшъяс вылын уна турипув на сярвидзө. Гашкө, чай юны зонъяслы вотыштас. Но турипувйыс тай быдлаын эм. А мыйла Лена вотчынысө муно сэтчө жө, кодарө ылыстчис Бойко? Бойко? Мый сылы Бойкоыс! Иван Григорьевичлөн, удж йылысь кындзи, нинөм абу юрас. Лена сідзи решитіс нин. А кызди нө сэсся? Кор оз аддзы сійөс, век зонъяскөд моз жө сёрнитө ськөд? Весиг өбиднө тшөтш овывлө корсюрө.

Иван Григорьевичлөн аслас олөм йылысь висьталөмсянь Лена ас төдтөгыс кызкө торъя өна мөдіс видзөдны сы бөрся. Быд лун содіс сылөн Бойко дінө кутшөмкө интерес. Позис кө эськө, дугдывтөг видзөдіс сөмын сы вылө, кывзіс сійөс, муніс эськө Иван Григорьевич чукөстөм серти көть кытчө, медым сөмын лоны сысянь неылын. А сійө Ленаос и ныв пыдди оз пукты. Кысь нө сэсся та бөрын он шог-

сы, кор кажитчө тайö зонмыслөн гөлөсыс.  
Да сөмын өмөй гөлөсыс — дзик ставыс кажитчө!

Лена öкталіс нярзьөм турипув тусьяс, а мөвпьясыс кытчө сөмын эз котöртлыны, мыйсö эз вöчны! Артавны кө ставсö — о-о! Мыйтi! Вай нөрöвитлам, ог на йöзöдöй гусяторьяссö.

Вөр шыяс сорыс неылын кылыштiс сьылöм. Лена тöдiс тайö гөлөссö. Гөлөслы öдва кывмөн отсаліс ачыс вöрыс. Лена веськөдчис да кывзысьыштiс, сэсся надзöник мөдöдчис сьылысьлань. Иван Григорьевич сьыліс комиөн. Комиөн сьывны сійöс быд рыт велöдiс Кузьма, но Бойколөн артмывліс ас ногөн, акцентөн. Лена кывзысьыштiс сьыланкывьяс. Сьыланкывйыс вöлі выль, Лена эз на кывлы сійöс, көть мотивыс кажитчис тöдсаөн. Мышнас кыз пуö пыксьöмөн, пөрөм пу вылын пукаліг, Иван Григорьевич видзöдліс Ленасянь мөдарö, а гөлөсыс мелiа разалі гөгөр.

Кор ми адзислям тэкэт,  
Еджид юрсия ныв.

Вöрыс сьыланкыв тактьясас ньöжйöник довкйöдліс пу йывьяснас. Эз, тайö Лена довкйöдліс юрнас. А сьыланкывйыс лэбис ылö, Иван Григорьевич видзöдлас бöрся, еджыд юрсия ныв дорö. Вот мыйла оз казав Лена-лысь гуся видзöдласьяссö?! Еджыд юрсия?! Лена öд со тожö еджыд юрсия, сөмын шондiсьыс ли мый ли рудöдыштiс-а. Гашкө, тайö сы йылысь и сьылö Иван Григорьевич да? Леналөн сьөлöмыс муртса эз чеччышт ортсö, а чужöмыслы лои жар. Оз, оз! Мый мөвпав-



сьо! А кутшöма эськö... Мый нö, оз позь сы йылысь сэсса сылыштны али мый, абу жö öд сэтшöм омöль! Но öд оз и видзöдлы некор весиг, гашкö, и сідз да, омöль да?

Сійö сулалыштіс, сэсса мыйкö друг турышт-чис вуджны Бойколадорö нейджыд ёль вомöн вöсныдик пөрöм пу вывті. Смелмöдчис да гажаа нин, шуткаөн кöсйис чукöстны Иван Григорьевичöс, но пөрöм пу вөлöма сись да чеги-пазали кок улас, кокыс дзурсмуні кытчöкö — кöдзавліс юр кучикыс. И шутка пыдди артмис гораа да повзьöмөн:

— Ой!

Лена аддзис, кызди Иван Григорьевич öти здукөн лои сы дінын, келіс ваас да отсаліс петны косінö. Лена видзöдліс сапөгъяс вылас да мыжа моз кыпöдіс синъяссö. Бойко, неуна яндысигтыр, паськөдыштліс кияснас и жури-танаа, но небыдика шуыштіс:

— Но, во-от.

Лена аддзис сылысь синъяссö, мелі синъяс-сö, кодъяс öнөдз некор на эз видзöдлывлыны сы вылö тадзисö. Оз, тайö мортыс оз вермы лоны дзик косөн. Прöстö сэтшöмнас кажит-чывліс. И Леналы сэтшöм окота лои жмит-чывлыны юрнас зон морöс бердö. Муртса кеж-лö. Көть дуригмоз. Но пыр жö повзис. «Еджыд юрсиа». А пельпомъясыс кылісны, кызди ку-тісны найöс зонлөн вына киясыс да надзöни-көн топöдісны крепыда. Лена кöсйыліс мез-дысьны, кöсйис шуны: «Иван Григорьевич, оз ков!», но сы пыдди шуыштіс:

— Ваня...

А мукöд кывъяссö эз удит шунысö: горшыс гөррдзасис. А думъяс? Сы мында думъяс öз-

йывлісны и лӧньлісны, ӧддзывлісны и надз-  
мывлісны найӧ юръясын! И ставыс помасис  
тадзи: Лена кийсь шлювкнитіс чайникыс не-  
быдик нитш вылӧ, пӧлыньтчыліс, но вотӧсыс  
сэтысь эз киссьы.

6

Дыр думайтӧм бӧрын Леонид Семёнович  
ветліс Усть-Усаӧ, сійӧ кӧсйис прамӧйджыка  
сёрнитыштны Бирюковкӧд уджсӧ нуӧдӧм ку-  
зя да корны отсӧг вылӧ вертолёт, но ветлӧмыс  
лои весь: Леонид Семёнович виччысис кык  
лун Усть-Усаын да Бирюковӧс сідзи и эз  
вермы аддзывны: сійӧ мунӧма ылі участок  
вылӧ Печора кывтыдыс. Гижис бумага вылӧ  
ассыс мӧвпъяссӧ, корӧмсӧ да пароходӧн ка-  
йис бӧр Лыабӧжӧ, думнас мӧд луннас кӧсйис  
нин, вертолёт пӧ воас да, Бойко дорӧ мунны,  
но пароход палуба вылын, тӧв йылас сулалі-  
гӧн, кынмыштіс и висьмис.

Вежон чӧж Леонид Семёнович висьӧдчис.  
Орча сиктса медпунктысь фельдшер пунктіс  
диагноз: грипп. Гожӧм шӧрын и грипп?  
А мый? Он ӧд тай тӧд, кор висьӧмыд суас.  
Лои куйлыны крӧватъын вӧрӧ мунӧм пыдди.  
А бӧръя куим луннас Леонид Семёнович эз  
вӧв Лыабӧжын, бара кайліс аслас могъяс-  
ӧн карӧ, да тайӧ кадсӧ кодсюрӧлы вӧлі спо-  
койджык. Локтӧм бӧрас жӧ пуксис обрабо-  
гайтны опорной профильвывса материалъяс—  
найӧс быть колӧ вӧлі эштӧдны участок вылӧ  
мунтӧдз. Кӧть сійӧ и эз радейтлы лун-лун пу-  
кавны пызан сайын Бирюков либӧ Бойко моз  
да зунясыны бумагаяс, картаяс да лыдпасьяс

пиын. Лыдпасъясон ноксигон сылон висьмывліс юрыс, да од тов жежло он жо коль ставсо? Тов жежлад мыйта на уджыс лоас!

Асывнас пыравліс сы ордо Пётр Иванович да висьтавліс тождысына думъяссо: кыдзи по бара сәні Бойколон отрядыс олө-вылө. (Сідзи и шуис: быттьо Бойко нин отрядса начальныкыс.) Колө по рация пыр кыдзкө йитчывлыны, гашкө, удайтчас, либө корсьны заводитлыны. Мыйыс по эз вермы лоны, прөстө од оз жо чөв овны?

Леонид Семёнович төдө, удайтчас оз. Кыдзи сійө йитчас, кор Галя водзын ыштөм могыс ачыс кыскис рациясьыс конденсатор да сопротивление и пунктис клубса приёмникө. Сійө такөдіс Пётр Ивановичөс: да, да колө по, быть колө кыдзкө йитчывлыны. Сөмын по тай омөля зэв кылө да төрыт нинөм эз гөгөрво. Связьтөгьд, дерт, абу жо лөсьыд. Бойко, көнкө, лөк ногон нин казътывлө, да только рацияас мыйкө портитчөма, и лөсьөднысө коланторйыс весиг карсьыс эз сюр. Тайө луньясас позяс Усть-Усаө телеграмма сетны рация жугалөм йылыс. Мед найө йитчыласны. И ставыс лоас аслас местаын.

Но Леонид Семёновичлы кажитчис, мый висьөм бөрад ёнасө оз ков тэрмасьны. Бойколон, колөкө, оз ладмы уджыс да корас ещө отсавны, и ковмас пыр жо мунны. А сылы Лыабөжын бурдөдчыштны на колө, көть лунмөд ещө. Оз кө ладмы уджыс — тайө Леонид Семёновичлы весиг кивывджык. Сідзкө Бойко оз на бура төд, велөдчыны на сылы колө, а Леонид Семёнович ветлас да справитас. Дыр жо нин эськө сылон лои тані олөмыс да, но

мед. Тайё участоксö, шуам, Бойко вöчас, а мöдар берегсасö сійö, Леонид Семёнович.

Бокас сійö öшöдiс фотоаппарат да мöдöдчис ю берег пöлөн кывтыдлань. Леонид Семёнович эз вöв фотограф, сійö вöли сэтшöм снимайтчысьяс лыдысь, кодъяс радейтöны сöмын снимайтны, но оз радейтны вöчавны карточкаяс. Сійö быд во ветлö фотоаппаратөн — кыдзи нö позьö сытöг, кор фотоаппарат сетö солидность?! Снимайталö базаясын. Дерт, йöз корöм серти снимайталö, оз öткажит, корсюрö и аванс босьтлывлö. Сетöны кö нö, мый не босьтны; но карточкаяссö öнi на ыстö. Ылöдлöм эськö артмö да, первойсö быттьö абу лöсьыд сьöлöм вылас, а сэсса кадус вуштас ставсö, дубалö да нинöм! А то проявитель колö, закрепитель, да ещö ноксы найөн. Абу, абу тайö уджыс сы серти! Видлис со танi Гальялы карточка вöчны да велавтöгыд тшыки, артмöма кутшöмкö чутöсь, яндзим лон сетнысö. Сидзи на и вöчö öнöдз выльысьсö, а Галя быд паныдасигөн бытшйöдлö кывъяснас, дöзмымөн нин лон. И мыйла тайö фотонас суйсис? Фототöг на позьö вöли кызкö-мыйкö.

Снимайтiс Леонид Семёнович сиктсö, юсö, дiсö, вöрсö, быдлатi, кытi сöмын эз вöв дыш. Бöрынджык водiс гож сайö, турун пиö.

Луныс шондiа. Шоныд, лöнь. Гож сайын тiньгисны кымынкö ном, норасисны кынöм сюмалöм вылö. А турун пиын пуис олöм. Быдсяма насекомйяс: прöстöй гагъяс, ичöтик еджгов бобувъяс, номыръяс — быдөн вöчисны ассыныс уджнысö. Торъя ёна зiлисны кодзувкотъяс. Найö посныдджыкöсь вöрса вокъясныс серти, сьöдöсь и вижовöсь, му-

кӧдыс весиг бордаӧсь, пыр тэрмасисны кыт-чӧкӧ. Леонид Семёнович кутіс номйӧс да чӧвтіс налы. Уськӧдчисны кыкӧн да пыр жӧ кыс-кисны розь дорӧ, но розяс пыртны эз вермыны. Тайӧ векныдик, посныдик розьясыс пырисны му пытшкас, быттьӧ шахта ствольяс, а розьяс дорас му чукӧрьясыс — быттьӧ ичӧтик терриконъяс.

Леонид Семёновичӧс эз интересуйт кодзукотьяслӧн олӧмыс. Сійӧ вешйис бокӧджык, водіс гатш да вевттис шляпанас чужӧмсӧ.

Садьмис шонді югӧрысь. Вӧлі пӧсялӧма. Узигкостыс шондыс прамӧя вешйӧма рытивывланы важ местасыс. Леонид Семёнович лэччис ва дорӧ, кӧтӧдіс юрсӧ, мыссис. Унзільыс прӧйдитіс. Сійӧ веськӧдчис бӧр сиктланы. Обедайтны эз на вӧв окота. Сикт кузя мунігӧн друг воис юрас: гашкӧ, видлыны Галяӧс. Гортас абу?.. Йӧзыс унджыкыс видзяс вылынӧсь, оз и аддзывны пырӧмсӧ.

Тайӧ луныс вӧлі тӧдчана лунӧн Галялы. Ичӧт дырйиыс тайӧ луныс вайлывліс чӧскыд пирӧгъяс да шаньгаяс, а мамыс пасьтӧдлывліс сійӧс выль ситеч платтьӧӧн да сёрнитлывліс ськӧд ещӧ на меліджыка да дырджык мукӧд лунсяс дорысь. Галя котравліс уличавывті. Кӧть выль платтьӧыс рытланыыс и важмывліс да сьӧдасыліс — зато вӧвлі зэв гажа. Ӧти гожӧмӧ, кажитчӧ, первой классӧ пыртӧдз, тайӧ луныс вайис Галялы кӧсаяс. Сьӧдов дженныдик кӧсаяс, пельпомӧдзыс. Галя вӧзджыксӧ эз гӧгӧрволы кӧсаяс йывсьыс да весиг дивуйтчыштіс сэк, мый найӧ сэтшӧмнин кузьӧсь, да думыштіс: эз-ӧ войнас быдмыны?.. Воысь воӧ кӧсаяс нюжалісны да лой-

ны коскөдзис. А сэссия көсаяс пыдди лоины кудрияс. Тайё Ухтаын нин. Көтьи быд квайт төлысь мысти ковмывліс вильдыны, ветлыны карё, но век жё — кудрияс! Сэксянь вежсис не сөмын причёскаыс, вежсис и тайё луныс. Эз лоны и мамлөн пөжалөм пирөг-шаньгаяс. Көзяйка эськө талун со дасьтөма жё пирөгьяс, но мамлөн кодьось өмөй нө найё!

Быд во сійё аддзывліс тайё асывнас юр водзсьыс посныдик, но сьөлөмлы дона пөдаркияс. Найёс, дерт, пуктывліс мамыс, но некор эз висьтавлы. Галя и ачыс эз юасьлы, сійё прөстө окавліс мамсө. Ена. Унаысь.

Август коймөд лунө вөлі Галялөн чужан луныс.

Көзяйкаысь өтдор, некод, дерт, эз төд та йылысь. Эз воны вөрысь ни Борис, ни Кузьма, ни Лена. Эськө позис неуна пасйыштны, гажөдчыштны. А то кызкө шуштөмкодь жё. Но өд он жё пет сэссия улича вылас да горөд: менам пө чужан лун талун!

Галя лөсьөдыштіс юрсисө зеркалө водзын. Зеркалөас весиг абу пырсякодь гажа чужөмыс, абу быгтьө и аслас, кутшөмкө, ичөтика весиг төдтөм кодь, стрөга видзөдө и... неуна жугылиника.

Сійё чуқыртчыліс да нерис зеркалөсьыс асьсө, джынвийё, бергөдчыштөмөн видзөдліс ешө.

Өдзөсас, кылө, тотшнитісны.

— Пырөй. Да, — чөпөсйис сійё пызанлань да лөсьөдыштіс пызан дөрасө, мыйлакө босьтліс сәні куйлысь книга да бөр пуктіс. Кватитіс прөшви кыан да пуксис пызан дөрас.

— Бур лун. Позьö? Эг торк?— öдзöс до-  
рын сулаліс Леонид Семёнович.

— Мыйла... Пырöй, прöйдитöй,— артмис  
Галялөн. Сылы эз вöв вывтi коланаөн Попоз-  
лөн локтöмыс, но да öд абу жö лöсьыд порог  
дорсянь бергöдны тöдса мортöс. Ывлаын кö  
эськö и позис шуны шуткаөн моз-а. Керкаад  
кызкö абу лöсьыд.

Леонид Семёнович эз кут виччысьны унаысь  
тшöктöм, матыстчис пызанлань, пуксис  
улöс вылö. Кыскис пинжак зепсьыс кисö да  
мыччис кампет, а мöд кинас видліс Галялысь  
прöшви кыансö.

— Аттьö,— босьтис кампетсö Галя.

А Попов читкыртыштліс синъяссö да ка-  
товтліс юрсö бокыв, донъяліс прöшвисö:

— Шогмана. Весиг бур,— но сэсса паськы-  
да нюмдіс да содтіс:— Но ме кö ті местаын  
вöлі — син портитöм да прöстö кад воштöм  
дорысь, магазинысь эськö босьті,— сійö сувтіс  
да кутіс ветлöдлыны öтарö-мöдарö джодж  
кузя. Кок улас норасисны джодж плакаясыс:

— Дзурк-дзурк, дзурк-дзурк.

Леонид Семёнович нарошнö корсяліс тöд-  
чана кывъяс, петук моз ветлöдліс ныв водзын.  
Сійö дөвöльпырысь видзöдіс аслас руд кос-  
тюм да кыз пöдöшваяса гөрдов ботинки вылö.

— Галина Батьковна, тiянылы кажитчö тані  
овны? Лыабöжын?

— Да. Мый нö эськö?

— Ме кö эськö ті местаын вöлі, муні та-  
тысь. Либö Ухтаö, либö Печораö. А то тані,  
паськыд мешöк пельöсад олігөн, гажыс, том  
пöраныд бокті мунас, Галина Батьковна. Ме...

— Ті, Леонид Семёнович, мыйкө зэв частө ме местаын окотитанныд лоны,— торкис сійөс Галя да шутитіг грөзитыштіс чуньнас.— Вөтланнанд али мый татысь менө? Он-ө нин көс-йөй клубса завөн кольччыны Лыабөжө? Оз өмөй кажитчы асланыд уджныд?— сералис Галя.

— Но-о, шуинныд жө! Ме серьёзнөя, а ті... Ковмас кө, ме квартира судзөдны верма Ухтаысь и...— Леонид Семёнович бара матыстчис Галя дорө, кутчысьліс прөшвиас.

— Кутшөм бурөсь ті,— серөктыштіс Галя, сэсся серамыс исковтис чужөм вывсьыс, бан бокъясыс гөрдөдыштісны и крапкис:— Мый «и»? Кутшөм нөшта буртор? Мыйысь? Мыйөн ме «квартирасө» заслужиті тиянсянь? Мый мейн сэтшөмыс?..

— Но меным ті кажитчанныд!— воськовтис Леонид Семёнович нывлань, босьтис сойөдыс.

— Киястөг! — нетшыштчис Галя.— «Кажитчанныд», а асланыд, небось, гөтыр, көнкө, виччысьө. Тожө мем!.. Вот мый, Леонид Семёнович! Ме уджала, а ті мешайтанныд. Зэв кө нин окота тані пукавны, кольччөй комнатаас да пукалөй, мыйта колө ловныдлы, а ме муна. Либө...

— Вөтланнанд? О-о, со ті кутшөмөсь!— Поповлы быттьө тайө и колө вөлөм. Сійө нөшта на небзьөдіс нюмсө да пуксис пызан вылө, дзик пом йылас өти кокнас джоджас пыксьөмөн. Қиыс сылөн матыстчис Галя кудрияс дорө, малыштіс найөс:

— Став уджсө му вывсьыс он вөчөй. Донай... — синъясыс сылөн яндысьтөг югьяліс-ны.



Галя кучкис сылы киас, звирк чеччис, кватитіс пызан вылын куйлысь книга да швачкөбтіс сійөн пызанас. Попов весиг дрөгнитіс.

— Ещö отчид шуа: киясыдлы вöля эн сетöй! И вообщö... вообщö... — Галя вöлі пöшти бöрдан выйын. Сылы сэтшöм зывök лои тайö баситчысь мортыс и мый сійö тані сы ордын пукалö. И сійöс нинöм оз позь вöчны, весиг вöтлыны. Кöзяинъяс абуöсь, видз вылынöсь, горöдны некодлы. А тайö... тайö быдтор вермас ськөд вöчны. Татшöмыд!

— Ок и скөр невеста кодлыкö сюрас,— эз дöзмы Попов. Сійö матыстчис матöджык, кватитіс киöдыс нылöс да сералігтыр мöдіс кыскыны асланьыс.— Ме мыйкö вöтаси да дзик быттьö тэкöд орчөн Нестеровöс аддзылі.

Галя кыліс, кызди тайö мортыслөн ён киясыс, быттьö мореса осьминоглөн щупальцыясыс, кыскисны сійöс. Ещö неуна, ещö... Пыр матысмö чужöмыс, кылö сьöкыда лолалöмыс. И друг сійö кыліс: щупальцыясыс инмисны сылы морöсас.

— Мун! Лэ-эдз!— Галя горöдіс керка тырнас. Мый вынсьыс нетшыштчис ныв, косяссис, кылö, платтьö воротникыс, но мыні Попов киясысь. Эз ачыс, а Попов вылö лöглуныс нин шлочкөбтіс ныв киён Попов чужöмö. Леонид Семёнович шöйөвошли. Галя йөткыштіс пызансö да котөрөн петіс керкасыс. Кытчö? Кытчö пышйыны? Котөртіс ыджыд посводз пырыс дзоля посводзас, сиптіс-каличалис бöрсяньыс öдзөссö. Дзедьсыны öдйөджык? Лөскас? Оз позь, аддзас. Крепитас-ö каличыс? Галя сьöкыда лолалис, тэрыба кыпавліс джуджыд морöсыс, синъясыс то котралісны сарай

кузя, корсисны дзєбсянін, то видзодісны одзос калич вылө.

А калич заводитіс нин тракйысьны-чеччавны. Галя надзөнникөн бөрыньтчис. Весиг од потор эз суйышт калич костас! Оні кө? Оні сёр нин. Қотөртас кө одзөслань, вермас буретш Попов киясөдз и воны. Сёр, сёр! Аттө, мый нө вөчны? А калич тракйысис Галя син водзын. Пыр ёнджыка и ёнджыка, вылөджык и вылөджык кыптывлө, вот-вот мынас, вот-вот воссяс одзөсыс. Галя бөрөн-бөрөн пырис корөсь сёрьяс костө, зілис дзєбсьыны неважөн на борйысь ытшкөм турун пиө. Но тэрмасигад некыз эз саяв этшаник туруннас. А калич чеччаліс, гашкө, медбөрьяссыс. Посводзянь кыліс Поповлөн сьөкыд лов шыыс. А, гашкө, и тайө аслас Галялөн вөлі лов шыыс. Қодлөн — думайтны вөлі некор.

Посводзын кыліс мурөстөм да Поповлөн гөлөсыс:

— У-у, кыскалө чөртыс тэнө быдлаті. Гач кокөс косяліні!

Сэсся кыліс мөд мортлөн гөлөс:

— Леонид Семёнович?! Висьталісны — татчө пө кежөмныд! Мый нө сэтчө гольганныд, мыйкө нө игнассис өмөй?

— Да портсигарөс вунөді. А каличыс игнассис,— пөрьяліс Леонид Семёнович. А ачыс мөвпыштіс: «Висьталісны пө». Сідзкө, аддзылөмаось татчө пырөмөс. Некод тай нө некөн эз вөв-а, керкаясыс кө и кыйөдчөны-а. Абу сикт, а суклясян шомөс. Сэсся заводитасны нин. Но и мед кывнысө ёсьтөны, сылы нө мый? Чөрту! Гашкө, кызкө-мыйкө оз кывсьы Полялы. Мед сёрнитасны, Галялы жө и ян-

дзим лоас. А сылы мый, өти төлысьыд кызкө коляс нин...»

— Мый кутам вöчны, Леонид Семёнович? Ме думайта да, йөзтө корсьны колö заводитлыны,— Галя төдiс гөлөссö Пётр Ивановичлысь.— Катерөн ме Еджыд ю кузяыс кайла ли мый ли. Найö өд сэтчö петасны. Уна ния кадыс коли.

— Да өлөд ли мый ли ошпитö, гачöс няйтөсьтiс,— кылис Поповлөн недөвöльной гөлөсыс.— А йөз понда эн шогсьы, старик. Бойкө кө сэни,— лишнöй төдчөдiс Леонид Семёнович,— сiдзкө, ставыс лоас бур. Первой сорт «Б», кыз ачыл шулывлан. Найö Еджыд ю дорö долженöсь петны — петасны. Сöмын öнi кайнысö водзджык на. Менам тай со висьöм понда эз ло ветлöмыс-а.

— Тi көть мый шуöй, а ме муна аски,— заводитiс асныравны Пётр Иванович.— Мыйта нин кадыс колис, а некутшöм юөр! Вошины ли мый ли кө-а? Сёяннысö өд кык местаö ыстывлiм, адзисны ли эз ли. Сёрнитчывлiм жö воча кайлыны.

— Мый? Кык местаö? Кыдзи кык местаö?!— Леонид Семёнович повзьяштлiс, но пыр жö артыштiс. Мыйкө кө лоас, позяс дорйысьны: завхоз абу тырмымөн ыстöма сёян, а сiйö тшөктылис öти местаö. Öтилаö! Бойкө корöм серти. Сiйöс, сiдзкө, нинöмысь лöө мыждыныс. А Пётр Ивановичлы'шуис:

— Кык местаö кө, кыкнансö и адзасны. Дзик ничöмла тэрмасьнысö, лун-мөд мысти, крепавмышта да, ме, гашкө, ачым ветла катернас. Пётр Иванович нинöм эз шу воча, и Галя кылис, кызди найö петiсны посводзысь

да лэччисны кильчө поскөд. Но син водзас өдзөс каличыс пыр на быттьөкө чеччаліс, көс-йис дзикөдз чеччыштны, пукөдіс турун нөб сайын, корось сёръяс костын. И кор нин лөнис гөгөр, сөмын сэк казяліс Галя, кызди сырмө яйыс, кызди дрөжжитө да слабитөма гөгөр, кок йылас кутчысьны өдва вермө. Көть и гож сайын, а эз көдзыдысь дрөжжитөд сійөс. Эз. Луныс сулаліс шоньд, жар. Градус кызь кум. И вель на дыр кажитчис сылы, мый кодкө сулалө өдзөс сайын, лөсьөдчөма кватитны сійөс.

Но медся страшнөйторйыс, коді повзьөдліс Галяөс, прөйдитіс нин, ылыстчис кытчөкө надзөникөн. А Галя слабитіс, тушаыс лигышмуні. Сійө пуксис турун бокө, и эз тай ков дыр виччысьны синвасө.

7

Енэж пасьта дуввидзисны юра кымөръяс. Найө быттьө сулалісны өти местаын. Сөмын юртө лэптөмөн, сувтөмөн видзөдігөн, позис аддзыны, мый найө оз сулавны, а век жө мунөны, вөрөшитчөны. Кымөръяс гырысьөсь, шонділаньтіыс еджыд бокаөсь, а улысныс кодлөн сьөдов, кодлөн руд. На костті мыччасьө шонді. Лөнь. Жар. Дыша тіралыштөны пуяслөн коръясыс, нюкыртчыштөмаөсь; горшныс косьмө. А пуясыс асьныс быттьөкө гегдөмаөсь, тірзьөны-йөктөны. Пөжө.

Обед бөрын, кор сөйисны пөшти медбөръя сукаръяс, Бойко сетіс команда вөрзьөдчыны водзө. Ставныслы вөлі төдса, мый коли мунны медбөръя верстыяс, а сэсся воасны Еджыд ю

дорö. Гашкө, найöс сэнi катер нин виччысьö либö вертолётөн воласны? Асывсяньыс нем жалиттöг пöжис, кисьтiс йöзлысь пöсьсö, но налөн эз нин вöвны сьöкыд грузьяс: прибор-сö нуис Борис, Бойко — палатка, а Кузьма — рация. Обед дырйи кымөръяслөн лыдыс содiс ёнджыка, и шондiыс тшöкыдджыка заводитiс сайласьны на сайö: кымөр костьясыс век-няммысны. Шондi зiлис на мыччасьны, сьлөн шоныда малалысь кузь киясыс прöщайтчан-наа шыльöдiсны пуяссö. А водзынджык, вөр весьтас, горизонтланяс, кымöрыс вöли вевттьö-ма нин енэжсö. Пемыд. Сьöдовлöz.

Лöскутöдз косясьлём гач кэкъясöд да быз-далём плащ бöж доръясöд кватлалiсны по-нöльяслөн увьясыс. Быттьökö эз тшöктыны тэрмасьны: сувтлöй пö, виччысьыштлöй. Ва-сöдiньястi мунiгөн розьöсьсём сапöгъяс пиын болскöдчис ва.

Кузьма пошкис Борис бөрвылын. Туйыс кöть лёк, кöть бур вöвлi, сiйö некор эз радейт-лыв чöv овны, пыр мыйкö сёрнитлiс, юрыс пыр вöвлi тыр быдсяма мөвпъясөн. Но Кузь-малөн сёрниыс, гораа мөвпалöмыс некодöс эз сьöктöдлы, а тшöктылiс думайтны тшöтш мукöдсö. Со и öнi сiйö шыасис Борис дiнö:

— Борис! Кыдз думайтан, Лыабöжсянь татчöдз трактор вермас локны?

— Оз, көнкö,— Борислы тайö юалöмыс лои виччысьтöмөн.— Да, оз. Помнитан, тöрыт да войдөрлун кутшöм зыбуч нюръяс вомөн вү-джим — ставыс лайкъялö. Колökö, пытшкас пыдöсыс абу. Тракторыд бульк — и сэнi. А

мый тэныд тракторсьыс? Мудзин? Регыд нин воам туй помö.

Но Кузьма эз кыв сылысь юалöмсö, сійö висьталіс ассьыс:

— А ме думайта: нефтьсö ми аддзам. Но, дерт, огö ми, Бирюковлөн партияыс дзоньнас, шуам...

— А огö кө?

— Аддзам. Нефтьсö, дерт, ог аддзöй, а местаяссö, көні сійö овльвлö,— тэнад мышку-сайса пукалысьыд тöдö, петкөдлас. Гашкө, и петкөдліс нин! Оз вермы лоны, медым структураяс тані эз вöвны! Геологъяс надейтчöны. Тэ öд тöдан — нефть колантор öні. Местаясыс тані со васöдöсь — гөгөр нюръяс. Вернö вöчöмаöсь, мый гравиметрической разведка тані шуöмаöсь нуöдны. Сейсмика кө эськө тані аслас сьöкыд транспортнас дыр ноксис. Тöвнас эськө позьö жö да, но сэки зэв дона сувтас. А гравиметрической разведкаыс пö государстволы меддонтом сувтö... Локтасны татчö во мысти бурöвикъяс, а колökö, и таво на. Шызьöдасны лөнъ вөрсö тракторъяс, и, гашкө, миян туйöд жö и кыскас медводдза тракторыс медводдза бурöвöйсö. Прöйдитас таті, ме думысь, тракторыд, Борис! Дерт, сьöкыд лоас, но вольсаласны кражъяс да прöйдитас. Сійö аскиа гөстыс тані лоö. Миян бöрся. Интереснö: навернö, Лыабöжын лоас ыджыд посёлок, а колökö, и кар. Борис! Кылан? Ме эськө локті татчö техникум бöрын. Эк, мыйта на уджыс! А тэ?

— Ме? Меным окота видзöдлыны ассьыным странанымöс. Ме эськө муні Сибирö, либö

Войвылө, либө Дальнөй Востокө. Сэтчө, кытчө ыстасны, көнi ме коддьöмыс козмасны. Ыстасны кө, локта татчө асланым Коми мультысь озырлунъяссö тöдмавны, и ог нин ташшöм ноп тырөн подөн, а сiдз, медым тырвуйö используйтны техника, медым мукöдъяслы эз нин ковмы ташшöма пöсъявны жарыгысь шондi улас. Вот ми мый дыра нин ветлöдлам тайö участок вывтис, а вертолёт отсöгөн кө вöчны, лёка регыдья удж. А öд мян республикаын ыджыд местаяс на эмöсь, кытчö эз тувчывлы кокыс весиг прöстöй мортлөн, геолог да геофизик йылысь и сёрниыс абу. Мыйөн тöдан, гашкө, тани коркө лоö мөд Ухта либө Воркута. Колö öдйöнджык аддзыны найöс.

— Вертолётъясыс сiдзкө оз на тырмыны, сийөн и...

— Отря-ад, стой! Ать-два!— торкис Кузьмаöс Бойколөн шуткаөн сетöм командаыс.— Неыджыд совещание вöчыштны колö,— сийö пуксис пöрöм пу вылө да пидзöс вылас паськөдiс карта.— Со öни ми танöсь. Профиль помöдзыс ещö кык точка, сэсся куим километр колö мунны войвыв, медым петны медбөръя профиль вылө и сы кузя Еджыд ю дорöдз. Öни ми вуджам нюр, а öтилы ...— сийö видзöдлiс первой Борис вылө, сэсся синъяссö вуджöдiс Кузьма вылө, юрсянныс да кокöдзыс мерайтiс сийöс, быттьökö первойысь на аддзис, сэсся содтiс:— А Кузьмалы ковмас мунны веськыда нюр пöлöныс. Мунан сэтчöдз, кытчöдз он во профиль вылас. Узян места лöсьыдджыкöс корсь да виччысь мянöс, ми час кык-куим мысти воам. Бур?

Кузьма йоткыштіс балябөжланьыс кепкасө:  
— Пось чайон да музыкаон кута встречайтны,— тапнитіс сійө өти кинас рация, а мөднас — бокас ошалысь чайникө.

— Вот тэныд компас. Мун веськыда войвыв, нюрас эн пыр, смотри,— Бойко перйис морөс зепсыс компассө да разис цепочкасө, мыччис Кузьмалы.— А öнi вай тэрмасьыштамөй, нюрсө зэрмытөдзыс колө вуджны.

Минут вит кымын мунөм бөрын водзвылын воссис ыджыд эрд, тайө, тыдалө, вөлі карта вылас пасйөм нюрыд. Пуяс пөшти бырисны, а кодъяс и быдмисны — муртса көнсюрө лепитчышталөмаось вутш юр кодь мылькъяс вылө. Кузьма кежис веськыдыв да регыд саялі пуяс костө нюра-вөра вежөсас.

Борис муніс Лена бөрся. То өтилаын, то мөдлаын югъяліс ва. Ковмис восьлавны-чечавны вутш юрсянь вутш юрөдз, а кыті вөлі шыльыд, нитшка, мунісны видласьөмөн. Бойко медводзын, беддя.

«Тайө, тыдалө, медбөръя нюр. Сы бөрын...— Борис ыджыда лолыштіс. — Лыабөж! Галя! Мыйта кадыс коли! Кыдз-мый нин сәні бара? Вот сійө локтас Лыабөжө, и найө бара мунасны гуляйтны ю берег пөлөн. Гөгөр кыпид, лэбачьяс дзользьөны, вөрыс лолалө небыдика-небыдика, и Галя чужөм вылын сійө, мый медся окота адзыны,— Борислысь сьөлөмсө вөрзьөдан нюмыс...»

Кымөрыс пыр жмитчис и жмитчис вөр весьтсаянь воча, мырдөн. Вевттьөма енежсө отар помсяньыс да мөдөдзыс, рудөдыштөма неуна. Воддза нырыс муралігтыр матыстчис вель нин матө. Надзөник.



Кузьма муніс вель дыр нин, мунігмозыс шутляліс да корсюрё видзёдлывліс компас вылө. Но компасыс заводитіс мырдысьөн петкөдлыны нюр вылас. Компас зільөм вылө видзөдтөг Кузьма пыр восьлаліс нюра-вөра вежөстіыс моз. Но регыд сылы тыдовтчис виччысьтөмтор: вөлөмкө, нюрыс тайё местатіыс вожалө и өти вож пыр кусыньтө и кусыньтө веськыдыввлань, асиввыьвлань. Бойко жө та йылысь нинөм эз шу, сідзкө карта вылас абу пасйөма. Кутшөмкө геодезист картасө составитігөн, көнкө, лыддис нюрсө вывті ичөтөн и абу пасйылөма. Нюрыслөн кушиныс эськө абу паськыд да — Кузьма ывсыштис — метр кыксө, гашкө, лоас жө. Вуджны? А мый нө вөчан — дерт вуджны. Сійө босьтис нейджыд бөдь да пондіс чеччавны вутшсянь вутшкөдз. Видзчысьөмысла весиг пөсяліс. Джынсьыс унджык нин сійө муніс кушинсө, кызди друг уськөдчис кытыськө төв ныр, Кузьмаөс муртса эз шыбит гатшөн да нөбөд кепкасө. Гартліс да, небесаас качөдіг, нуис лысьяс, быд сикас өгсө. Повзьөмнысла бөрдзисны нюрдорса слабиник пуяс. И пыр жө пемдіс. Ыркнитіс. Воисны медводдза зэр тусьяс. Гырысьөсь. Öти шлөчкысис Кузьмалы бан бөкас да резыштис синмас. Водзын тыдалысь вөрланьсянь матыстчис ыджыд шыөн еджыдруд стен. Быттө сварщик электрод помысь сьвкмунлі лөзоват биөн, югдывліс син доймымөн муртса кежлө. И юр весьтас мыйкө чорыда гримгысис-уси да, ыджыд шыөн сяркөдчигтырйи, мөдіс гөгыльтчыны кодарөкө. Ыльөбтис зэр. Руд стенөн сайөдіс ставсө.

Кузьма пондіс тэрмасьны, медым өдйөджык воодчыны кушин мөдарас, пуяс дорөдзыс, но чотан кокнад сьөкыд котөртнытө. И кор коли нин метр ветымын кымын, вутш юр вылө чеччыштигөн, тэрмасигад эз артышт ылнасө, либө жө зэрыс мешайтис, и сийө вильснитис-сунгысис боквыв. Лайкъялысь нитш коркаыс поті, резыштіс няйтөн. Синъясыс и вомыс тырины нильөгөн. Сьөлыштіс.

«Рация!»— вирдыштіс юрас... Мыджесис кияснас чеччыны — киясыс розбөдісны кень кодь нитш коркасө да пырисны няйтас гыррдзаөдзыс. Муыс вөйи сы улын. Боквыв водөмөн удайтчис кыскыны кияссө. Сэсся кызкө-мыйкө сувтіс. Но кокъясыс вөйисны пидзөсөдзыс, няйтыс жмитис, топөдіс найөс. Кузьма видзөдіс кок улас. Кажитчис: няйтыс кайис вывлань, надзөникөн туис. Кокъясыс некыз эз кывны мыджөдсө, чорыд мусө. Друг көдзавліс мышкуыс, а сэсся лои жар, койыштіс пөсь. Неужели сибдіс? Вермас, вермас петны. Ёртъясыс... Ылө нин көнкө мунісны. Горөдлыны колө.

— Сувтлөй! Ого-о!

Но горөдігкостыс енэжас чорыда-чорыда трачкысис да заводитис дугдывтөг потласьны.

— Бори-ис! — повзьөмөн нин чукөстіс.

Кизьөр няйтыс өдйө кайис вывлань, ещө на өдйөджык сыысь, кызди вөлі збыль вылассө. Кузьма зілис мынтөдны кокъяссө. Кылө, нетшыштчис сапөгыс. Кокъяссө, лядвейяссө быттьө топыда гартісны бинтөн, вирыс ветліс сьөкыда. А няйтыс писькөдчис пыр вылөджык и вылөджык, косланьыс. Пессигас пөрччысьөм

коксьыс кок чуньяссө кӧдзыд кабырнас шамыртис няйтис.

— Сувтлӧ-ӧй! О-о-о! — бара горзис сийӧ. Но гым сяркӧдчӧм сор горзӧмыс кылис шырлӧн чипсӧм моз.

Колӧ жӧ шыбитны, пӧрччыны рациясӧ, кокныыджык лоас. Сийӧ пӧрччис мыш сайсьыс рациясӧ да шыбитис, мый вермис, сэтчань, кӧни вӧли зумыджык на нитш коркаыс, дзонь на. Вот ӧни прэзьӧ! Но кокъясыс эз шедны, эз вӧрзыны прамӧя, найӧс быттьӧкӧ кыскис кодкӧ увлань, пыдӧ. Кузьма быд ногыс зилис мынтӧдчыны тайӧ пленсьыс. Збыль ӧмӧй оз вермы мынтӧдчыны? И ӧртъясыс оз шыасьны, дерт, ылӧдз нин удитисны мунны. Оз кывны. И век на гымалӧ. Эк, збыль ӧмӧй тані пӧгибнитас?! Сӧмын на овны кӧсйылис, сӧмын на заводитис. И вот тэныд и на — случайнӧй вильсонитӧм! Кутшӧм мича олӧмыс! Оз позь, некыз оз позь кувны! Позьӧ ӧмӧй прӧщайтчыны тайӧ уджыскӧд, кодӧс сӧмын на тӧдмавны заводитисны и кодӧс эз на удитны весиг эштӧдны тайӧ участок вывсьыс? Кӧть мый, а оз, оз позь весиг мӧвлавны та йылысь!

Сийӧ пондис мый вынсьыс пессыны, зилис кавшасьны, мездысьны няйт кабырысь, чуньяснас парсалис нитш коркасӧ, но пессӧмсьыс сӧмын вӧйи пыдӧджык.

— Э-эй! — а син водзтис муртсаӧн котӧртис дженьыдик олӧмыс. Мам, бать, вок, и кызди найӧ колльӧдисны медбӧръя волігас сикт помӧдзыс. Бать малыштіс тошсӧ да шуис: бур туй пӧ, пиӧ. А мамыс чышкаліс синьяссӧ чышъян помнас, гӧрбыльтчыштӧма, видзӧдис и видзӧдис сы вылӧ. Дум вылас воліс

и школа, көні помавліс сизим класс, учительяс. Техникум. Ёртъясыс. Аслас сиктса суседкаыс.

— Катя!— өдва вермис и шуыштнысө. Морөссө топөдіс и тәпөдіс. Синсьыс пычкысис синва. Мездасны! Мездасны! Көть надеяыс и эз нин вөв, синва сорыс шуалис:

— Мездасны! Со матынөсь нин, эстөн пу саясөсь. Ө-ө-ө!— горөдіс мый вынсьыс, но төпөдөм морөссьыс кыліс сөмын слабиника ружөктөм. Няйтые инмөдчис вом дорас.

А зэрыс киссис и киссис. Көшысь моз, шувгөмөн.

## 8

Гырысь гыяс локталісны ю шөрланьыс да кучкалісны, резісны берегсө. Найө нөйтчисны, нөйтчисны и пыр слабмисны да слабмисны, кывтыдынджык сөмын нин сялькнитлывлісны, а ещө кывтыдланяс дзикөдз удитөмаөсь бурмыны: юыс шаньмөма. Сөмын кытсюрө чукрөдлө сійөс визулыслөн гижөдыс.

Еджыд ю кузя кайис неыджыд кельыдлөз рөма катер. Сылөн өтсеяма ропкөмысь чошкөдлісны пельяснысө вөрса олысьяс, юрнысө отарө-мөдарө бергөдлөмөн видзөдалігтырйи, колльөдалісны ю чукыльө саявтөдзыс да вунөдлісны сы йылысь шы ылысмөм бөрас.

Пётр Иванович мөдөд сутки нин пукаліс катер руль сайын, веськөдліс сійөс тайө төдтөм ю вожтыс. Юыс эз вөв ляпкыд, и катер лыбис бура. Ошпи вөлі пассажир пыдди, го пуклөс вылө сувтөмөн видзөдаліс өшинь пырыс ва вылас да бөрвыв пышйысь берег бөрся, то гөграліс прөдукта тыра ящик гөгөр.

Поповкөд сёрни бёрын сійө рыгнас жө Пётр Иванович и дасьтысис мунны. Вой шөр гөгөр, кор Лыабөжын лөнисны, и Попов, төдөмысь, тожө водіс узыны, сійө мөдөдчис кывтны Еджыд ю вомлань. Көть Леонид Семёнович нинөм вылө эз тшөкты вөрзьөдчыны, сійө тшөктытөг некытчө не нуны катерсө, водзө виччысьны тадзи, нинөм төдтөг, Пётр Ивановичлөн эз тырмы терпениеыс. Сы арталөм серти, отрядсаяслөн должен бырны нин сёяныс. А көнөсь найө? Гашкө, пурйөн нин кывтөны? Кывтныд, дерт, позьө, но юыс лөнь, мый дыра ковмас эськө. Кывтнытө лөсьыд, кор шуйга киад эм мый кутны и паньыд оз мешөкын куйлы! Кор сёяныд кизьөрмас, и сөнъясыд личалөны. А пурнад кывтны зэлыдөсь на колөны сөнъясыд. Попов, ок, и видчө, көнкө, матьөн и быдтор казътывлө, навернө, бөрө-водзө контораті шаркъялө. Гөгөрвотөм морт! Оз кө өд ньөти сылөн сьөлөмыс вись-а? Мыйкө рацияыс оз уджав да оз лөсьөд ни, оз куж өмөй, а ещө ошйысьліс приёмник пөчинитөмөн. Кыдз нө позьө йөз йылысь мөвпавтөг?! Мыйкө таво Бирюковыс на эз тыдовгчывлы ни, Попов вылө зэв ыджыд надеяөн олө. Эк-эк-эк! Поповыс таво аслыссяма жө и, тайө клубса завыс бөрся вөтлысьө да сійөн ли мый ли? Вескыда кө шуны, кольөм воясө эз жө прөзевайтлы, но кызкө дзик тадзсө эз лолы, медым удж йылысь вунөдны.

Пётр Иванович казяліс берег. доръясысь керасьөм туйяс, сувтавліс, кайлывліс берегас да горзывліс, но некод некөн эз чукөстчыв сылөн горзөм шыө.

Ю вылõ надзõник лэччис гожся лõнь рыт. Гагъяс вылõ ли мый ли гыбалис чери, а гашкõ, и прõстõ ворсõдчис. Отмоза ургысь мотор шыõ Пётр Ивановичõс пондис вугрõдлыны: тõдчисны прамõя узьтõм воддза войясыс. Сийõ матыстчис берег дорас да домасис вой кежлõ. Пусьыны эз кут, кыкõн ошпикõд найõ сейисны воддза колясьяссõ да гоз-мõд консерв банка. Пётр Иванович мелиа, морткõд моз, сёрнитис ошпикõд, тапкõдис сийõс.

— Закусит, давай, закусит. Тэ, зонмõ, чась часõ мойдын моз быдман. Тадзнад кõ, регыд ачымõс сёян.

А ошпи мурõстльвлис, быттьõ вõли сõгласитчылис ськõд.

Ужын бõрын Пётр Иванович лõсьõдчыштис катер пытшкас да водис узьны. Ошпи водлис жõ сы бокõ. Мудзõм завхоз заводитис регыд шкоргыны ныргорõн. А ошпи эз на думайт узьны. Сийõ сувтис, матыстлис ныр-вомсõ Пётр Иванович чужõм дорõдз, гашкõ, думайтис: мый пõ бара тайõ? Синъяссõ куньõма, а сёрнитõ. Гõгõрвотõма сёрнитõ. Гашкõ, ворсõ ськõд, мурзõ? Нюлыштис завхозлысь щõкасõ, но Пётр Иванович ун йывсьыс сõмын тяпнитис вомнас да бергõдчис бок вылас. Ошпи видзõдыштис, виччысьыштис и йõtкыштис катер пытшкысь петан õдзõссõ. Петигас бергõдчылис Пётр Ивановичлань: ладнõ пõ, ладнõ, вай инõ ворсам. Ме дзевсьыла, а тэ корсь. Палуба вывти ошпи воõдчис катер нырõдзыс да чеччыштис берегõ. И пыр жõ повзис, кодкõ сьõдов шпалгысис берэгсьыс ваас да. Оти здукõн лои кыр йылын да шуркнитис-кайис нейджыд кыз пуõ. Гõгõр кылис аслысьяма

дук — тѳдтѳм и тѳдса, чѳскыд и чѳскыдтѳм. Недыр олыштѳм мысти сійѳ надзѳник лѳччис муас, видзѳдалігтырйи да исасигтырйи заводитіс тѳдмасыны матігѳгѳрнас.

Асыввылын петіс тѳлысь. Гѳрдов, ыджыд. Пуяс сайѳ сайласигтыр сійѳ яндысянаа видзѳдчис енѳжсянь му вылѳ.

9

Медбѳрѳя профиль!.. Приборѳн пикетѳяс дорын удѳжалігмоз Борис, Лена и Бѳйко му-нісны нин тайѳ профиль кузяыс часѳн-джын-йѳн кымын, бѳр вуджисны ыджыд нюрсѳ, но некѳн эз тыдав ни тшын, ни Кузьма. Первойсѳ чайтисны, мый эз на воны колана местаас, но карта серти тыдовтчис: колѳ нин лоны Кузьмалы. А Кузьма эз вѳв.

Борис ещѳ шутитыштіс на: Кузьма пѳ, кѳнкѳ, Еджыд юлань матѳджык веськѳдчис, мед аски кежлѳ этшаджык кольѳ мунны. Но мыйкѳ дыра мысти шуткаяс бырисны.

— Кузьма-а! Кузьма-а-а!— горзисны ѳтув, но вочасѳ некѳд эз шыась.

— Вѳши!— тыдалѳ, думнас асьсѳ видіг, шуис Бѳйко.— Ѳд компас вѳлі, и висѳтавлі, кыдзи колѳ вѳлі татчѳ воѳдчыны. Удж пома-лігѳн воши... И сѳянным бырѳ нин...

— Менѳ колі ыстыны,— шыасис Борис.

— «Менѳ», «менѳ»! А тѳ тожѳ ѳна эн ошысь. Колѳкѳ, тадзи жѳ и сѳк лои. Некѳдѳс абу колѳма ыстыны. Жалитышті кок понда-ыс да вот на... Но, мый? Қорсылыны колѳ заводитны,— видзѳдліс сійѳ Борислань да Леналань. Найѳ гогнитисны.— Лена, кольч-чан, биась да мый да, а ми Борискѳд ветлам.

Сійö лыйис пищальысь кыкысь дорвыв, но вөр'ыс сөмын юркнитліс и ставыс.

Борис öдйöджык пунктіс коз улö гравиметр-сö да котөрөн сорөн уськөдчис сэтчаньö, кысянь должен вöлі локны Кузьма.

Бөрвылас, кылö, мыйкö горзис Бойко. Но мый сылөн горзöмысь, кор Кузьма абу? Гашкö, Кузьма кытчöкö воши? Гашкö, лёктор лочис? Быдторйыс öд вермас лоны! Борис тэрмасьöмөн муніс нюр бокті. Гөгөр видзöдаліггыр сійö чеччаліс вутшкысь вутшкö. А сьöлöмыс котөртіс асьыс водзынджык, тэрмөдліс: Öдйöджык! Öдйöджык! Но тэрмасигад öд кодарö на удайтчас. Öтилаö джөмдыліс да бузгысьліс ваö, коскөдзыс. Вутшкö кутчысьöмөн заводитіс кавшасьны и сэк сөмын казяліс сьökыда лолалысь Бойколысь мыччөм кисö.

Код төдас, мый дыра найö ветлөдлісны нюр вывті! Öта-мөдныслы кыв шутөг, но, Кузьмалы горзиггыр, Бойко да Борис гежмалісны нюрдорса вөрсö, верстысь ылөджык нин ылыстчисны Ленасянь да воисны нюр вожаланінö. И пöшти пыр жö нюрас неылын кутшөмкö няйт гөп дорын тыдовчис ёкмыль.

Бойко видзöдыштіс недыр сэтчаньö, сэсся босьтіс вөр дорсьыс нейджыд косьмөм пу да воськовтіс сылань:

— Нолтö, видзөдлам, мый сәні.

Борислөн морөсас чеччаліс сьöлöмыс. Сійö тожö кватитіс кутшөмкö бедь да сувтіс лайкьялысь нитш ылö.

Кашкиггыр пу да бедь отсөгөн найö матыстчисны сьöдалысь ёкмыльлань. Ёкмыльнас вөлöма джынвийö няйтö вөйөм рация, а Кузьма некөн эз тыдав. Сөмын рациясянь



метр-мод ылнаын нитшкыс кульсьома, жугла-сьома да сәті тыдаліс ва сора лөзоват няйт Бойко суйліс бедсьо тайо кизьор няйт пиас, гудрыштіс пөв-модысь. Некытчө эз крукась.

И ньөжйоник, жугыля пөрччисны юр выв-сьыныс кепкаяснысө.

Борис эз на чайт, мый другыс збыльысь вөйи, мый сәсся некор нин сийо оз ло орччөн да некор оз кыв сылысь шмонитөмсө, но, кор видзөдліс да адзис кисьыс кепкасө, друг пуксис Бойкоон вайом пу вылө да тупкис кепканае чужөмсө.

— Кузьма, Кузьма-а,— быттьо чашйисны сылысь морөссө да топөдлісны сьөлөмсө.

Бойко жө сулаліс зумыш, чөв, пельпомьясы өшйөмаось, юрсө копыртөма.

...Вөр бердын трачкөдчис бипур, косьтіс йөзлысь паськөмсө. Йөз пукалісны лөня. А мый йылысь сёрнитан, кор горш діныд гөрөда? На пиысь өти пыдди тайо рытнае бипур дорын куйліс няйтсьом рация. Куимөн видзөдісны рация вылө, тайо ичөтик ящик вылас, коді адзывліс Кузьмалысь медбөрья минутьяссө, коді кывліс медбөрья кывьяссө, и ставныс быттьо кутісны кедзовтны тайо ящиксө. Морт вөйи, а тайо ящикыс куйлө өні тані, накөд орччөн. Но некод эз шу кыв ни джын. А кадыс котөртіс и котөртіс. Лэччис нин горизонт дорөдзыс кымөрьясысь прөст-мөм енэж вылысь шондіыс, лөсьөдчис узьмөдчыны вөр, но эз узьөмөдз вөв тайо рытнае йөзлы.

Найө пукалісны.

Мый йылысь думайтісны? Мый налөн вөлі сьөлөманыс?

Лена видзодіс-видзодіс рация вылө, сэсся друг копыртчис да чеччис места вывсьыс. Когөрөн ылыстчис би дорысь. Эз позь водзө кутны чукөрмөм синвасө, коді ойдөдіс синъяссө. Бойко ни Борис некоднанныс эз вөтчыны сы бөрся, медым бурөдны. Да мыйла бурөдны? Кызди бурөдны, кор ассьыд сьөлөмтө чашйөны? Бойко видзодіс биас, киас папиросыс кусөма. Кулі морт, гажа морт... Кузьма... коді өнтай на көсйысис встретитны найөс пөсь чайөн да музыкаөн. А кодлы колас та-тшөм «чайыд»? Эк, Кузьма, дасьтін тай тэ медся жугыль «музыкасө». Иван Григорьевичлы дум вылас воисны Попсвлөн кывъясыс: «Видзөд на бөрся». Вот и видзодіс. Мый сэсся өні лоө? Воасны Лыабөжө, а сэсся локтас карысь милиционер да пондас юасьны, кызди да мый лои, кывзас да гижас протоколө, а ачыс вермас и не веритны, быть, дерт думыштлас: гашкө пө, пөръясьө Бойко, гашкө пө мортсьыс мынтөдчисны. А сэсся, кэлөкө, и аскөдыс нуас. Суд? Морт виысьөс пыдди пуксьөдасны подсудимөй скамья вылө. А виис али эз сійө мортсө? Виис?! Кузьмаөс?! А код төдас, абу өд тай нин мортыс ловъя? Гашкө, и виөм кодь лои? Позьө өд вөлі не ыстыны, эськө тшөтш и өнөдз на накөд вөлі, пукаліс эськө бипур дорын да гажөдіс ставнысө. Жалитөмысла ыстис, медым лишнөй дас верстсө чотан кокнас не мунны Кузьмалы, медым веськыдалас да шойччыштас. Шойччыштас... Да, өні сійө шойччө. Эк! Төдін кө эськө, көн смертыд ветлө... Син вылас уси рацияыс. Ньюжөдіс кисө, матыстис, весыштис няйтсө сы вылысь да включитис. Но рация эз уджав.

Перйис футлярсьыс крышкасö да пондiс кутны би весьтын. Мед косьмыштас. Гашкö, аски удайтчас сёрнитны, корны Еджыд ю дорö кушöмкö транспорт. Нюръяса участок эштö, регыд Печора мöдар берегас ковмас уджсö нуöдны. Первойсö кö сэнi уджалiсны, и Кузьма эськö ловйöн коли. Эз кывзысь сэки сылысь Попов. Проект. Дерт, Попов, гашкö, и прав, эз кöсйы ас вылас лишнöй груз босьтны. Но олöмыс мунö водзö, а друг кö тайö проектс яс важмис, шуам, да талунъя мог серти уджсö нуöдны колö? Но, кажитчö, та йылысь не сылы думайтны да не öнi, кор... А мыйла не думайтны? Уджалысьыс сийö, сiдзкö и думайтны должен сийö. А мый думайтöмсьыс пöльзаыс? Думайтлiс тай, кызси сылы вöчны бурджыка, но нинöм эз артмы. Эз кö артмы, колö вöчны, мед артмас. Мед артмас!.. Иван Григорьевич жмитчис плешнас рацияас.

— Кузьма, Кузьма! Эг жö тшöкты нюрас пырны... Тöлктöг!— гораа шуис сийö бөръя кывъяссö да скöрысь сьöлыштiс вомсьыс кусöм папироссö.

Борис эз кыв сылысь шуöмсö, сийö адзис сöмын рация. Мыйла Бойко ыстiс Кузьмаöс? Вермис öмöй, кужис öмöй думыштны, мый лоас тадзи? Тöдiс кö эськö! Кузьма! Куим вочöжся друг! Позьö öмöй нö думыштны, мый гэ сэсся абу? Гашкö, тэ кежин эсийö вөр дiас да сэнi пыр дуригмозыд шпынъялан да видзöдан миян вылö? И друг дышöдас дурнытö да петан пу сайысь, висьталан кутшöмкö шутка, кодысь петас серам, и ставыс лоас важкодъыс? «Кöкöй-кöкöй, кымын во нин...» Эз збыльмы тай кöклөн висьталöмыс. Но кодi нö

локтас татчө тэ пыдди, кор воасны медводдза гракторъяс, бурөвөйяс, кор шызясны тайө местаясыс? Гашкө, тэнад туй вылысь сюрас нефть, качас фонтанөн. А тэ тайөс он нин адзыв. Некор, некор! Көні тэ, Кузьма?! Көні?!

Борис котөрөн лэччис нюрлань, гөлөсыс юковтис сынөдсө — чермунли вөрыс:

— Кузьма-а-а! Кузьма-а-а!

— Ма-а-а! — отсалис йөлөгаыс.

Борислы сюри ки улас бедь да мый вынсыс лыйис сійөн нюрас. Кулакъяснас грөзитис нюрлы.

Көнкө неылын кыліс булькнитөм и лөнис. Борис бара эз вермы кутчысьнысө, сылөн тіралісны пельпомъясыс.

Кытысянькө кыліс жыдачлөн ли кодлөн ли гетшкыштөмыс да неылын буксыштіс сюзь. Помтөг зыньгисны номъяс да гебъяс.

Кыр горулын гусьөник сялькөдчис ю. Лөньөма вөр. Унмовськөдчө. Сэзь енэжыс уналаті розьөссьөма да розьяс пырыс тыдалөны би югөръяс. Лыабөжысь мунөмсянь галун медводдзаысь найө эз зэвтны палатка. Мудзисны. Вольсалисны палаткасө лысьяс вылө и Иван Григорьевич Борискөд нюжөдчисны сэтчө. Олөны чөв. А, гашкө, и узьөны да? Төрытсянь оз прамөя сёрнитны, Кузьмалөн кулөмыс өшйис на вылө шыбитны позьтөм сьөкыд да ыджыд грузөн. Борис ас кежас мыйкө век думайтө, думайтө, а Иван Григорьевич, сы вылө видзөдөмөн, тшөтш; весиг Лена дорөдз кыв-мөдөн сөмын и шыасьліс. Гашкө, өта-мөд выланыс дөзмисны да? Онтай, шойчигөн, кор Лена локтис чөдлач вотанінысь, найө мыйкө сёрнитөны вөлі, споруйтө-

ны, но мыйён Лена матысмис матоджык, дуг-  
дисны. Лена кывліс сөмын Бойколысь буркни-  
төмсө:

— Ме мыжа! Отнассө ысті төдтөм вөрті.  
А нюрсө неправильнө карта вылас пасйөма-  
өсь.

Борис, кылө, өлөдіс сійөс:

— Чөв! Некод, зонмө, тэнө мыжаён оз шу.  
Мыждыны..— Ещө на мыйкө көсийс содты-  
ны да казяліс Ленаөс.

И быттө кыкнанныслы лои гажаджык —  
друг горша уськөдчисны вотөс вылө. Но ку-  
тшөм нин вермас лоны гаж, кор синваыд дор-  
шасьө? А Иван Григорьевич кыкис нопйысь  
газетшой пиө тубыртөм кык рудзөг сукар  
да мыччис Леналы:

— Со тэныд... Ми тэнад ветлігкості сөйим,  
колясыс ноп пыдөсын вөлөма да. На, на —  
но синъясыс вочаасьлісны Лена синъяскөд  
да пышйисны бокө. Борис тожө докйөдліс  
юрнас Бойко кывъяслы: збыль пө висьталө.

Лена шензьөмөн босьтіс киас сукаръяссө.  
Кызд нө мый? Төрыт рыт ачыс гурйис нопъ-  
яссө да төдө: сэтчө нинөм нин эз кольлы.  
И со тэд, сукаръяс, посныдикөсь. Вывті  
посныдикөсь, но сукаръяс. А, гашкө, тайө  
на пиысь, сійө квайт пытшсьыс, кодъясөс тө-  
рыт кыскаліс ужын дырйи. Медбөръясыс.  
Морт вылө кык сукарөн и воис. Лена видзөд-  
ліс сукаръяс вылө и төдіс. Төдіс на пиысь  
өтисө. Кык сукар сійө сетліс Иван Григорье-  
вичлы, со өти сукарыс бара киас. Төрытья!  
Дзевлөмаөсь! А талун... со кызди. Но өбед  
кө, и мед өбед!

— Вай сідзкө, сёйштамөй,— да торйөдіс сукаръяссө куйм пельө.— Ме тожө сёйи. Тöрыт öти сукар зептö кольлі да.— Борис да Бойко эз эскыны, тыдалө.— Да, да! Сёйöй вотöс сорнас.

«Обедайтөм» йөз, быттö мыйыскö поліг-тырйи, надзöникөн босьтисны сукарторъяссө, а газет колясыс шпоркнитіс төвсьыс да, турунө крукасьлігтырйи, котöртіс вöрас.

А рытланьыс нин найö воисны тайö ю дорас. Кажитчө, Еджыд юөн шусьö. Мудзөм кокъяс кызкө асьныс зілісны кусынтчыны, кыскисны муланьыс, шойччыны. Ю боксьыс адзисны сэтөр кустъяс да вель дыр öктысисны сэн. Сэтөр сёйигөн Леналөн пельясыс быттö кытыськө кывлісны мотор шы.

— Самолёт!— енэжысь корсьысигтыр горөдіс сійö мукөдыслы, но шыыс кытчөкө воши. А, гашкө, и прөстө кажитчис сөмын да? Мукөд дырйиыс, виччысигад, быдтор мотор шыөн кажитчө. Борис кывзысьыштіс жө да шуие вом тырнас:

— Мөдарас сизь кокасьö.

Матысмис вой. Иван Григорьевич да Борис узисны, вевттысьсөмаөсь ном-гебйысь ноп мешөкъясөн. Ваня! Рөднөйяс! Матысса йөз. Биыс югдөдыштө найөс. А Лена бжынджык пукалө пöрысь коз улын. Кузь сук лапъясыс коз пулөн куйм боксянь лэччөмаөсь муөдзыс, а öтар боксянь восьса, быттö öдзөс. Оз ков и палатка. Лөнъ. Шоныд вой. Таво вылө, гашкө, медбөръяяс нин? Регыд пужъявлыны кутас. Войвылад öд дыр оз думайт. Прамөя нин пемдывлөны войясыс, ыркнитлывлө асьядорыс. Воисны нин кутшөмсюрө турунъяслөн

көйдүсүясыс, да төлыс разодіс найос вөр пасьталаыс... А коз пу улын лөсьыд пукавны, кылө сир дук. Тодса сир дук. Тайө козйыс мыйонкө откодь Лена пөлькөд, коді коркө (Лена сэки ичөт на вөлі) вайлывліс вөрысь сус коль да ниа сир. Сирсө няклявлісны школаын велөдчигөн на. Но сэки пөлыс эз нин вөв, унджыкысьсө няклявлісны коз сир. Вот мыйон, вөлөмкө, и тодса тайө дзормөм нэмөвөйся козйыс?!

Ю мөдар берегас вугралісны татшөм жө козьяс, гырысьсөсь, кузь тошкаось. Ота-мөднысө сайлөдлісны кыптысь төлысьлөн слаби-ник югөрысь. Найө быттьөкө тшөктісны узыны и Ленаос: куньсыны мөдісны синьясыс. А кыр бокын дзольгысь шор эз тшөкты кывзыны налысь, нуис ассыс этшаник васө юө, сьыліс гожөмбыдса сьыланкывсө.

Аски найө вөчасны пур да, оз кө лок катер, видласны кывтны ю кузьяс. Гашкө, кутшөмнибудь кыйсян керка воас, а Борис шуө, кыйсян керкаын пө быть должен лоны сөян запас. А кор на воасны Лыабөжө! Шойччасны, материал обрабатаятасны и бара, гашкө, ковмас мунны. Но өні сы йылысь водз на мөвпавны. Кызди Попов видзөдлас. Вермасны сійос и не босьтны. Шуасны: Кузьма пө со зон вөлі и то... Но, но! Видзөдлам, мед пробуйтласны шуны сөмын!.. Мунлісны Лыабөжысь нельөн, а вот колины куимон. Оз и веритсьы. Збыль өмөй Кузьма коли тайө вөрас? Нэм кежлө? И некор сэсса не аддзывны нин сійос? Техникумө пыригөн куим во сайын өттшөтш сдайтісны экзаменьяс. Быттьөкө детинка на и вөлі сэки. Син водзын быдмис, кре-

паммис, но нюмыс да мелі кыв-ворыс пыр  
кежлө колины сійö ичöтик зонкаыслөн, коді  
экзаменьяс вылын зільліс гусьöникөн от-  
сасьны мукöдъяслы. Иван Григорьевич пере-  
живайтö жö, ас ногыс, Борисысь гусьөн. Кык-  
нанныс нускöны. Мыж йылысь кö сёрнитны,  
ми ставным мыжаöсь. Некод öд тай он тöд,  
кор мый суас. Тöдан кö вöлі, ыстисны öмöй  
öтнассö? Чотöм пондаыс жö... Мый сійö бать-  
мамлы гижны? Кутшöм ыджыд шог!

Леналөн аслас тюргис синваыс, чышкаліс  
ки мышнас банбокьяссö. Недыр мысти, лö-  
ньыштöм бöрын, лэдзчысис юрнас коз пу бер-  
дö. Ыдждіс мöдар берегса козъяслөн шöп-  
кöмыс, вевттис шорлысь сьылöмсö. Лена ву-  
гыртіс. Со сійö гортас нин, кöсйö джодж  
мыськыны. Ветек корсьö, но некөн ветекыс оз  
тыдав. А пызан вылын нянь кудйын мича  
булкияс. Сёйыштны? Нюжöдчис, босьтіс öтиöс,  
мöдöс. Сёйö. Сёйö, а век колö, век кынöмыс  
оз пöt. Булкиыс этша нин и коли. Тырмас  
сэсса, а то мамыс пырас да оз ло лöсьыд  
сыысь, ставсö сёяс да. А булкияс асьныс и  
пырöны вомас. Но кöні нö эськö ветекыс?  
О, да сійö тазйын, вöлөмкö, а Лена оз и аддзы.  
Кöсйис на копыртчыны, судзöдны ветексö,  
а ветекыс ачыс нин чеччыштіс тазсьыс да  
нюлыштіс кисö. Сэсса мöдысь, ёнджыка нин.  
Лена садьмис. Восьтіс, тільыштіс синъяссö и  
друг аддзис аскöдыс орччөн кодöскö сьöдöс,  
ыджыдöс, вөрöшитчысьöс.

— А-а-а!— коз увсьыс чепöсйигмозыс лёк-  
горшөн артмис сылөн.

Борис да Бойко син лапнитігкості лоины  
кок йыланыс:



— О? Көні? Мый?

— Э-эстө-өн! К-к-коз улас, с-со!

Бойко кватитіс пищальсө да көсйис шин пезьдөдны, но Борис воськовтіс сылань да друг лэптыштіс пищаль стволсө:

— Ноко, виччысьыштлы. Сэні...— босьтіс бисьыс гөлөвня, лэптіс юр весьтас—... сэні, тыдалө, ошпи. Вай огө повзьөдөй. Удайтчас кө, кутам— Пётр Ивановичлөн кык лоас.

— А мамыс кө тані шөйтө матын?— Бойко кутіс ружьесө дасьөн. Но, сійө кывъяс вылө видзөдтөг, Борис заводитіс ньөжйөнник матыстчыны коз пулань. А коз бердө жмитчөм ошпилөн, тыдалө, прөйдитіс жө повзьөмыс, сійө петіс пу улысь да матыстчыштөм бөрын сувтіс бөръя лапаяс вылас. Голясьыс тыдовтчыштіс летъялысь тасма пом.

— Но-о, вот тэныд и на! Тайө жө Пётр Ивановичлөн ошпиыс. Со, видзөдлөй көть.— Борис уськөдчис ошпилань, малыштіс сійөс, окыштіс плешкас.— Эк тэ, «первой сорт «Б»! Кыдзи тэ татчө веськалін? Көн көзяиныд?

Но ошпи эз куж сёрнитны, сійө толькө му-рөстльвліс да, быдөн дінө матыстчывлігөн, сувтльвліс бөръя лапаяс вылас да исавліс зепъяснысө.

— Сакар корсьө. Эк тэ, «первой сорт «Б», абу өд мян сакарыд ни сукарыд,— меліа малыштіс да жугылиника шуис сылы Борис.

Узьөм вуні, быттьө төв нырөн нөбаліс. Завхозлөн кө ошпиыс тані, сідзкө и ачыс абу ылын. Но мыйта эз зільны төдмавны ошпи-лысь; кодарын көзяиныс, сійө сөмын бергаліс на гөгөр, некытчө эз мун на дорысь, некодарө

эз нуод. Қор тыдовтчис, мый ошпиысь төлк оз ло, Бойко шуис:

— Лэччамой кывтыд. Лена, наверно, збыльысь кывліс мотор шысö. А катерыс кө катыдын, ми дырджык долженось кывны шысö: веритны кө карталы, юыс ёна чукльöдлö. А збыль кө катыдын, Пётр Иванович ошписö корсыны модас да аддзас мянлысь шойччан местанымöс. Пас вöчыштам.

Заводитіс югдыны. Найö тувъялісны куим майог да йылас öшöдісны рос. Пудорйысь вöчыштисны стрелка модааос, коді индіс кывтыдлань. Мөдөдчисны берег пöлөн. Ошпи кольччыліс на, но недыр мысти суөдіс жö. Пөрөм пуяс да понöльяс пыр часөн-джынйөн пискөдчөм бöрын аддзисны берег дорысь катер. Гөгөр вöлі шыч ни рач, сөмын кыліс Пётр Ивановичлөн корскöмыс. Надзöникөн кайисны катер вылö, пырисны пытшкас. Бойко инмөдіс кок нырнас Пётр Ивановичлы бокас, шуис мудзөм гөлөсөн:

— Чеччы нин, плешкыд гождьялас!

Пётр Иванович садьмигмозыс жö шыбитчис, жмитчис борт бокас, синъясыс кольчаасьлісны. Сэсся чинісны надзöникөн. Упнитіс:

— Уп! Тайö ті?! Тайкө весьөпöртанныд!— гажаа катласисны сылөн лөсьыда гартыштчөм усьясыс.— Но кыз-мый?!— сэсся уськөдчис видны ошпиос.— Тэ нö мый он висътав йöзыслысь лөктөмсö, прөстө дзик тэнö верда. Вермин кө увтыштны ли мый ли көть, а то стынитан-узян, дась нянь сөйысь.

— Тайö узысыыд и садьмөдіс мянөс-а. Тасянь верст вит-ö-квйт сайын. Эн зонмö, увгы сы вылö.

— Но-о?— меліа видзёдліс ошпи вылө Пётр Иванович.— Ми жө тшөтш водлім. Ха-ха. Наян өд, пыр и ылөдас. Сакар. Сакар та-ысь ковмас сетны,— тапнитіс ошпиөс.— Но, а тіян? Тырмис сёянныд? Аддзинныд? Мыйкө тай рацияныд тшыксис али мый? Попов век висьталө, он пө шыасьлөй. Связьтөгыд сэсся дзик нин омөль.

— Ме тшөктылі Леонид Семёновичлы... Вай куритөд көть.— Бойколөн чужөмыс лои стрөг.— Мунігөн на шулі сылы, мед сёян шы-битас 256-өд пикет дорө. Да и тэ ачыд тшөтш вөлін, буракө. Убөлитөма өдва-өдва. И то өтитор эм, мөдтор абу. Пыр лои джын сөйө-мөн бөръя кадсө уджавны, видзтыны. Мыйкө сійө думайтө оз сэні? Рация миян век уджа-ліс, Лыабөжысь өтдор быдөнөс кыліс. Жаль, Усть-Усалысь волнасө мунтөдз эг төдмав.

— 256-өдө, шуан?— Пётр Иванович корсьы-сис паметьсьыс.— Вертолёт волігас ме ещө юалі сылысь да шуис... энлы, энлы... шуис, 189-өд дорө пө нуөй. А меным помнитсьө вөлі, мунігад тэ казтьывлім 256-өд йылысь. Юалөм-ыс сылысь стөчджыкасө эз ло, муніс кытчөкө да воши. Ме нин ас нимсянь лётчикьясыслы тшөкті кыкнанлаас ичөтикаөн нуны. Ме жө эг төд, гашкө, мыйкө тіян вежсис. Вунөдіс, сідзкө, трустыд.

— Пасибө, Пётр Иванович. Не тэ кө, ми сідзкө прөдуктатөг колим эськө. Но ме жө...— Бойко заводитіс волнуйтчыны.— Мунігөн жө пыралі и висьталі сылы... Мый сэсся сійө сэні вөчө, мый чөртсө? Мыйла связьыс абу?..

— Меным делө ичөт, но висьтала жө,— ко-пыртчыштіс Пётр Иванович.— Меным мыйкө

таво оз кажитчы сійö, торъя бурыс эськö не-  
кор эз вöвлы да. Ме со татчö вои, а сійö вич-  
чысьлыны на тшöктö вöли, водз на пö. Шуры-  
муры сылөн, буракö. Гашкö, сы вöсна...  
Мыйкö тай клубса завыс бöрся вöтлысьö-а.

— А Бирюков? Эз на жö волы?

— Эз. Мукöдлаын уджыс уна ли мый ли.  
Вөрзьöдчам али мый? — Пётр Иванович гö-  
гортис видзöдласнас ставнысö. — Тi жö нельöн  
мунлинныд?

— Да, нельöн... Öтиöс воштим нюрын, —  
дыр мысти вочавидзис Бойко.

Пётр Иванович сэсся нинöм эз шу, сöмын  
довкнитыштис некымынысь юрнас, öшйисны  
ус помъясыс, пöрысьмис чужöмыс. Петалис,  
мездис катерсö и пуксис руль сайö. Сярöбтис  
катерлөн моторыс, сыркакывны кутис ачыс,  
кытшовтыштис да ю шöртйыс пондис тювкйы-  
ны ва нылыдыс. Сёйыштöм бöрын Лена пон-  
дис вугравны. Бойко видзöдис öшинь пырыс  
берег вылас, но код тöдас, аддзис-ö берегсö,  
а Борис петис палуба вылö.

Поткöдö лөнъ ю веркөссö катер, гызьöдö  
бөрвылас васö винтыс, вöтлö юлысь ва ныръ-  
яссö. Но ва ныръясыс ёнөсь, визулөсь. Найö  
шывгöны-кывтöны ю вомлань, вочасөн öт-  
лаасьöны мукöдъяскöд да ыдждöны и ыдж-  
дöны. Но абу ставыс öткодьöсь найö. Со, бе-  
регляяс вабергач. Вабергачыс ва ныръяссö  
кватитöма да гöгрöдлö, оз лэдз паськыд ви-  
зув вылас. Со улынджык кузь лөнъ куръя.  
Сэтчö, көнкö, веськалисны слабиник ва ныръ-  
яс, визув вылö бөр петны эз вермыны, и  
нюйтмисны-дуркмисны сэни... Окота абу на-  
лы петнысö сөдз визув ваас? Кыдзи найö пе-

гасны? И петасны-ө? Гашкө, ытва отсөгөн сөмын. А унджык да ёнджык ва ныръясыс визувтөны ю шөртийс. Наын юыслөн выныс. Найө туй пискөдөны. А туйыс абу кокныд, абу дженъыд. Мунигас паныдавлөны быдсяма мытшөдъяс, да и косъмөны, рудзалөны. Сэки на пыдди локтөны выляс. Сэтшөмөсь жө, весиг ёнджыкөсь. Тадзи и олөмын... И йөзыс ва ныръяс кодьөсь. А коді на пиысь шөрас? Дерт жө, Бойко, Пётр Иванович, Лена. Лена көсийө пырны институтө. А ачыс сийө? Лыабөжысь мунигөн на вөлі полө, а өні сөкся думъяс вылө прөстө серамыд петө. Вөлөмкө, уджавны вермө и ньөти абу слаб сийө. Но ачыс оз на төд: шөрас-ө, көні? Гашкө, и бокитіджык на мунө, вермас на и вабергачьясө сюрлыны. Кузьма эськө пыр, навернө, шөртийс муніс, эз кежавлы некытчө, некод эз вермы кежөдны! А Попов? А Галя? Көні нө налөн местаыс? Кыті олөмтийс Галя мунө, шөртийс али бокиті, али вабергачын жө? А, гашкө, куръяын да?

Сідзкө весь радліс сыысь, мый аддзыяс Галякөд... Кымын узьтөм вой вөлі, мыйта дум вөлі Галя йылысь... Неужели тайө ставыс весь?.. Пётр Ивановичлөн кывъясыс тайөс ставсө нөбөдісны кытчөкө ылө. А вермис өмөй лоны мөд ногөн? Сийө жө мунигас эз висьтась Галялы? А Галя, колөкө, коркөя мозыс виччысис сысянь сьөлөмсө вөрзьөдысь кывъясь?.. Яндысьысь мортыд бөб кодь жө овлө, да мый сэсся вөчан! Галя кө сідз вөчис, но и мед! Мед лоис кө сідз. Попов, буракө, абу омөль морт. Дерт жө, сыысь, Борисысь абу омөльджыкыс. Көть Пётр Иванович и вись-

галіс мыйсюрö, сылөн кутшöмсюрö öшыбкаяс  
йылысь, но кодлөн найö оз овлыны. Найö вот  
куимöнöсь öнi, а вöліны нельöн... Воштісны  
Кузьмаöс. Вот воа Лыабöжö и первой аддзы-  
сигөн жö и поздравита Галяöс. А Поповöс?  
Поповкөд абу тöдса, и сійö начальник. Абу  
лöсьыд... Но, а кызди нö? Оз, оз позь тадз!  
А Галялөн қывъясыс, стихъяса тетрадыс,  
медбөръя рытыс, кор Кузьма накөд тшöтш  
вöлі? Нинöм вылө оз позь! А главнöйыс? Кы-  
дзи нö вунлі тайö? Бойко өд висьтавліс, мый  
Попов гöтыра, и челядь эм сылөн?!

10

Аскинас, кор тыдовтчис Пётр Ивановичлөн  
аснырөн гусьөн мунöмыс, Леонид Семёнович  
повзыштліс. Думсьыс эськө повнысö вöлі ни-  
нöмысь, но быттö кодкө оз-оз да тойыштас,  
инмөдчыштас мыйöнкö сьөлөмас. А мыйысь?  
Мыйысь повнысö? Рация уджалö. Завхоз му-  
нан лунö жö луасьыштіс важ шылльö-мылльö  
пиын да аддзис пöшти сэтшöм жö конденса-  
тор да сопротивление. А өд Галя понда  
лои тайö приёмникнас дурöмыс. Öнi паны-  
дасьны на кутасны, а Галя ылісянь нин бокö  
кежö, кытшовтö, либö йöзкөд сёрниö пырö,  
виччысьö Леонид Семёновичлысь прöйдитöм-  
сö. Сідзсö нывкаыс шань, но ладнö та йылысь.  
Ёнасö оз и ков, мед нырсö лэпталö. Сыысь  
бурджык на сюрас, сöмын карö шывкнитлы.  
Рытнас и асывнас корсис рацияөн Бойкоöс, но  
эфирын Бойко эз кыв. А Пётр Ивановичöс ков-  
мас öлөдны асыралöмсьыс. Бензинсö прöстö  
сотас сöмын, а йöзсö оз аддзы. Найö оз на пет-  
ны Еджыд ю дорас. Леонид Семёнович эськө и

ачыс мөдөдiс катерсө, кор ковмис. Терпитны оз позь, кор суйсьоны кытчө оз ков. Ставныс быттьө вежөраось, сөмын сийө нинөм оз думайт. Қовмас грөзитыштны удж вылысь вөтлөмөн, мед ассьыс местасө төдны кутас. Збыльысь кө думыштлыны өд, завхозсьыс нинөм. Оз өмөй сийө, отрядса начальник, вермы вөчны завхозлысь уджсө? Ёна тай уна колө ветлыны да ваявны сөян-юан и ноксьыны көлуйөн!? Отнас справитчас. А оз кө, грузитны-ректыны позьө и медавны.

Сийө жө луннас Леонид Семёнович бара сетiс Пётр Иванович нимсянь Усть-Усаө Бирюковлы телеграмма, медым ыстасны вертолёт. Сийө көсийс вертолётөн ветлыны Еджыд ю дорө да босьтны сэтысь Бойкоос да студентьясөс. Сөмын мед эськө удитны Пётр Иванович вотөдз. Но тайө сылы эз удайтчы. Усть-Усасянь воис воча телеграмма. Сэни юөртiсны, мый вертолёт оз вермыны мөдөднысы вөсна, мый сийө уджалө мөд отрядлөн участокын, вермасны ыстыны сөмын вежон мысти. Быдса вежон. А вежон бөрад оз нин сэтшөма и ков, кызди өнi. А то артмө, мый Пётр Иванович бур морт, а сийө, Леонид Семёнович, омөль. И Бойко мыйлакө оз шыась, мыйкө торксис рацияыс ли мый ли?

А талун Леонид Семёнович ещө өтчид думыштчис йитчывны Усть-Усакод, включитiс рациясө. Сетiс позывнөйяс. Дыр эз и ковмы виччысьнысө, сэтысянь пыр жө вочавидзисны. Радист пондiс передайтны мыйкө начальство йылысь, но мешайтiсны кывзынысө. Леонид Семёнович мышку сайын кодкө гораа шуис:

— Вөрүн, шуан? Эн-ө эсійө кустъяс до-  
рас?!

Леонид Семёнович эз кывлы некодлысь пы-  
рөмсө. Сійө видзөдліс и чуймис: порог дорын  
сулаліс Бойко. Бойко индіс кинас өшинювса  
льом пулань. Леонид Семёновичлөн петіс  
тешкодъ нюм, сувтіс да бергөдчис пырысьяс-  
лань. Бойко бөрвылын тыдалісны студентъяс  
Онькова да Нестеров.

Отрядса начальник воськовтіс паньд.

— Чолөм!— киасис сійө быдөнкөд.— Но,  
воинныд, сідзкө. Көні нө ещө ёртныд?— юаліс  
студентъяслысь и ачыс жө вочавидзис:— А-а,  
ывлаас. Но, кыз-мый уджныд муніс, ставыс  
лючки-ладнө, кызди воөдчинныд?— видзөдліс  
Бойко вылө.— Дерт, көнкө, недөвөльнөйөсь?  
Пукаліс пө Лыабөжын, а прамөя эз отсась.  
Да?

Бойко видзөдліс. Поповлы синмас да скө-  
рысь шуис:

— Да. Мыйла тэнад рацияыд эз уджав?  
Мыйла этша сөян ыстін? Со мый интересуйтө.

— Но, оз ков волнуйтчыны. Танөсь, сідзкө,  
ставыс лючки-ладнө. Сөян ме тшөктылі ысты-  
ны, кытчө корлін.— Леонид Семёнович гөгөр-  
воис Бойкоөс да нарошнө надзөникөн шуис  
тайө кывъяссө. Сэсея пуксис пызан сайө, бось-  
тіс киас карандаш да нюмъялігтырйи пондіс  
мыйкө гижйөдлыны бумага вывті.

— А студент Перминов...— гөлөсыс Бойко-  
лөн дрөгнитіс —...пөгибнитіс... Вөйи кадъя  
нюрүн.

Леонид Семёнович кыпөдыштіс юрсө, и вө-  
листи нюмыс надзөникөн исковтіс чужөм выв-  
сьыс. «Студент Перминов пөгибнитіс... ню-



рын». Тайö нин эз пыр сылөн планъясö. Мый лоас? Студент! Нюр вуджигөн. Кутасны корсьысьны, юасьны, гудрасьны. Коді мыжа? Судитны вермасны. Нолтö, а мыйын сылөн мыжыс? Доказательстоясыс көні, мый сійö мыжа? Абу. Сідзкө нинöм и повны. Мед коді мыжа, сійöс и судитасны, колökö. Бойко ветлігөн лои несчастной случайыс, мед и судитöны сійöс. Но, а... письмö? Письмö! Көні Бирюковлөн письмöыс? Кытчö сійöс пуктыліс? Кажитчö, пызан вылас кытчökö бумага костö сюйыштліс. А, гашкö, зептас сюйсис? Мыйла эз косявлы сэки сразу! Öлук! Öні ставыс сы сайын: пöлучитліс али эз письмösö. Корсьны и косявлыны пыр жö!

Леонид Семёнович заводитіс тапкөдны зепъясас, корсьысьны бумагаяс пиын, а мукöдыс шензьöмөн видзöдісны сы вылö. Весиг пырысь мортлы минут мында лои видзöдны да сэся вöлисти шуны:

— Бур лун!— медым казялісны сійöс.

Попов медводз чöвтліс котралысь синъяссö пырысьлань. Первойсö кынмыштліс места вылас, но пыр жö небзис:

— А-а, Василий Петрович. Вай матыстчöй пызан дорас. Пөрччысьöй, личödчöй. Туй вывсяньыд шойччыны колö, көнкö? Со раскладушка. Пöжалуйста.

— Часлы на шойччöмнад, лолыштны көть сетöй.— Бирюков пөрччис пемыдлöz рöма плащö да кепкасö и, ичötик тушаа, крепыд, матыстчис нейджыд воськовъясөн пызанлань, расчёскаөн шыльöдыштіс пель бокъясас да балябöжас кольöм юрсисö и сöмын сэк пуксис пызан дорö.— Ошйысьöй, ошйысьöй вайö.

Ті нө мый сулаланныд? Пуксялөй. Мыйкө ме-  
нам пыртөдз сёрнитанныд, тыдалө, вөлі и  
дугдінныд. Важөн нин воинныд?— шыөдчис  
Попов дінө.

Леонид Семёнович эз виччысь юалөмсө да  
гшөкмунліс:

— Т-талун. Ага.

— Вайлөй журналъяснытө, а асьныд вер-  
манныд шойччыны. Ме тэрмасы, корисны Ух-  
таө совещание вылө. Меным колө на бөр Усть-  
Усаө ветлыны...

Но керкаысь некод эз петны, некод некытчө  
эз мун.

Футлярысь Бирюков перйис өчки, өчкиасис  
да босьтис Бойко кийсь тетрадьяс.

— А, студентъяслөн гижөдъяс.— Бирюков  
листаліс первойя жө тетрадьсө, коді веськаліс  
ки улас.— Шогмана. Да-а. Нинөмтор. Бур.  
Ноко, кодлөн тайө?— тупкис тетрадьсө, лыд-  
дис корка вывсьыс.— Пер-ми-нов. Тайө ті  
Перминовыс?— видзөдліс сійө Борислань.

Борис эз на удит шунысө, сы пыдди воча-  
видзис Леонид Семёнович:— Абу. Тайө... тайө  
Нестеров. Перминов,— видзөдліс Бойко-  
лань,— пөгибнитөма нюр вомөн вуджигөн.

— Пөгибнитөма? Нюр вомөн вуджигөн?—  
Бирюков пөрчис өчкисө.— Кыдзи «пөгибни-  
төма»? Мыйла «пөгибнитөма»?! Ті өмөй энө  
вөлөй сәні?— юаліс сійө Поповлысь.— И ку-  
тшөм-сәтшөм нюрын? Сійө участок вылас, ве-  
ритны кө карталы, сәтшөм вывті зыбуч нюръ-  
ясыс весиг не долженось лоны. Ноко, Иван  
Григорьевич, петкөдлы. Да тайө жө Еджыд  
ю бокын нин пөшти! Кыдзи нө ті сәтчө весь-  
калінныд? Ме жө гижлі... Эз өмөй письмөыс

волы? Ме жö тшöктылі и Усть-Усаö рация пыр накажитлі... Кыдз-мый тайöс гөгөрвоны, Леонид Семёнович?

— Некутшöм письмö эз вöв.— Леонид Семёнович лэптыштліс пельпомъяссö, сійö неуна гөрдöдыштис. Öнi кö воссяс, и ставыс вошö. Мыжаласны. Суд. Эз, эз! Сійö эз пöлучитлы некутшöм письмö.— Да, кажитчö, татчö локтöм бöрын регыд мысти ю вомöныс вуджигөн почта тыра пыж вöйöма вöлі. Сэтчö вермис веськавны, — дум вылас уси сылы коркöя думыс. Вот кызди сійö згöдитчис.— Ми проект серти и нуöдiм уджнымöс.

— Кöть проектс и важмис, и уджыс сувтас донаджык?

— А кызд нö? Проект — закон, Василий Петрович.— Леонид Семёнович чужöм вылын бара чужис нюм.

— Почта вöйöма и вот — пöжалуйста! Случайность кыскö мöдтор, мöд случайность, и вежö ставсö! А главнöйыс — морт пöгибнатис и колана участок талун кежлö эз ло исследуйтöма. Но, а асьныд мыйöн ошйысянныд? Мый танi вöчинныд? Петкöдлöй.— Бирюков зумыштчис татшöм юöрсьыс.

— Вот приборлысь уджалан режимсö прöверяйтöм да, первойя лунъясса опорнöй профиль обработайтöм кузя материалъяс. Тайö сійö профильыс, кодi ю пöлöныс мунö,— пызан юрсьыс тетрадь судзöдiгмоз висьталіс Леонид Семёнович.— Вежон чöж гриппөн ви-си. Со, бюллетень, сэсса сёян-юан корсьöм... Рация дорын дежуритi. Мыйлакö сöмын Иван Григорьевичлөн рацияыс эз уджав, первойя

вежонсö кындзи. Гашкö, жугалі либö поліс  
Перминов пöгибнитöм бöрад...

— Лöж, лöж!— места вывсьыс пызанлань  
чепöсйис Лена. Кулакъяссö шамыртöма, лö-  
сьыдик вом доръясыс воссьыштöмаöсь.—  
Иван Григорьевичлөн век уджаліс рацияыс.  
Москва на корсюрö кывзывлім и быдтор. Ті-  
янсянь нинöм оз кыв вöлі. А Кузьма... Кузь-  
маöс ті эн вөрöдöй. Ті! Сійö пöгибнитіс сöмын  
на куим сутки сайын,— Леналы сьökыд лои  
кутны синвасö. Сійö бергöдчис и вешйис бокö.

Леонид Семёновичлы быттö асьныс карті-  
ясыс локтісны киас:

— Тэ нö мый, Онькова, сёрни шöрас пы-  
ран? Тэныд мый? Ог тэнсьыд юасьöй. А-а,  
гашкö, абу веськодь тайö сёрниыс мöдтор  
понда да сійөн? Гөгөрвоа, гөгөрвоа. Вөр.  
Сöстöм сынöд. Мича дзоридзьяс, турун дук.  
Öти кывйөн кö, романтика. Любовь, рочөн кö  
шуны.

— Но, тэ!— Эз вермы водзö терпитны Бой-  
ко.— Думайтöмөн шыблась кывъяснад!

А Лена локтіс пызан дорö, Поповлы воча,  
сулалыштіс недыр, мыйкö кöсйис шуны, но  
нинöм эз сюр, тыдалö, да котөрөн петіс кер-  
каысь.

Бирюков шлопкыштіс ки пыдöснас пызанас.

— Да мый ті! Ичötöсь али мый?! Леонид  
Семёнович, петкöдлöй водзö,— сійö листаліс  
Поповлысь вычислениеяссö,— Мда-а, абу,—  
абу ёна уна. А этійö... Этійö мый?— кыпöдіс  
сійö тетрадь костысь мича пальмаяса конверт.

Леонид Семёновичлөн ёкмуні сьölöмыс.  
Ставыс воши. Висьтасьны? А водзö мый лоас?

— Письмө. Гөтырсянь, навернө. Сэтчө пуктыссьөма,— нюждчис сійө письмөлань, но Бирюков вештіс кисө.

— Гөтырсянь? А мыйла горулас со менам кырымпасөй?— Бирюков юалис стрөгджыканин.

— Но ме эг аддзывлы тайө письмөсө,— водзө соссис Попов,— почтальон вайлывлө почтасө и сэк, кор ме ог овлы тани. Вермис сюйштын тетрадь костас.

— Час видзөдлам: лыддьөма абу.— Бирюков бергөдіс конвертсө да восьтөминтіыс кыкис письмөсө.— Письмөыс жө восьса?

Леонид Семёнович чөв оліс. Шуны: эз сійө лыдды? Но коді нө эськө сэсся? Тыдалө нин пөръясьөмыс. Нинөм он вөч, ачыс прөстугитіс, эз косявлы тайө проклятөй письмөсө сэк жө, воөм бөрас! Сійө видзөдліс Бойко вылө, Борислань, Бирюков вылө. О-о, мед эськө көть ставныд пропадитінныд эсійө Перминовыскөд өттшөтш! Мый лоны лоөма нин, кык смерть оз овлы:

— Да! Ме лыдди письмөсө! Ме пöлучитлі! Но ме уджала проект серти! А тайө письмөныд ещө нинөм на оз сулав!

— Но өд мунтөдзныд на трестын проект вежөм йылысь сёрнияс вөліны,— дөзмис Бирюков.

— Сёрни-сёрни и эм! Ме эг кывлы сы йылысь! Проект вежөмсө кө вынсьөдасны, сэк и позьө сёрнитны та йылысь. А сэк кості, кор вынсьөдасны, миян удж лоас вөчөма нин.

— Проектсө важөн нин вынсьөдісны.

— Но ме эг кывлы. Сідзкө, нинөм менсьым и юасьны. А Перминов пөгибнитөм кузя кө,

ме абу օтветчик. Бойко уджалігօн лои, мед сійօ и кыв кутас. Ме мыйօн тօда, кутшօм помка вօсна тайօ лои? Қолօкօ, личнօй помка...

— У-у, г-гад!— тօдлытօгыс чорыда артмис Борислօн.— Иван Григорьевичօс татысь мыждыны оз позь,— Бирюков вылօ видзօдօмօн висьталіс сійօ,— мыжаօсь кօ, мыжаօсь ставным, ыстім, медым миянлы локтігкежлօ ужын дасьтас... А пыдісянджык кօ видзօдлыны,— сійօ матыстчыштіс Поповлань,— колօкօ, коді на мыжаыс? Тані тай мыйсюрօ тыдовтчօнин-а. Ещօ օтитор шуа: ме коркօ тօдлі օти кутюօс. Во дас нин, гашкօ, вօлі олօма, а век на вօлі кутюօн. Сэтшօм пօрօдаыс. Қокօ кутчысьны мунігкості вօлі нօрօвитօ: гачьяс косявлօ, кօмтօмьясօс курччалօ. Курччас да и котօртօ аслас позйօ либօ кօзяиныслы кок костас да нюмьялօ, быттьօкօ нинօм эз и вօвлы. Прօтивнօй вօлі кутю. Омօль пօрօда. Бօрсянныд курччасысь.

— Оскорбитіс! Сопляк! Ме судօ сета,— օвтчис кияснас Попов.

— Эн пов, ме ог օткажитчы, мый мыжа,— Иван Григорьевич зіліс лоны спокойнօйօн.— Да, мыжа. Ме дась кыв кутны суд водзын. Но ми кօ уджалім шуйга берегса участок вылын, тайօ эськօ эз ло. Помнитан, ме висьтавлі жօ тэныд...

— Нинօм ме ог помнит!— горзіс Попов.— И эн йит менօ аслад мыжօ!— Но Бирюковлօн лօнь гօлօсыс веніс сійօс.

— Гожօмбыд ті, Леонид Семёнович, пукалінныд Лыабօжын. Гожօмбыд! И веськыда кօ шуны, жель энօ бергօдօй...

— Ме жö виси... вежон да, фельдшер шуис, ещö лун дас шойччыштны. А ми Бойкокöд договоритчывлим, мый Бойко уджсö нуöдас веськыд берегас, а ме шуйгаас. Тi жö асьныд век висьталанныд, мый томъяслы инициатива колö сетны. А öни виданныд.

Иван Григорьевич чуймис:

— Кор договоритчывлим? Та йылысь и сёрныс эз вöв.

— Тöндзинад нö,— жмитiс Попов. Бойко нинöм эз шу, сöмын тешкодя лэптыштлис пельпомъяссö. А Бирюков быттö эз кывзы найöс, нуöдiс водзö:

— Шензя. Шензя, кызди тi верманныд уджтöгыс овнысö? Кызди сьölöмныд лэптö? Шензя и ог гөгөрво. Ог... Либö дыш, либö морттуйныд абу. И кольöм вося материалъяс-ыд посредственнöйöсь вöлины, а таво... Тiянлы пинь сертиныд, буракö, сöмын нывъяскöд... Со и талун, муртса на кок пöлөн сувти берегас да юали, кытысь мися позьö аддзыны? И висьталiсны: кутшöмкö клубса зав ордысь пö! Срам! А öд гöтыра морт. Челядя... Висинныд? Да. Но тi öд тани тöлысь дорысь дырджык нин оланныд. Висьöм дорсыд кык пöв уджык сiдз кадыс кольöма... Ог гөгөрво, мыйла эн кывзысьöй менсьым, мыйла ыстинныд йöзсö сьökыд участок вылас, кор асьныд тöданныд, мый сэни гожöмнас пöшти оз позь уджавны. Шуйга берегас кöсьянныд, небось, асьныд уджавны, а сьökыд участоксö сетiнныд вöчны том специалистлы. И асьныд, небось, эн мунöй, эн ветлöй профиль вылас лун-мöд кежлö. Связыныд абу, а весиг Усть-Усаöдз эн ветлöй. Кутшöм нин ветлöм, весиг и телеграмма

дыр-ө сетны, да сійӧс вӧлӧма дыш сетнытӧ!  
И вот он тӧдӧй, кызди уджыс мунӧ.

— Отрядса начальник!— Бирюков йӧткыш-  
тіс тетрадьсӧ пызан вылас.— Но тырмас. Точ-  
ка. Тыдалӧ, самӧй кад миянлы торйӧдчыны.  
Ті государство сылі вылын зӧр тусь. Абу...  
Чирей! Чирей, кодӧс колӧ пыр жӧ пычыктыны!  
Йӧзыс тышкасьӧны сизим вося план тыртӧм  
вӧсна, быдторйын зильӧны экономитны. Быд-  
лаын пуӧмӧн пуӧ удж, стрӧитӧны, стрӧитӧны,  
нюжӧдӧны кӧрт туйяс, мечтайтӧны Марс вылӧ  
лӧбны. А ті на кокын гира моз ӧшаланнӧйд!  
А несчастнӧй случай йылысь, ме думайта, суд  
разберитчас. Қовмас тӧянлы Бойкокӧд кыв  
кутны. Сӧні, ме думысь, ковмас сӧрнитны и  
не сӧмын морт пӧпибнитӧм йылысь, но и про-  
ект да письмӧ йылысь.

Леонид Семёновичлы водзӧ терпитны сӧсся  
ӧз позь. Лӧня олігӧн вермис ворссыны. Сійӧ  
кыпӧдіс гӧлӧссӧ:

— Ті шуаннӧйд: ме эг ветлы Усть-Усаӧ!  
Қызди эг ветлы?! Вертолёт кузя ещӧ записка  
кольлі! А сӧтысь локтігӧн и висьми... Сӧсся  
телеграмма сетлім! Ми эськӧ гижлім да вот  
тӧянсянь некутшӧм отсӧг! А кызд ме ола — ме-  
нам делӧ! Ті оскорбляйтаннӧйд! Ме эг ӧтқа-  
житчывлы на уджысь! Ме ог кут водзӧ кывзы-  
ны заслужиттӧм кывъяс! Ог видзӧд тӧян ар-  
лыд вылӧ — и тӧянлы мыйсюрӧысь ковмас кыв  
кутны!

— Кӧть ӧні!— шеньшитіс кинас Бирюков.

— А уволитны менӧ тӧян праваныд абу. Ме  
трестса номенклатураын — карандашӧн пы-  
занас тотшкӧдіс Попов.



— Талун жö ыста бумага трестса кадръяс отделö да управляющöйлы. Сэни ме гижа, мый колö. Вот и ставыс. А трест индас колана удж вылö тöдöмлунъяс да интересъяс серти.

— Бойкоöс ме местаö?— Бойколань докнитис Леонид Семёнович. Синъясыс сылөн ёсьмисны, юрсиыс торксис, галстукыс вешийс бокö — кажитчис варьш кодьөн. Помтöм лөг-лун сидзи коялис сылөн быд видзöдлас.

Иван Григорьевич чеччис да петис ывлаö.

— Да. Бойко справитчас уджнас,— Бирюков видзöдис Поповлы веськыда синмас.— Ещö мыйкö кöсьянныйд юавны?

Борис тожö сэсся эз вермы пукавны керкаын, петис кильчö вылас. Вот кутшöм вöлöматайö Поповыс?! Первойсö кажитчывлис уважайтана, бур мортөн, век мичаа пасьтасьöма, кöть неуна тшапитчыштöджык. Ачыс мича, нинöм он шу. А пытшкöсыс? Сись! Симпатичнöй, вот и нывъяслы кажитчö. И Галялы тожö. Эк, Галя, Галя! Код вылö тэ ыштöмыд.

А вомсьыс бара петис öнтая кывйыс:

— Гад!— да прамöй ыджыд сёркни кодь кабырыс лэччис кильчö дор вылас. Зымгысисуси косьтыны пуктöм ведра да, кажитчö, йиркнитис сикт пасьтаыс.

Сэсся бөр лои лөнъ. Неылын, жытник водзын, пукалисны Бойко да Лена. А Борис быттьö ылысмис ылö-ылö, эз Лыабöжын вöв, а код тöдас кöни. Пом, тыдалö. Первойыссьö сийö ачыс вештывлис Галялысь радейтöмсö, кöть и радейтис. Эз лысьт сэжи висьтавнысö. Но, а öни? Вөрö мунигөн бара эз ло прамöй сёрни. Дерт, Галя, көнкö, и мөвпыштис, мый весьшөрö Борисöс виччысыны. Эк, нывъяс,

нывъяс! Век медым тїанлы ставсö висьталöма.  
Сразу. Қызди нö висьталан сразу?

Қильчö пос помын быттьö мусьыс быдмис  
зонка.

— Дядя, кöні нö ошпиа дядьöыс?— сійö  
шапкатöм, кöмтöм, веськыджыка кö шуны,  
«рака сапöга». Борис тöдис сійöс. Тайö вöлі  
ошпины жöлöб дорöдз сакартор катöдысьыд.

— Сійö ва дорын көнкö. Мый нö, бара са-  
кар чöжин?

Зонка лэдзис юрсö, мöдис гудйыны кок чунь-  
нас кильчö пос помсьыс лыасö, нинöм эз во-  
чавидз.

— Қыз нö шуöны тәнö?

— Васька,— кыскыштіс чангыль нырнас сы-  
нöдсö зонка.

— Вуграсьлан?

Зонка нюмдыштіс:

— Ага-а. Толькö öні омöля шедö.

— Дзуртöны?— Борис видзöдліс сійö кокъ-  
яс вылö.

Зонка эз гөгөрво:

— Мый?— сэсся лэдзис синъяссö Борис ви-  
дзöдлас бөрся.— А-а,— да заводитліс дзебны  
кокъяссö лыаас. Но лыаыс вöлі этша, эз  
сайöд.

Ыстыны кö тайö детинкаыскöд Галялы за-  
писка да гижны ставсö Попов йылысь? Борис  
кыекис зепсьыс блокнот да карандаш и, киль-  
чö дор вылас пуктöмөн, гижыштіс некымын  
кыв. Қусьыньтіс нель пельö бумагасö да шы-  
öдчис зонка дорö.

— Тэ он вöч меным öти удж?

— Қутшöм удж öд?!— юрсö пöлыньтіс  
Васька.

— Тэ, зон, мудер! Вот эсійö керкаас... — но шуигмозыс дугдіс. А мый вöчас тайö записка-ыс? Суклясьöм кодь лоö. Сöмын серам лоас. И содтöд шуис зонкалы:

— Ме прöстö. Кöсйи тöдмавны, кывзысян он гырысьяслысь. Но, давай мун да ме пыдди гшöтш вугрась. Рытнас шедны кутас,— и Борис бөр пырис керкаö.

— Сійö пырис мöд комнатаö, кöні узыль-лісны вөрö-мунтöдзыс, да нюжöдчис спальнöй мешök вылö джоджас. Зіліс унмовсьыны, но некыдз эз вермы. Син водзас вежласисны вөр-са серпасьяс, Кузьма, Галя, Попов.

Недыр мысти пырис Бойко, заводитіс сёр-нитöдны, но сёрнитны Борислы эз вöв окота да дугдіс.

А öшиньын дзизгисны гутьяс, мешайтчисны унмовсьынысö.

Час джын кымын куйлöм бöрын сійö петіс ывлаö да, сикт кузяыс мунігөн, воис магазин весьтöдз. Видзöдлыны, мыйöн вузасьöны? А регыд мысти шавксьöдіс нин бөр, зептыс вöлі польдчыштöма. Мый сэсся сылы вöчны, кор воши Кузьма тайö проклятöй участок вылас, кор Галя пөрьяліс сійöс? Вөлöмкö, радейтö Поповöс, а ещö... Мый ещö? А код тöдас мый, гөгөрвоан öмöй налысь?! Öтнас, дзик öтнас... Лена и то... Эк! Сійö кежис кутшöмкö керка бокö да, луд вылас пуксьöмөн, жугöдіс сургучсö сулея помысь. Веськыда сулея помсьыс, сьöласигтырйи, юис джынсö кымын да заку-ситіс кымынкö кампетөн.

Водкаыс шонтіс горшсö и морöссö. Окота лои сёйны и дум вылас уси, мый контораын

кольлі консерв банка да нянь. Сійö чеччис көрка боқысь.

А контора дорö воигөн нин кокняммысны кокъясыс, и, поскöдыс кайигөн, шатовмунлі. Қильчö вылын сылы паныдасисны Попов да Пётр Иванович. Борис потшис налы туйсö, сійö, тыдалö, прамöя коддзис юлытöм помсыд. Недыр чöв олыштöм бöрын (сідз найö сулалісны мöда-мöд вылö видзöдіг) Борис чуткис чуньнас Поповлы кынöмас да гартласян кывйөн юаліс Пётр Ивановичлысь:

— Тайö ко... коді?—и ачыс жö висьталіс. Попов вылö видзöдігмоз нин:— Йöз мыш вылын... Э-э райö кайысь. Вот-т.

Попов воськовтіс бөрлань:

— Удитöма нин төкаритны. Швач код. Муныр да вод.

— Ме код?!— Борис кутчысис сылы морöсас да пөндіс шамравны Поповлысь пинжаксö.— Тайö... Кузьма кодалö, кодöс тэ виин... Другöс виин,— бөррдзис Борис да тракнитіс пинжакöдыс Поповöс. Ори кизь да тюрис пос помöдзыс.

— Пётр Иванович, вай пырт тайö пьянниксö,— дöзмөмпырысь мездысис Борис киясысь Леонид Семёнович. Сійö лэччис кильчö вылысь броткигтыр:— Бур специалистъяс лоасны татшöмъяссыд, ме чайта, öнісянь нин некутшöм норма оз тöдны.

Пётр Иванович шамыртіс пессысь Борисöс да пыртіс койка вылөдз.

— Оз ков шумитны, Нестеров. Эк, том йöз, том йöз!

— Вай видлышт... видлы, Пётр Иванович, другос казытышт... мекөд тшөтш,— Борис кыскис водка сулеясө зепсыс.— Юыштам.

— Тырмас, тырмас! — Пётр Иванович сюйис сулеясө аслас зептө.— Вай вод, шойчышт.

— Кузьма-а! — звирк чеччис Борис, муртса эз весьөпөрт Пётр Ивановичөс.— Кузьма-а! — горзис сийө бөрдигтырйи.— Галя-а! — Сэссия бөр шнөпкысис кымыньөн койка вылас да мөдис сыркъявны.

А Пётр Иванович пукаліс улөс вылын да качайтис юрнас: том йөз, том йөз, мый ті бара вөчанныд аскөдныд?

Недыр мысти Борис лөнис; сийө, тыдалө, унмовсис. Пётр Иванович пөрччөдіс сылысь сапөгсө да вевттыштіс коксө плащөн.

## II

Обед кадө көзййкаыс Галялы висьталіс: вөрысь пө бөр воөмаөсь нефть корсьысьяс, и өти пө на пиысь вошөма ли вөйөма ли.

Галялөн весиг уси кысыс паньыс тайө юөрсьыс. Сідзи и чеччис да муніс клубө. Библиотекаын пукаліг видзөдіс өшинь пырыс геофизикъяслөн контора-керка вылө.

Кымын лун нин коли сэксянь, кор сийө, Борис да Кузьма гуляйтисны пыжөн! Но коді нө на пиысь вошөма? Борис? Морөсас чеччис сьөлөмыс. Синъясыс дзоргисны конторалань, но сэтчө некод эз пыр, ни сэтысь некод эз пет.

А Борис мунөмсянь Галялөн лунъясыс кывтісны өдва-өдва. Найөс быттьөкө кодкө кутіс

өдйө водзө воөмысь. Войдөр Галя найөс эз и казявлы, лунъясыс кольліны өдйө. Шондіыс, кажитчө, петавлас вөлі, швыркнитас-каяс енэж шөрөдзыс, юр весьтө да мөдас усьны вөрлань. А усянторйыд өд век өдйө усьө.

Бөръя вежонсө шондіыс нарошнө дыр өш-йывліс юр весьтө, то сайөдчывлас кымөръяс-өн, то бөр мыччысьлас. А лунъяс вөліны кузьөсь, гажтөмөсь. Надоедитіс Попов, некытчө лои воштысьны сыысь. И сиктыс ичөтмис, чужисны сёрнияс, лёк слава. Гашкө, ачыс Поповыс и лөсьөдліс да?

Рыгъяссө Галя колльөдліс гортас. Ветлас клубө, кино кө эм, коляс ключсө стөрөжыслы и бөр гортас. Сылы вөлі яндзим. Кажитчө вөлі, мый быд паныдасысь видзөдө либө жалитана, либө сералана синъясөн, көть и дзик нинөмысь сідзсө видзөдны. И сійө лукавліс өтнасөн.

Друг уси син вылас: геофизикъяс контораысь петісны ныв да зон. Лена? Борис? Абу кө Борис-а? Абу.

Но недыр мысти кильчө вылас тыдовтчис нөшта кодкө, и Галя төдіс Борисөс. Ловъя?! А коді нө?.. Кузьма?!—пөшти горөдсис сылөн. Тайө гажа, шутитысь зонмыс, кодөс техникумын радейтлісны быдөн?! И мыйлакө Галялы син водзас сувтіс ичөтик Кузьма, коворотка дөрөма, дженьыдик пинжака, векныыдик гача и сапөга. Збоя өтвечайтө дөска дорын...

Ошинь пыр тыдаліс, кызди Борис сёрнитіс колхозса бригадир пикөд да мыйкө, кажитчө, гижис. Гашкө сылы, Галялы? Гижис, а гижөдсө мыйлакө эз сет зонкаыслы. Пырис бөр.

Кысь нин! И сыодз, кӧнкӧ, сёрниясуд воисны, ӧдйӧ тай сэтшӧмторйыд паськалӧ!

Галялы лои забеднӧ. Сэтшӧм забеднӧ, кӧть бӧрд... Копыртчис пызан весьтас. Сэк жӧ, кылӧ, воссис ӧдзӧс да кыліс ныв гӧлӧс:

— Бур лун, Галя-а! Да тэ он-ӧ бӧрд?— сійӧ зілис кыпӧдны Галялысь юрсӧ, видзӧдлыны чужӧмас.— Ме мунтӧдз на кӧсья вӧлі пыравны тэ дорӧ. Мунан асыводзӧ Кузьма висьталіс, мый тэ тані, но некыдзи эг слӧймы пыравны. Вай дугдыв, висьталышт кӧть, кыз да мый тані лойн, Лыабӧжас? Тырмас. Тэ тӧдан, миян тожӧ шог эм: Кузьма вӧйи. Но бӧрдӧмнад нинӧм нин он вӧч...— Лена босьтис пызан вывсьыс книга да шӧртӧыс восьтис сійӧс.— Ме кывлі тэ йылысь омӧль сёрнияс... Ме кӧ эськӧ ӧти лун эг вермы овны либӧ жӧ некодкӧд эг сёрнит. Тэ — молодец! Мыйкӧ нӧ... Поповыс... збыль ухаживайтис? Да сійӧ кӧть и эз ухаживайт, вермӧ, тыдалӧ, быдторсӧ лӧсьӧдны. Миян вылӧ ӧні заводитліс жӧ... Сідзкӧ лӧж?!

— И тэ он верит?!— кӧританаа видзӧдліс кӧтасьӧм синъяснас Галя.— Ме ог тӧд, кытысь чужис сёрниыс. Мем, думайтан, зэв бур? Тані, кор йӧзыс быттьӧ чуньнаныс индалӧны: то пӧ, вот нӧ...

— Ладнӧ-ӧ. Сёрнияс вылас шеньшт кинад, нинӧм найӧс кывзыны. Дышӧдас да дугдасны. Ме йылысь ӧнтай Попов тожӧ 'заводитліс лӧсьӧдны, но сы вӧсна ог тай бӧрд.

— Эсійӧ зонмыскӧд?— Галя чышкыштіс бан бокъяссӧ.

— Ага,— гӧрдӧдыштіс да гогнитис юрнас Лена, сӧсся друг кватитчис.— Кутшӧм «эсійӧ»?

— Ме өшинь пыр аддзывлі петөмнытө.

— А-а.

— Сідзкө поздравитны? — завидьпырысь юалис Галя.

— Водзджык на. Иван Григорьевич шуө: сезон пө помасяс да. Ме, мися, абу паныд.

— А бать-мамыдлысь юалін?

— Эг на.

— Ой, Лена!— Галя чеччыштис, сывйыштис Ленаөс, а аслас бара тюрөбтис синваис.— Лена!.. Борис тожө төдө лөк сёрнияссө?

— Төдө. Миянлы локтигөн на завхоз Пётр Иванович висьталис. А мый нө? Чөв, чөв,— Лена нарошнө вөчис зумыш чужөм.— Абу-ө важыс на тэнад? Важыс? Но вот и бур, мый сэсся бөрднысө. Тэ, гашкө, та понда и бөрдан да? Дугды, дугды.

— Но сійө жө эскө, көнкө?— Галялөн видзөдласыс вөлі сэтшөм корана, мый Лена сідз гөгөрвоис.

— Ладнө. Ме сёрнитла.

Кык важся пөдруга вель дыр на сёрнитисны ас кежаныс...

Лыабөж весьтө матыстчис август төлысья рыт.

А аскинас... Аски кежлө Бирюковлөн вөліны аслас планъяс.

Лыабөжө локтигас Бирюков көсйис видзөдлыны отрядлысь уджсө да, төдмасьыштөм бөрын, мунны совещание вылө Ухтаө, медым көть мыйкө висьтавыны колана участок кузяис, кодөн интересуйтчисны геологъяс. Материальяссө көть и эз на ставсө обработайтны, но



мыйкө век жө тыдовтчас. Лыабөжын сылөн думъясыс вежсисны. Участок кольома видлавтөг Поповлөн асныралөм вөсна. Сөмын Василий Петрович некыз эз вермы гөгөрвоны, мыйла Попов эз кывзы сылысь. Мыйын помкаыс? Но вочавидзны тайө юалөм вылас сийө эз вермы. Қоліс мыйкө вөчны! Поповөс вештіс удж вылысь, мед сийөн трестын занимайтчөны! Совещание вылын, тыдалө, ковмас висьтавны, кыз-мый делөыс вөлі, и өнісянь жө заводитны веськөдны өшыбкасө. Удитасны кө, да сюрас кө структура, арнас нин геологыяс көсийөны вайны бурөвөй. Юыс кынмытөдз. Колө тэрмасьны! Сідзкө вертолёт отсөгөн ковмас пөльзуйтчыны. И уджсө нуөдны Усть-Усасянь. Выгөднөджык, өдйөнджык и материалъяс пыр кипод улын лоасны.

Та йылысь мукөдыслы сийө висьталіс рытнас на, но асылөдзыс кутшөм нин мунөм. Ставныс водісны, Бирюковысь кындзи. Сийө пукаліс журналъяс сайын.

Леонид Семёнович көть луннас и збояліс, а войнас эз жө узь. Вөтлісны удж вылысь. Но сийө видзөдлас на, коді кутас чеччавны да кевмысьны. А... вөйөм студент? Доказательство абу, мый сийө вөйтіс, и сылы пөсь ни көдзыд. Медым Бөйкөлысь, колөкө, юасьөны мыйта колө и кодлы колө. Судөн прөзитө, но Леонид Семёнович вермас дорйысьны и суд вылын. Сийө чеччис, пасьталіс руд плащсө, видліс зепсьыс бумагаяс, чукуыртчывліс, чукуртіс этшаник көлуйсө чемоданө. Шляпаасис, видзөдліс комнатасө. Ставөн на узисны. Вугыртөма пызан сайын и Бирюков, сөмын төлысь кодь куш плешыс видзөдө комнатасө.

Эз на вөв и сизим час, но Попов петіс ывлаас да мөдөдчис берегань. Сәні виччысымштас, а то, колөкө, вуджөдысыс на дыр оз сюр и сөрмас ещө пароход вылас?

Поповлы колана пароходыс Лыабөжті прөйдитліс көкъямыс час бөрүн расписание сертиыс. Но главнөй ва туйыс муніс ю мөдар берег дортыс, да пароход сувтлывліс мөдлапөлас, бакенщик керка дорө. Сэтчө вуджлывлісны пыжөн.

Попов пуксис берег дорас сувтөдөм чемодан вылас да дышиникпырысь заводитіс шыблавны берегдорса изъяссө ваас. Ваыс ньылаліс найөс, и бөр лөньөдліс кытшъяссө, быттө изъясыс эз и усылыны. Гашкө, сійө, Леонид Семёнович, өні мунас татысь, и тожө тадзи ставыс лөняс, бурдас, нинөм оз коль? Быттө сійө эз и вөвлы тани? Попов кыпөдіс кулак кодь из да скөрысь бруткөбтіс ваас. Артмысны кытшъяс, разаліны и бырысны.

Неуна кывтыдынджык кыр йывсянь ва дорас тожө лэчмысны йөз. Попов төдіс Бирюковөс, Бойкоөс, студентъясөс. Пётр Иванович сулаліс челядькөд да ошпыскөд кыр йылас на.

Локтіс колхозник, кодкөд сөрнитчыліс Попов, лэдзис ваас пыжсө, и Леонид Семёнович сөліс пыжө. Пыж ылысмис берег дорсыс, өвтчысны пелысьяс. Попов бергөдчыліс берегань, но некод быттө эз и казьяв сылысь мунөмсө, сөмын кыр йылын регыдик кежлө лэптыштліс картузсө Пётр Иванович. Леонид Семёнович бергөдчис бөр да сәсся эз нин вездөдлы бөрвылас.

А катер дорын чукөрмысны челядь и асьныс, мунысьяс. Вайысны кутшөмсюрө көлуй, но

унджыксö шуисны кольлыны татчö: ставыс оз тöр катерö öти рейсөн. Кöлуйла бöрынджык волас завхоз.

Тані жö тапикасис и ошпи. Сійö вöлі жу-гыль. Сылы то ли жаль вöлі янсöдчыны тат-чöс местаяскöд, то ли прöстö жуглясис, водза-водз садьмöдісны да. Ветлöдліс йöз дінын, сувтавліс бөр кокъяс вылас да нориника му-рöстлывліс. Гашкö, мыйкö корис, а пашкö, и прöщайтчис?

Пётр Ивановичлөн ганьласисны усьясыс:

— Вот öд, вот öд! Ха-ха! Вежöра-а! Вежöра и мудер — первой сорт «Б»! Кыв на он шу — гөгөрвоö. Кодкөлун горшасьöмысь чирышти, да пыр жö пызан улö пырис и бөрөн меланьö бергöдчис. Лөгасьліс. Ха-ха. Кыло джын са-карөн удайтчис бурöдны.

Пётр Ивановичлөн серамыс вöлі сэтшöм кыпыд да гажа — öдвакö кодкö вермас кут-чысьны нюмъөвтöмысь.

— Дядя Петя! А дядя Петя? Ті миянлы он кольöй ошпитö? Ми видзны кутам. Школа-ын, — водзö петіс детинкаяс пиысь öти. Борис тöдіс Васькаöс. Зонкалөн весиг плешыс чу-кыртчыштöма, сэтшöма полö öткажитöмысь. И мукöдыслөн лов шыыс быри, виччысьö-ны. — А дядя Петя? Ми вердны кутам. Де-журство лöсьöдам сы бөрся.

Пётр Иванович эз виччысь татшöмторсö да шевгöдліс кияссö, сэсся шлапкис бокъясас.

— Мый и вöчны тіянкöд? Жаль и, ті, зонъ-яс, тыдалö, бурöсь. А? — кытшовтіс синъяснас ставнысö. — Дежуритны кö кутанныд, ладнö...

Кольла мөдысь локтөдз. Лёка кө видзны кутанныд — бөр босьта, сідзи и төдөй. Босьтөй, мый сәсся тиянкөд вөчан!

— Ура! Ура!— гызисны көмтөм войтыр, найө кытшалісны ошпиөс. А Пётр Иванович сулаліс и видзөдіс на вылө, кыскыштліс зепсьыс носөвик, инмөдліс син дорас.

Бокынджык сулалысь Лена матыстчис Борислань, вөрзьөдіс киөдыс:

— Галяөс тэ аддзывлін?

Борис сюся видзөдліс Леналань, бергөдчис бөр, нинөм эз шу.

— Со сійө, кыр йылас. Мун ветлы.

Борис кыпөдіс синъяссө. Да, кыр йылас сулаліс Галя. Сійө Галяыс, важкодъыс на, видзөдіс сылань, Борислань. Важкодъыс? Абу нин. Оз радейт и эз и радейтлы. Прөстө ворсөдчөм. Радейтан кө нө, верман өмөй сідзи, медым талун өтикөд, а аски мөдкөд. Сылы, Борислы, тайө гөгөрвотөм. Мед сулалас! Сійө, колөкө, Поповөс колльөдны локтіс... Мышкыс на эз саяв весиг. Мыйөн төдан!

Борис воськовтіс катерлань, но Лена бара кыскыштіс соскөдыс да гусьөнджык нин шуис:

— Ветлы жө! Лөж слава кыпөдлөмаөсь сы йылысь! А то он удит сәсся!

«Лөж слава!» Борис сюся косіс бөр. Кыр йылас сулаліс на Галя, пөрччөма чышъянсө, кутө кias. А кийс лэччысьөма. Төв руыс лөтөдө кудрияссө и кисьыс чышъянсө.

Борис көсейс уськөдчыны сылань, но паныдасис Пётр Ивановичкөд, коді небыдика йөткыштіс сійөс катерлань. Эз казяв Пётр Иванович пөрысьмөм синнас, мый вөчис. Эз гөгөрво!

Эз дөгадайтчы, эз куж весиг и думыштнысö!

Сыркмуни катер да вөрзис места вывсьыс, мырдөн ылыстіс садьмөм Борисос берег дорсьыс, көть ваас чеччышт сэсся. Галя, Галя,— шуавсис сылөн вомгорулас. Берег вывсьыс синсö чөвтлытөг долис нывлысь нимсö. Сэсся кияссö вом дорас өтлаалөмөн горөдіс ю тырнас:

— Галя-а-а!

— А-а!— шыасис мөдар берегса вөрыс.

А кыр йылын сулалысь ныв котөрөн лэччис ва дорас да пондіс котөртны берег пөлөныс катер бөрся чышъяннас өвтчигтырйи. Тожө мыйкө горөдіс, но Борис эз нин велав. Сылөн чеччаліс сьөлөмыс морөсас, быттьө кольччөмөн и кольчис Лыабөжө, а тушасö нуис, ылыстіс Лыабөжсянь, Галясянь тайө мичаник лөзовъеджыд катерыс. Борис вунөдліс орччөн сулалысь Лена да Бойко йылысь, кодъяс тожө радлісны сы вөсна, а сэсся бергөдчисны өта-мөдланьыс да вешйисны мөдар бортланьыс.

Борис видзөдіс и эз вермы юрөдчыны сійө ичөтмысь мортсьыс, өвтчысь чышъянсьыс. Катер веськөдчис ді костө. Медбөръяысь тыдовтчыліс чышъян. И саялі. Сайөдісны дівывса бадь кустьяс.

Борислы лои курыд. Гашкө, катер пытшкын куритіс Бирюков да тшыныс воис сьөдз? Но код төдас. Вөлі кокни сьөлөм ылас и курыд. Но тайө курыдыс эз нин вөв сэтшөм курыдөн. А вөлі мөд пөлөс. Сійө чужис морөсас өні. Галякөд торйөдчигөн. И йөткыштас-ө сійөс Борис морөсысь кадыс? Галяысь бокрын олан кадыс?

Син водзас тыдовтчис бара Лыабөж сикт, но Галя эз нин тыдав, саяліс ю чукыль сайё. Борислы окота лои ещö отчыл видзöдлыны Лыабөж вылö. Тайö ичöтик сикт вылас, кöні тшöтш кыліс страналөн ыджыд олöмыс. Тайö сикт вылас, кöні тöдлытöг аддзысьліс воддза радейтöмыскöд да кöні муртса бөр эз вошты сійöс век кежлö. Татчö локтісны найö Кузьмакöд, а мунöны сытöг. Лыабөж! А, гашкö, прав лоас Кузьма,— материалъяс öд обработайттöмöсь на. Вермас лоны: аддзим структура. Нефть либö газ вермас лоны. Лыабөж! Кутшöмөн лоан тэ во вит мысти? Аддзывліс кö эськö тэнö сэки Кузьма! Гашкö, лоан «первой сорт «Б», кызди шулывлö Пётр Иванович? И Борис уджысь лоас кутшöмкö пöльза? Тешкодь. Öні на вöлі студентөн. И студент на ещö, а вот пöльза. Страналы! И нимкодь, мый сійö, тöрытья прöстöй зон, коми зон, код вылö öнöдз рöскодуйтчисны на сöмын, талун вайис нин, кöть ичöтик, а пöльза. Қажитчö тешкодь-өн, а öд збыль тайö! Кузьмакöд öтлаын кöс-йисны пырны олöмас, а коли сійö öтнасөн. Сідзкö кык пöv ыдждіс сылөн кыв кутöмыс олöм водзын, сідзкö сылы ковмас уджавны кык пыдди, медым век кужны сетны отчёт Кузьма паметь водзын! А тöрыт юис! Вöвлі Борис сьölöмын полöм, кор тувччис тайö Лыабөжса му вылас, а öні кöні? Бытьтö абу и вöвлöма! Мыйысь сэк повзьывліс? Öні яндзим сыысь и некор думайтны сы йылысь, колö видзöдлыны водзлань.

Берегыс занавесөн моз сайöдіс Борис син водзысь Лыабөж сиктöс. Первой сикт помсö, сэсся джынвийö, сэсся и ставнас.

— Прощай, Лыабөж! Аддзысылам огöй нин коркө? Прощай, Кузьма другöй!.. Оланнды-выланнды, выль местаяс!

Катер сюся поткөдiс небыдика гыалысь ва-сö ю шөртыс. Борис бергөдчис ичөтик вой төвлы воча.

Шлывгö вой саридзö ю. Заводитчö сийö ылын, Издорсянь, визувтö помтöм вөрьяс пыр, гырысь нюрьяс пöлөн, вежлалö ассьыс ва туйсö. Но визувтö пыр водзö и водзö, и кымын матысмö морелань, сымын ёнмö, ыдждö, паськалö. Гырысь и песни юяс, шорьяс да ключьяс босьтö ас пыткас. Визувтöны тайö шорьясыс пөрөмьяс пыр, косьтьяс вомөн, зильöны-писькөдчöны. И тайö шорьясыслөн, ключьясыслөн да юясыслөн öтувья ваыс вöчö ыджыдсьыс-ыджыд удж: путкылялö пывсян кодь изьяс, мыскалö лыасö, буждöдлö берегсö, паськөдö ю визьсö, дзонь дияс нуö туй вывсьыс да пукталö мөдлаö. Лыддьöдлыны кö, мыйсö эз аддзыв сийö ас нэмнас! И первобытнöй йöзöс, и важся зверьясöс, и йöзöс ылөдлысь купечьясöс, и гöль йöзöс, кыйсьысьясöс. Гöльясöс частö öбидитлывлiс, ворслiс налөн олөмөн. Сы гөрб вывти волiсны море сайсянь и белöйяс, сы гөрб ылын жö и кывтисны бөр. Революция бöрын юяс вежсис, вежөрсялис, сьökыд лои öбидитны öтувья йöзтö, сдайтчис, кутiс отсасьны.

Абу ю, а ачыс олөмыс!

Кывтö ю вывти катер, писькөдчö шөртыс. Сэни йöз, водзö видзöдысьяс.

Борис казялис орчөн сулалысь ёртьяссö, ю берегысь ылын лöзалысь вöрсö, юлысь вöльнöй паськыд отсö и ещö на уна-уна мукөдтор.

На лыдын — берегсянь öвтчысь мортöс.

Тайö вöлі автор. Сійö мөвпаліс катерөн мунысьяс йылысь. Жежас оз туйсьяс налөн катерныс? Мый найöс виччысьö сәні, кодарö муноны найö? Сюрлас оз коркö аддзöдлымы сійö выль местаясас тайö йöзсö? Көть кодсюрöс на пиысь? Код төдас. Олöмыс öд сәтшöм паськыд! Көть и паськыд, но шөртіыс водзын мунысьяс тыдалöны ылісянь. Вермас лоны — и аддзысьлас. Öд Кузьма прöстö эз шулы: гөра пö гөракöд оз паныдась, а морт морткöд век паныдасяс.

Лөня шлывгö-визувтö вынйöра ю. Сійö пожъялö-мыськалö став омöльсö, нуö васö аслас туйöд мореö.

*Воркута кар.*

1963 во.







## ТУНДРАЫН

*Висьт*

**1**

Ньöжйöник шльывгисны руд кымөръяс. Лок-  
тисны найö кысянькө рытыв-войвывсянь и  
öтарö пыр сукмисны да кызисны, жмитисны  
мулань тундралысь сідз нин ляпкыдик быд-  
мөгьяссö. Шочиника гылалісны зэр тусьяс.  
Лысвааліс.

Алексей кок шыысь матысса дзоляник ты-  
ысь качөдчисны горда гозъя. Матысса бадь  
кустьяс пиысь горзігтыр чепösйис байдög, но  
ылö эз лэбзы, бөр пуксис. Неуна котörтыш-  
тіс да бара кыпөдчыліс.

«Мудеритө. Позйыс, буракө, тани»,— думьштіс Алексей да матыстчис кустьяслань.

Бадь куст пиын, вутш юр вылын, гөптө дыштөм местаын куйлісны беринось вит кольк. Алексей копыртчис, босьтіс өтикөс. Недыр кутіс киас, а сэсся пунктіс бөр да тэрма-сигтырйи ылыстчис поз дорысь, көні коли горзысь байдөг.

Неыджыд мыльк йывсянь местаыс тыдовтчис паськыдджыка. Гөгөр плавгысьөма тундра: то нитшкөн да ялаөн кытсюрө вевттысьөм куш плеша мылькъяс; то мылькъяс костын посныдик тыясөн да гөпъясөн тырөм баддя увтасінъяс; көнсюрө дзоридзалө мырпом. Көть кытчө эн мун, быдлаын өтсыма мылькъяс, увтасінъяс, өта-мөдныскөд өткодью визьяс.

— Э-э-э-й!.. Ого-го-о-о!..

Но горөдөмсө пыр жө нылыштіс тундралөн паськыд эрдыс. Весиг йөлөга эз удит паськавны, сёрмис.

Шы ни төв.

Лыйис пищальсьыс.

Воча кывйөн вөлі матысса кустьяслөн шөпкөм...

Абу өткодью быдлаті тундра, көть и уналы сійө кажитчө өткодьюн: оз быд мортлөн синмыс казав тундралысь приметаяссө, кодъясөс төдөмөн позьө кокниа мунны колана местаө. И тундраыс унаөс ылөдлө. Весиг тундраын дыр олысь мортлы позьө зэв кокниа ылавны, торъя нин сэки, кор компасыд да картаыд кольёны палаткаө либө седлө сумкаө, а шондыс саялө сук кымөръяс пиө. Паськыда шевкнитчөма тундра! Синнад он сывйышт... Гөгөр эрд,

некөн весиг öти прамöй пу оз быдмы. Мыльк бокъясыс быттьö паськыд ыбъяс. Дзик лун-вывса степ. Толькö тракторъяс оз тыдавы. А прöйдитлас кө сэтi трактор — сöмын сы могысь, медым кыскыны öти местасынь мöдö бурöвöй шышка либö жö изыскательскöй партиясылы прöдуктаяс.

Алексей мунис нин час мында съод излань, көни сийö көсийысис аддзысьны ёртъясыскöд. Съод из — сийö ыджыд валун, код төдас кыдзи веськалöма сэтчö. Тайö местаыс быдөнлы вöли пас пыдди, и быттьö кыпöдлис йöзлысь настроение: «Базаöдз ещö дас öти километр!»

Алексей мунис нин вель дыр, но ни съод из, ни ёртъясыс эз тыдавы, көть кызь öтикöд обнажениесынь съод из дорöдз вöли километр нель. Удж помалöм бöрын Алексей недыр вөтлысис утка чукөр бöрся. Кык утка удайтчис лыйны. Кажитчö, ылöсö эз и мун, аскöдыс радиометрической приборыс весиг вöли: полевöй сумка кодь пульт да метр джынъя палич кузя гильза öшалисны воыс йылын пельпомас. Но öд кыйсигад кадсö да воськовъястö он артав, вермис и мунсыны бокöджык.

Кымөръяс лэччисны ещö на улöджык, öтамöдсыныс торйöдöм няйт вата ёкмыльяс кодьöсь кывтисны Алексей весьтти: вот-вот инмасны муас, крукасысны мылькъясö, кустъясö. Алексей шыбитчывлис шуйгавыв, сэсся веськыдывыв, но весьшөрö: первойсö ещö мыйсюрö тыдалисны на неуна водзысь, а недыр мысти ставыс воши ру пиас и весиг омöля кутис тыдавы кок увсьыс. Зэрнысö дугдис.

«Эз-ө вуджсы палаткаяслань муна туй вомон?— вирдыштіс юрас. — Тадзи и вошны абу дыр.

Бергодчыліс, но недыр мысти бөр сувтіс. Дум вылас усины вошом мортыяс йылысь йозлөн висьталомьяс — кыдзи вошом мортыс повзьом бөрас заводитө шыбласьны отаромодарө и ас казьявтөгыс муно век ылөджык бокө.

Алексей пуксис кос вутш йылө куритчыны. Босьтіс йирмөг. Қизяліс фуфайкасө.

«Вот эськө бипур кө озтыны! Но мыйысь? Тундраад и бедь оз туплясь, кутшом нин пес. Көнсюрө, дерт, и быдмөны ляпкыдик бадь пуяс, но найө ульөсь, тшынысь кындзи, нинөм оз ло. А гашкө?..»

Қытшлалыштіс, чегьяліс увьяс. Қор чукөрмис озтымөн, биасис. Записной книжкаыс чиніс вель уна лист. Вель уна истөг тув уси нитш вылө, қор би кыв нюлыштіс көстерө тэчөм увьяссө.

Тэрмасигтырйи куштіс өти уткасө, содтіс көстерө увьяс, сэсся зумыдджык увйө пысаліс уткасө да жаритіс би весьтын. Көть и сюмаліс кынөмыс, уткаыслысь өти лядвей кындзи, Алексей эз сөй — жаритчөма юмөля да и эз кылав совтөгыд.

## 2

Вугралөм сорөн коли войыс. Но асылыс некутшом вежсьом эз вай: руыс эз и думайт разавны. Кутшөмкө лэбач матіникын заводитліс асьыс сыланкывсө, но регыд дугдіс, тыдалө, жугыльмис жө.

Дуб утка яй сёйыштом бёрын Алексей мө-  
дөдчис водзё. Сылы кажитчис, мый небесаас  
өтилаті лоис югыдджык.

«Сідзкё сәні шонді, а меным колё мунны  
асыв-лунвылө. Час кык мысти лоа палаткаяс  
дорын. Съод из, тыдалө, бокё кольёма»,—  
сьөлөм вылас лои долыдджык, мунігмозыс  
весиг шутьяляліс сыланкывъяслыс мотивъяс.

Дыр муніс Алексей. Первойсё восьлаліс зі-  
ля, а кор палаткаяс сідзи и эз тыдовтчыны —  
дышмис.

Рытланьыс нейджыд төвру разөдіс русё, но  
вылөджык кыптөм кымөръясыс ещө пыр на  
өтмоз шлывписны и шлывписны помтөм тунд-  
ра весьтті. Бара заводитісны воавны зэр  
тусьяс. Шонді сідзи и эз мыччыв асьыс чу-  
жөмсө.

Алексей водзын друг виччысьтөг поті муыс,  
и джуджыд берегъяс костыс аддзис косьяса  
ю.

«Абу-ө Косью?— өзйылісны синъясыс. Но,  
километр кык ю кывтыдыс мунөм бёрын, гө-  
гөрвоис:— Абу».

Местаыс вөлі төдтөм.

Берег бокыс корсис лэбув, пуксис. Кокъяс-  
ыс, то ли мудзөмысла, то ли волнуйтчөмысла,  
тіралісны.

Воши! Сійө, Алексей Уляшов, воши тундра-  
ын, нельөд во уджалігөн, медся колана пө-  
раас. Кольөм сезон помасигөн нин найө весь-  
калісны, юясөн вайөм илсө видлалігөн, Хар-  
бей ты дорын кутшөмкө аномалия вылө. Ана-  
лиз петкөдліс — эмось корсян породаяс. Сэки  
геолог Кузьпелев висьталіс, мый кутшөмкө ю  
визувтан туй вылын, тыдалө, куйлө тайө по-

родаыс. Сэки эз тырмы кадыс прамойджыка корсысыны. А тодмавны абу зэв прөстө: көкъямыс нейджыд ю усьоны Харбейё, и пöшти öти местаын налөн вомъясныс. А таво вид-лалісны сөмын на куим ю вож, но тодчанаыс нинөм эз сюр. Кузыпелев видчө, көнкө?! «Быттьö ме нарошнө бокас муні!.. А, гашкө, тайё юыс Харбейё жö визувтө? Вот шойччышта да лэчча пөлöныс...»

Алексей пунктіс пищальсö бокөджык, включитіс приборсö. Наушникыс гежөдика кыліс тшок... тшок... Быттьö сәні дзебсясис дзоляник ур. Приборлөн стрелкаыс вуджис кызь цифра сайö и кутіс дышиника дзөрны.

«Фоныс неуна вылынджык нормальнөйыс. Нинөм интереснөйыс абу»,— выключитіс бөр. Выключитіс и пыр жö казяліс, мый сюмалө кынөмыс. Чукөртіс кутшөмсюрө лөп да заводитліс биасыны, но фуфайка зептас истөгыс ульсалөма. Весь воши вит истөг тув. Көрөбкаын кольөма өкмыс. Лыддис өттшөтш и папироссö — квайт. Мый вөчны?.. Сәсся косяліс фуфайка увтыссö, кыскис вата тор. Кольөм нель патрон пиыс өтикыс перийис дрөбсö. Порока зараднас лыйис ватаö, ломзьөдіс би-пур.

Бара жаритіс утка. Кытсюрө сотчөм, кытсюрө уль на утка яйыс кажитчис сэтшөм чөскыдөн, мый Алексей, көть и совтөг, öти здукөн сөйис ставсö...

Көтасьөм гачыс руасис, кадыс кадө трачкөдчисны сотчыс увьяс. Алексейлөн вочасөн куньсисны синъясыс. Но недыр мысти садьмис: биыс вөлі пöшти кусан выйын, и кынмис мышкыс. Ещö чукөртіс увьяс, пунктіс биö...

Садьмис кутшөмкө шумусь. Вөлі лун. Узиг-костіис мичаммөма, гежөдик еджыд кымөръяс костөд лөз енэж шөрын дзирдаліс шонді. Пыр жө гөгөрвоис: самолёт. Звирк чеччис, кватитіс пищальсө, котөрөн кайис берегөд кыр йылө. Чургөдіс вывлань пищальсө, лыйис. Лыйис мөдысь... Ещө. А сэссия, пищальсө стволөдыс қутігтыр, мөдіс өвтчыны да горзыны.

Но самолётсянь, тыдалө, эз казьявны. Сійө лэбис и лэбис водзө, рытыввывлань, аслас туйөд.

Алексей видзөдіс сэтчөдз, кытчөдз самолёт эз саяв. А қор сійө воши син водзсьыс, ньөжйөнникөн бөр лэччис узьян местаас. Сійө некор на эз чувствуйтлы и эз чайтлы, мый морт сэтшөма вермө мудзны, кутшөма мудзис ачыс. Лигышмуніны став мускулъясыс, личалісны сөнъясыс.

Тадзи коліс час джын кымын. Сылы лоис ставыс веськодь: весиг мөвпъясыс быттьөкө кынмывлісны юрас. Алексей чувствуйтіс асьсө лөк ногөн узьөм бөрын моз.

«Лэбис? Мед! Да и кытысь аддзан татшөм ыджыд местасьыд морттө, қор самолётсяньыд кодзувкот кодь кажитчан? Ладнө. Оти туй — ю кывтчөс. Көть пөльза вөча: кытчөдз тырмас приборын питаниеыс, муна, видлала местаяс-сө ю пөлөныс. Қоркө өд помасяс жө юыс, либө палаткаяс тыдовтчасны, либө аддзыся кодкөдкө: корсьөны нин, көнкө...»

Көть джуджыд берегьяс костті, көть ньывкөсінъясті, юыс вөлі пөшти өткодь визув.

Лөнъ местаяс эз паныдасьлыны. Гырысь да  
посни изъяс костод сяльгис состом ва. Чу-  
кыльось ю полон кыссис изъяс берег; бадь кустъ-  
яса местаяс волісны зэв геждо да.

Мунны изъяс вывті вөлі сьокыд. Резинөвөй  
сапөг пыр кок пыдөсөдз кылісны изъяслөн  
ёсь дорышьясыс. Быд воськовтөмысь тувкис  
кокас. Шондіыс вель ёна шонтіс мышкусө.  
Ковмис разьны фуфайка кизьяссө. Юр весь-  
тас дзизгисны кымынкө ном.

«Шондөдны, тыдалө, көсйө поводдяис.  
Номъясыд гажсө восьтасны. А антикомариныс  
абу. Муна, буракө, правильнө. Оз кө друг бо-  
кө чукульт, юыс пыр на асыввывланы, кажит-  
чө, визувтө».

Шойччыштөм бөрын кокъясас мудзыс кыліс  
өнджыка, но бөрыннас век жө разавлі. Алек-  
сей восьлаліс надзөник, радиометрической  
приборсө включитөмөн. Стрелка вөлі спокой-  
нөй. Сюмаліс кынөмыс, и Алексейлы дышөдіс  
нин видзөдны стрелка бөрся: дөзмөдіс при-  
борлөн өтмоз дыша тшокайтөмыс.

И думъясыс мунісны палаткаяслашь.

«...Вот пөвар, Катерина Петровна, көсйө  
вөчавны өбед кежлө котлетъяс. Папирос  
ящикысь нетшыштөм фанера пөв вылын  
ыджыд пуртөн крөшитө яй. Первойсө ньөжйө:  
тшок... Видзөдлө часі вылас да заводитө не-  
на өдйөджык,— тыдалө, өбед кад матын  
нин: тшок, тшок, тшок. Ещө өддзө: тшок,  
тшок, тшок... А вот и крөшитө нин, быттьө  
пулемёт лыйлө: тшок-тшок-тшок-тшок... Выв-  
ті нин өддзис, киас ещө сатшкас!.. Но мый нө  
тайө?.. Да тайө жө приборыс. Тшокайтөмыс



наушникысь кылö... Абу-ö збыльысь аномалия?»

Катерина Петровна саялі син водзьыс. Алексей видзöдліс прибор вылö. Стрелкаыс вöлі медвылі пределын, жмитчöма ограничитель бердас, а наушникын дугдывтöг сяргис и сяргис.

«Торксис öмöй?.. Эз жö öд жугав?— повзьыштис Алексей.— Часлы, бөр бергöдчыла».

Сійö бергöдчис, мунис бөрö метр кызь-комын, и наушникын сяргöмыс дугдіс. Бара кутис тшокайтны, а стрелкаыс приборлөн надзöникөн вешйис нульлань. Алексей пöшти котөрөн локтис важ местаас. Наушникын бара заводитис сяргыны.

«Вот кызди ювлö! Со кöні вөлöма — мун да корсь!.. Эг кö вош, гашкö, дыр на тырмис корсьны. А воши — стöч веськалі сы шөрö... Порода кусöксö босьтны аскöд?.. Вот Кузьпелев рад лоас. Да и ёртъяс ставөн...»

Видзöдліс кокувса изъяс вылö. Прöстöй рудов да сьöдов изъяс, кутшöмъяс туплясьöны быдлаын. Сöмын кутшöмсюрö изъяс вылас, быттьö нянь шөрöмъяс вылö, кодкö кисьтöма песок чиръяс. Да чиръясыс югъялöны и песоклөн дорысь гырысьджыкöсь, и рöмныс абу еджыд, а рудовкольквиж и бронза рöма.

«Пирит?.. Халькопирит?— воис юрас Кузьпелевлөн висьталöмыс, мый корсяна породаяслөн месторождениеяс частö овльывлöны пирит да халькопирит куйланінъясын матын.— Сідзкö, веськыда Иван Григорьевич висьтавліс. Тані мыйкö эм жö. Прибор öд оз пөръясь... Кызди босьтны колана изсö? А-а...»

Лэптіс мусьыс кулак гырся кык сьодов из, бөр мунліс ылөджык, пунктис муас изьяссө да вешйис бокө. Лөсьодіс приборсө да заводитіс матыстчыны. Стрелкаыс приборлөн вөрзис, но муніс дыша и, кор нин Алексей инмөдчис гильзанас изьясө, бара личкысис ограничитель бердө...

«Кызди пасйыны местасө, медым адзыны мөдысь?»

Алексей сулалыштис, а сэсся сувтөдіс ыджыдджык из бердө пицальсө да лөжа гөгөрыс, мед оз пөр, чукөртис изьяс.

«Пас пыдди... Көді татысь гусялас, кор ловья лов абу матын?.. Да и кыскыны сьокыд».

Шойччигмоз Алексей восьтіс записной книжкасө. Медбөрья пасйөдыс вөлі июнь кызь сизимөд лунся. Гижис: «Июнь кызь өкмысөд лун. Төдтөм ю бокысь прибор петкөдліс руда. Муна ю кывтчөс, кытчөдз тырмасны вынъяс».

4

Ещө нельысь лэччыны да нельысь петны удитліс шонді, а юлөн вомыс век на вөлі водзын. Но берегьясыс неуна вежсисны, частөджык волісны лудья да сук, кысьөм бадь кустьяса местаяс. Мунны эз вөв кокныдджык изьяс вывті дорысь.

Кустьяс пиысь Алексей надейтчис адзыны байдөг позьяс, көсийс нурьясьыштны колькьясөн, но быттьө нарошно весиг өти поз эз адзы. Адзыліс көчөс, но суан өмөй сійөс, кор сылөн кокьясыс тэрыбджыкөсь. Турун

пѳвстысь аддзис шомкор, ѳктіс да сѳйис. Ве-  
сиг зепъясас чукѳртіс мунігмоз сѳйны. Но кы-  
нѳмыс эз лѳт. Да ещѳ и восѳдіс, сѳмын юрыс  
висьмис.

Руда аддзанінсянь муніс нин нѳльѳд лун.  
Первойсѳ ѳдйѳнджык да унджык, но муна  
нормаыс вочасѳн лунысь-лун чиніс и чиніс.  
Кутіс нин артавны: «Со эсйѳ куст дорѳдзыс...  
Ещѳ эстчѳдз...»

Некѳн ни. вотѳс, ни тшак — кысь нин ту-  
лысын, арнас и то оз быд воѳ овлы. Да и кы-  
нѳмыс лѳнис, дугдіс сјумалѳмысь, дубалі.  
Шомкоръяс вылѳ зывѳк вѳлі видзѳдны. Вѳ-  
йыштісны пыдѳджык чужѳмбанъясыс и синъ-  
ясыс, нырыс ѳсьмыштіс. Петісны щѳть кодъ  
ус да тош. Копрасигѳн бергѳдчис юрыс, дуг-  
дывтѳг локтіс ун... Истѳг да папирѳс важѳн  
нин бырины, но вѳлі окота куритчыны.

Воддза луннас кустъяс пиѳ коліс радио-  
метрической приборсѳ — быри питаниеыс.  
Дась вѳлі шыбитны и фуфайкасѳ, но гѳгѳр  
дзизгисны номъяс да узигас фуфайканас  
юрсѳ тубыртѳмѳн, спасайтчис наысь. Узис  
лунъяснас — шонидджык. А войяснас муніс.  
...Садъмис кынь увтчѳмысь. Пуксис.

«Бара увтчѳ... Мѳд лун нин... Чайтѳ, кула...»

И друг чуймѳмысла паськалісны синъясыс:  
воськов кызь сайысь аддзис кузьмѳс турун-  
зьѳм мыльк да воймѳм пу крест.

«Гу?.. Али кажитчѳ?.. Туналѳ, али мый?..  
Збыльысь ѳд гу? Қыйсьысьлѳн либѳ геолог-  
лѳн, либѳ кѳр видзысьлѳн, а гашкѳ ме кодъ  
жѳ вошѳм мортлѳн? Но ѳд кодкѳ гуалѳма жѳ...  
А мый, водны жѳ да тані и куйлыны, кытчѳдз

ог кув? Кула кө да аддзасны, кык гу лоас. Гажаджык».

Алексей ышловзис, бөр водіс, кунис синьяссө. Ньюжөдчис. Вөрзөдчөмсьыс гач зептас өтик изъыс ёсь дорышнас кызкө лёк ногон мөрччис лядвееяс.

«А изъясыс? Көді найөс нуас анализ вылө?.. А аномалиясыс?.. Вермасны таво не корсыны татысь и не аддзыны. Сідзкө, бара во кольө весь, нинөм төдмавтөг, а то и кык. А таво кө оз сюр нинөм, Кузьпелевлы сьөкыд лоас корны денгасө престса начальстволысь мөд во кежлө. А ме — кувны!.. Мый эськө шуис, төдіс кө өні думьясөс Кузьпелев?..»

— Водзджык на дультө ньылалан! — кып-төм сөнъяса кулакнас прөзитіс кустьяслань кыньлы и надзөник чеччис. Гөгөр видзөд-лөм бөрын шатласигтырйи ылыстчис гу дорысь.

— Водзө!.. Сөмын водзө!..

Узянінас коли фуфайкаыс — вунөдіс.

Восьлалігас гач зепьясас суюөм изъясыс кучкалісны кокьясас, тэрмөдлісны сійөс...

5

— Төданныд-ө ті, уважаемөй Вадим Афанасьевич, мый лои оператор Уляшовкөд? Он төдөй! Мыйла сійө эз во базаө аслас рабочөй-яскөд өттшөттш? Кыйсьыны муніс, шуанныд? Сідзкө, ачыс и мыжа? А думыштлөй, ті кө эськө асьныд вөлінныд Уляшов местаын. Мый сэки вөчинныд? Корсинныд база? Бур. А өд талун көкьямысөд лун! Ловья на кө, мый сійө сөйө, да и көні сійө өні? Та йымысь эн ду-

мыштлөй, он төдөй?! А мыйла ті менам тшөк-  
тытөг дугдинныд Уляшовөс корсьны, мыйла  
Гуляевлысь группасө мөдөдінныд Лымва ку-  
зя удж вылө, кор мортсө энө на аддзөй?!..  
Коді тшөктіс?!

— Да өд сизим лун нин партия сулалө,  
уджыс ачыс оз вөчсьы. Да и Уляшов өні абу  
нин ловъя, көнкө. Весь воштам кадсө. Сөмын  
приборыс жаль, сійө медся бурыс вөлі...

— Тиянлы прибор жаль? Мортыс абу жаль?  
Ті — том морт, том инженер. Кыдзи ті көсьян-  
ныд уджавны водзө, кодкөд? Морт олөм йы-  
лысь мунө сёрниыс, а ті — прибор! Жаль,  
дерт, сійө. Но приборсө өд морт вөчө, а оз  
приборыс — мортсө! Быд уджалысь морт — сі-  
йө миян обществолөн зарни фонд! А ті... Өні  
жө пуксьөй вөв вылө, суөдөй Гуляевөс... Став-  
ныд мунөй Уляшовөс корсьны... Ловъя ли  
абу — корсьны!..

Инженер Потапов петіс палаткаысь гөрдө-  
дөма и пөсялөма. А Иван Григорьевич Кузь-  
пелев, поискөвөй партияса начальник да геолог,  
ещө недыр ветлөдліс бөрө-водзө палатка-  
ті, топчанъяс костөд. Нервничайтіс. Дзормы-  
ны заводитөм юрсиыс дзугсьыштөма, шуйга  
вом дорыс сырмис. Лөньыштөм бөрын пуксис  
тыөс помъясысь кызсюрө тувъялөм пызан  
дорө. Колө вөлі гижны удж йылысь отчөт.  
А мый гижан? Гашкө, сы йылысь, мый таво  
уджын нинөм на эз төлкмы, либө сы йылысь,  
кызди воши оператор Уляшов, и сійөс корсьө-  
ны нин быдса вежон? Начальстволы тайө  
пөшти ставыс төдса, торъя нин Уляшов йы-  
лысь. Трестсянь нель лун лэбалісны самолёт

да вертолёт, гежмалісны тундра весьтсö тайö районуын, но мортöс эз аддзыны.

«Гашкö и збыль абу нин ловъя, весьшөрö корсям? Вермис и зверь шөрö веськавны. Кöинлы, шуам... А öд кутшöм зон вöлі!.. Помнитсьö: нель во сайын паныдаси паськыд пель-помъяса демобилизуйтчöм салдаткöд. Сёрнитчи, кори уджавны, велöді операторöдз. И дзоля вок дінö моз век шыасьывлі... Но-но, всё равно корсьны!..»

Мöвпъяссö торкис палаткаö пыранінын то ли шаркöдчöм, то ли тотшкöдчöм. Сэссия мыйкö дыра мысти кыптыштис брезентыс, и палаткаö бауөн кыссис морт. Öдзöс стойкаö кутчысьöмөн ньöжйөнник кыпöдчис кокъяс вылас. Сійö казяліс Иван Григорьевичöс да заводитис ньылавны дульсö. Тыдалö, мыйкö кöсийс шуны, но эз вермы. Синъясыс видзöдісны пыдісянь-пыдісянь, дженьыдик тошка бан бокъяеыс вöйöмаöсь. Киясыс вöліны кузьöсь, öшйöмаöсь бокъясас, кулакъяссö шамыртöма, вом доръясыс тіралісны.

Иван Григорьевич чуймöмөн сувтіс.

— Эн тöд... Иван... Григорьевич?— сьöкыда шöпкöдіс морт.

Кузьпелев видзöдіс ещö здук-мöд, сэссия воськовтіс сылань.

— Алёша?! Тэ?

Шуöмас кыліс и радлун, и полöм, и жалитöм, и шензьöм.

Воськовтіс да муртса удитис кутны Алексейлысь кокняммöм тушасö муас шлювдöмысь. Босьтіс мездорас да видзчысьöмөн пуктіс топчаныввса спальнöй мешöк вылö. А сэс-

ся лэптыштiс палаткаӧ пыранiнысь брезентсӧ да горӧдiс орчча палаткаяслань:

— Вася! Катерина Петровна! Пыравлӧй ме дорӧ!

Радист да пӧвар локтiсны.

— Катерина Петровна, вайӧй, пӧжалуйста, татчӧ чай да печенньӧ. Вот Алексейӧс вердыштны колӧ. А тэ, Вася, йитчывлы аэродромкӧд да кор сэтысь самолёт: больничаӧ колӧ нуны.

— О, господи!— Катерина Петровна лӧн киясыс шлапкысисны бокъясас.

Здук мысти пызан вылын сулалiс нин печенньӧ тыра тарелка, руалiс чайник.

Ас саяс воӧм бӧрын Алексей кыпӧдыштiс юрсӧ:

— Тӧрыт аддзи... Харбей... и тiянӧс... Гӧгӧрвои: Ярей-ю. Қатыдас... Эм руда... Метр кыксӧ... ӧти ногыс. Вот, — ӧдва разьсисны шамыртчӧм чуњьясыс, и кисьыс палатка джоджӧ уси из. — Ещӧ мӧд... зептын.

— Куйлы, куйлы. Та йылысь бӧрынджык. Ӧнi вай сӧйышт!— Иван Григорьевич кисьтiс эмалированной кружкаӧ чай, сюйис сэтчӧ ньӧдздӧдны печенньӧ.

Алексей первойсӧ эз кыв некутшӧм кӧр, сiдзи и ньылалiс. Но регыд мысти заводитiс порша сӧйны, тшӧкъялiс, виньдалiс. А кор Кузьпелев дугӧдiс сӧйӧмысь, весиг лӧгасис.

Кык час мысти воис самолёт. Пуксис сiйӧ Қосью пӧлӧнса лапта кодь местаӧ, палатка-ясянь верст джын мында сайӧ.

Катерина Петровна вайис Алексейлы байдӧг яйысь пуӧм шыд, бара чай да печенньӧ. Алексей сӧйипкостi Кузьпелев радисткӧд вӧ-

чисны кык беддысь да брезентысь нөсилка.  
Кор лои гөтов, пунктисны сэтчө Алексейос.  
Водзын восьлаліс Кузьпелев, бөрын — Вася-  
радист.

Алексейос пунктисны самолёт джоджас,  
спальной мешок вылө, кодос вайис Катерина  
Петровна. Кузьпелев висьталіс радистлы:

— Лун кык мысти воа. Висьтав Потаповлы,  
медым Гуляевос мөдөдас Ярей-ю кузя. Сөмын  
нюжмасьтөг, — и пырис самолётө.

Недыр чөв олөм бөрын, самолёт моторсө  
заводиттөдз на, сійө копыртчис Алексей весь-  
тө, гусьоник шуис:

— Да, ме эг на висьтав: тэнад вайөм изъ-  
ясыд буретш сійө, мый ми корсям. Сөмын колө  
төдмавны: уна-ө запасыс.

Иван Григорьевич здук кежлө ланьтліс, сяс-  
ся босьтис Алексейлысь кисө, небыдика  
топөдліс:

— Тэ, Алёша, молодец. Абу сы вөсна, мый  
аддзин месторождениесө. Абу... А сідз...





## МИХАИЛ ИГНАТОВ. ДА СЫЛӨН КНИГА ЙЫЛЫСЬ

Кутшөм профессия медся романтической? Съөкыд та вылө друг вочавидзны. Съөкыд сы вөсна, мый миян став быд лунъя олөмыс тырөма романтикаөн. Быд лун советской йөз мыйкө восьтөны выльөс, корсьөны да аддзөны, кокньөдөны мортлысь уджсө, озьрмөдөны миянлысь странанымөс, кыпөдөны сылысь вын-йөрсө...

Корсьөны да аддзөны, восьтөны выльөс,— шуим ми. Буретш та йылысь, татшөм йөз йылысь и гижө Михаил Игнатов. Сылы медся романтическойыс — му пытшкөсса озырлунъяс корсьөсылөн удж, уджыс налөн, кодьяс уна сө километръяс мунөны подөн парматі и тундраті, вуджөны юяс да нюръяс вомөн, узылөны палаткаын либө бипур дорын...

Му пытшкөсса кладөвөйяс восьтысьяс ветлөны не сөмын гождөмын, кор дөсадитчөны номъяс, кор съөкыд вуджны нюръяс вомөн, но и төлын, кор кодзыдыс, кажитчө, чапалө чужөмтө, оз сет лолавны, поздысьөпырө лы вемөдзыд. Ставсө тайөс төдліс том гижысь М. Игнатов. Сійө ачыс унаысь ветліс экспедициясө, кор, Ухтаса горной техникум помалөм бөрын, уджаліс геофизической партиаын сейсмологөн.

Том геологлы өна сьөлөм вылас воис геофизиклөн уджыс, кажитчис сылы ветлөдлыны помтөм тундраті, море кодь паськыд да джуджыд парматі. Кутшөм съөкыдлунъяс сөмын эз ковмывлы сылы венны, ку-

тшом йозкод сомын сийо эз паныдасьлы. И быд встреча, быд веном съокыдлун кольлис аслыссикас пас том мортлон съолөмө. Отяс кыпөдлісны бур казтылөмьяс ыджыд съолөма, төлка да шань йөз йылысь, шондіа гажа лунъяс йылысь. Но вөліны и букыд, зэра лунъяс, паныдасьлісны омөлик йөз, кодъяс вылө оз позь надейтчыны сідз жө, кыдзи тувсов йи вылө.

Тадзи Михаил Игнатовлөн чужи коланлун гижны сы йылысь, мый аддзыліс, мый вөрзөдліс сылысь съолөмсө. Тадзи сы перө улысь петісны первой висьтъяс — «Чусалысь шом», «Кодзувъяслы дзирдавын», кодъясөс 1959 воын вөлі печатайтөма «Войвыв кодзув» журналын, а сэсся во мысти вөлі лэдзөма торъя книгаөн. 1959 воын жө том писатель гижө да йөзөдө журналын «Тундраын» висьт. Тайө висьтнас М. Игнатов заводитіс ассыс главнөй тема — заводитіс гижны геологъяс йылысь, налөн съокыд да романтической удж йылысь.

Колис ещө оти во, и том гижысьлөн перө улысь петіс медводдза ыджыд гижөд — «Шоръяс визувтөны юө» повесть. Тайө кад кежлас сийө некымынысь воліс том гижысьяслөн семинаръяс вылө, пырис велөдчыны заочнө М. Горький нима Литературнөй институтө.

Ми огө кутөй тані висьтавлыны повестьыслысь сюжетнөй визьсө. Тайө дзик нинөмла. Лыддысьысь ачыс лыддяс тайө интереснөй повестьсө, и сэки сы водзө сувтасны Иван Бойко и Пётр Иванович, Лена Онькова и Борис Нестеров, Кузьма Перминов, а накод тшөтш и Леонид Попов... Шоръяс пыр визувтөны юө, уна шоръясыс и артмөдөны юсө, сетөны сылы аслыссикас сям, аслыснога рөм. Овлө, шоръясыслысь туйсө помлас кутшөмкө мытшөд — ыджыд из либө кыз му пласт. Но нинөм оз вермы кутны сылысь визувсө, сийө быть пискөдчас водзө ыджыд юө. Тадз жө, юыс моз, артмө и ыджыд народнөй характер, тэчсьö

сійо торъя йозлөн характеръясысь, кодъяс шоръяс моз жö венöны не öти мытшöд. Венöны, а оз сетчыны. Оз сетчыны весиг трагическöй случайын, кызди тайö лоис Кузьма Перминовкöд. Кузьмалөн медбөръя мөвпъясысь, кор сійо вöйö кадъя нюрö, вöлины аслас ёртъяс йылысь — Лена да Борис йылысь, кодъяс сы кодъ жö сöстөм да югыд мөвпъясаöсь, кужöны вылö донъявны мортлысь назначениесö да, кор ковмас, дасьöсь и тышкасьны мортыслөн му вылын ыджыд назначение вöсна.

Лыддысысь син водзö сувтö и мöд сикас характер — Леонид Попов, морт, кодi радейтö сöмын асьсö. Көть кутшöм зывök эз вöв, но автор вочасөн востö Поповлысь аслысыма видзöдласьяссö да пошлöй кöс-йöмгьяссö, характерсö, и лыддысысь водзö сійо сувтö кызди индивидуалист да циник, стяжатель да пошляк, кодi аслас выгöда ради вермö вöчны любöй подлость. Дерт, абу кокни тышкасьны татшöм сяма йозкöд. Но олöмас бурис, сöстөмысь ёна унджык, и Бойкояслы, Оньковаяслы, Нестеровъяслы да Перминовъяслы найö отсалöны венны туй вылысь сійо став лёксö, кодi торкалö мунны водзö. И кодi лыддяс книгасö, аддзас асьысь тöдсаяссö, найöс, кодъяс олöны да уджалöны сыкöд орччөн.

Михаил Игнатов том на. Сылы муртса тыри комын арöс. Куим во сайын первой книга динö водзкывйын вöли гижöма, мый «сьöкыд, но благороднöй писательскöй уджын Михаил Игнатов вöчис медводдза вöськовъяс». Тайö книгаысь да Литературнöй институтын велöдчöмысь — сылөн ещö öти вöськов мастерствоö туй кузя. Лоöны и водзö вöськовъяс, тöдча<sup>а</sup>аöсьджык, гырысьöсьджык. Мед сöмын виль книгалөн геройясысь пыр лоöны мянкöд орччөн олысь йöз, мян современникъяс.

*Г. Торлопов.*

## СОДЕРЖАНИЕ

Шоръяс визувтöны юö. Повесть . . .	3
Тундраын. Висьт . . . . .	125
Михаил Игнатов да сылön книга йылысь . . . . .	141

*Михаил Иванович Игнатов*  
**РУЧЕЙКИ ТЕКУТ В РЕКУ**  
на коми языке  
Оформление *В. Краева*


Редактор *С. Раевский*

Техн. редактор *А. Жилича*

Сдано в набор 28[VIII-63 г. Подписано к печати 4[XII-63 г. Формат 70×92 1/32 2,15 бум. л. 5,1 печ. л. (Уч.-изд. л. 5,0) Зак. № 3617. Тираж 3000. Цс2229. Цена 15 коп. Коми книжное издательство. Дом печати.

---

г. Сыктывкар, Республиканская типография Управления печати.



15 коп.

КОМИ КНИЖНОЙ ИЗДАТЕЛЬСТВО · 1963

